

Mateo Jesushuunoa Cununi

Jesucristo ahuun shunifo

Lc 3.23-38

¹ Un mato Jesucristohuunoa tsain shara tapi-mai. Ahuun shunifoan aton anufo un mato yoiqui tau huai. Ahuun shuni David yafi Abraham.

² Abraham facu Isaac ini.

Isaac facu Jacob ini.

Jacob facu Judá yafi ahuun yorafo ini.

³ Judápan facu Fares yafi Zara ini. Aton ahuari Tamar ini.

Fares facu Esrom ini.

Esrom facu Aram ini.

⁴ Aram facu Aminadab ini.

Aminadab facu Naasón ini.

Naasón facu Salmón ini.

⁵ Salmón facu Booz ini. Ahuun ahuari Rahab ini.

Boozpan facu Obed ini. Ahuun ahuari Rut.

Obed facu Isaí ini.

⁶ Isaí facu David ini. Nan David Israelifoan aton niaifocoin ipaoni.

David facu Salomón ini. Salomón ahuafin Urias-pan ahuin ipaoniquin.

⁷ Salomón facu Roboam ini.

Roboam facu Abías ini.

Abías facu Asa ini.

⁸ Asa facu Josafat ini.

Josafat facu Joram ini.

Joram facu Uzías ini.

⁹ Uzías facu Jotam ini.

Jotam facu Acaz ini.

Acaz facu Ezequías ini.

¹⁰ Ezequías facu Manasés ini.
 Manasés facu Amón ini.
 Amón facu Josías ini.

¹¹ Josías facu Jeconías yafi ahuun yorafo ini.
 Nantianri Babilonia anoa niaifoan ahuun ranushumuafó nichini Israelifo rutushon atirifi ahuun mai ano ihuushonafoanno ahuun oinmatifo huanon. ¹² Chipofin Babilonia anoashu futsafori cainni.

Jeconías facu Salatiel ini.
 Salatiel facu Zorobabel ini.
¹³ Zorobabel facu Abiud ini.
 Abiud facu Eliaquim ini.

Eliaquim facu Azor ini.
¹⁴ Azor facu Sadoc ini.
 Sadoc facu Aquim ini.
 Aquim facu Eliud ini.
¹⁵ Eliud facu Eleazar ini.
 Eleazar facu Matán ini.
 Matán facu Jacob ini.

¹⁶ Jacob facu José ini.

José ahuin María nan Jesús ahua ini. Jesús Upa Diosin catonni nocon Numamisi inon. Nan non Cristoran huamisi. ¹⁷ Abraham ahuun funafo catorce ahuun unutani David ini. David ahuun funafori catorce ahuun unutani Babilonia anoshon ato achinifo ato mai ano inonfo. Nanfoan ahuun funafori catorce ahuun unutani Cristo cainni.

Jesús cainni

Lc 2.1-7

¹⁸ Jesucristo cainfin iscaniquin. José María yoini,—Non fiananon,—ishon. Ascafia fiananfotaima María man facu nanua ini. José ayamafian Diosin Yoshin Sharapan nanumana. ¹⁹ Ascashon José Dios tanasharacoinshon ahuun chain ahuin

rafini huacasmaquin yorafoan ointaifi yoicasmani. ²⁰ Nanscara ahuun nomuranshon shinanfiaino ahuun namapan Diosin ahuun oinmatinin afu nai muran imisi aqui oshon yoiquin isca huani, —José minfin David funaquin. Ascacun shinanchacaquima María fihu. Nan facu nanuafin Diosin Yoshin Sharapan nanumanaquin. ²¹ Ascan nan caianofin anuqui Jesusran min huashquicain. Nantonmain ahuun yorafo chaca soashofain ato numashquiamaiton,—ishon yoini. ²² Diosinhuunshon inon pacoai yoimisifoan cuuniffo cuscan man aaquin. ²³ Nanfoan cunuquin isca huani,

“Nicapon. Ainfo funuoma tsoa afu iyamfiamisi facu nanushquin. Caianno furonanfacu iishquin. Ahuun anufin Emanuel (Onicoinnin tsainman Diosinnofu icaran) ishquiquin,”

ishon Dioshuunshon inon pacoai yoimisi cununi.

²⁴ Ascaino José moinacahuatan nan Diosin oinmatinin afu nai muran imisi yoia cuscan María fiini. ²⁵ Fiiflashocai afu ipaonima furun caiyain chain. Ascashu furun caincun José anuqui Jesusran huani.

2

Nocofunu tapicoianfo fari oaiquirinoashu Jesús oinpai funifo

¹ Ascano Herodes niaifoaitian Jesús Belén anoashu cainni. Nan Belén Judea muran ini. Nantianri fishifohuunoa tapicoianfo fari oaiquirinoashu fucani Jerusalén ano noconifo. ² Ascano nococashon ato yocanifo,

—Raniashumun a facu caianquin Judiofoan aton niaifo ishquiai. Non fishi oianhuunshon non tapia facu caincun. Man nonfin ahuun fishi fari oai aria oianquin. Ascacufin non aqui unimai oaquin. Min nocon niaforan ishon oinpai non oaran,—ishon ato yocanifo.

³ Ascaifoan nicai Herodes ahuun ointi fucashriscatani. Jerusalén anoa yoraforifi Herodes icai cuscan arifi muunifo. ⁴ Ascacun ahuun yorafohuunshon Diosin cufimisifoan niaifofo yafi Moisés cununi cuscan tapimamisifo Herodes ato yoimaquin isca huani, — Uqui fucahuun, —ishon ato yoimanano aqui fuaifoan ato yocaquin —¿Raniashumun Cristo cainshquiquin? —ishon Herodes ato yocani. ⁵ Ascaiton cumacaquin, —Belén Judea murannoashu cainshquin, —nannori Diosinhuushon inon pacuai yoimisifoan cunuquin isca huani.

⁶ “Belén anoafaoan ua nicasharacahuun. Maton mai Judea muran. Maton pushu ichapayamafiano nannoashu niaifo uhuapacoin cainshquin. Uhuun yora Israelifoan aton cushumisi iishquiran,”

icashu cununi.

⁷ Ascacun Herodes a fishifohuunoa tapicoianfo tsoa yoitama tsain ato fomaquin isca huani, —Fucahuun. Un matofu tsainon, —ishon ato yoimani. Ascano nocotoshiaifoan ato yocaquin, —¿Ahuutianmun man fishi oinquin tau huaquin? —ishon ato yocaiton. Tapimanifo ahuutianmain oinqui tau huafquin. ⁸ Ascashon aton yoini, —

Belén ano focashon facu funatacahuun. Fuchicashon nasofuratan ua yoi fuushcaquin. Urifi un ahuun noicanon,—ishon Herodes ato yoini.

9-10 Ascano niaifoan ato yonoa cuscan nicatan fishifohuunoa tapicoianfo fonifo. Focaquin oianfo fishi fari oaiquirinoashu oaiton oincani unimacoinnifo. Ascatac muufocaquin oianfo facu raca manaon nituni. **11** Ascaiton oincani pushu muran iquifainshon facu yafi ahua María fuchinifo. Ascashon ratoconun mai chachishon facu yoinifo isca huaquin,—Minfin fasi sharashtacoinquin. Min nocon Ifo,—ishon yoinifo. Ascacatan aton mao fupucashon ahuara chicoin inancoinnifo. Oro inanfain ahuun inti shara inanfain inti sharacapa futsa ahuun anu mirra nanri inannifo. **12** Ascashu nanno oshayoafaan aton namapan Diosin ato yoiquin isca huani,—Afanan Herodes ari foyamacahuun. Fai futsan mato mai ari fotacahuun,—ishon Diosin ato yioni. Ascacucai Jerusalén ano fonifoma.

*José futan María furun Belén anoshon Egipto
ano ichoquinifo*

13 Man fishihuunoa tapicoianfo atom aquinoashu foafono Diospan oinmatinin afunai muran imisi José ahuun namapan yoiquin isca huani,—Funinaca huahuun. Nan facu yafi ahua Egipto ano iyoriscatahuun. Ascashu nanri iyohuu nan un mia afanan yoiaitian. Nan Herodes facu funaiqui rutushquin,—ishon Diospan oinmatinin José yioni. **14** Asca huaino moinacahuatan facu ahua futan yamu Egipto ano ichoquinifo. **15** Ascashu nanno iyopaonifo

nan Herodes naitian. Ascacun Diosihuunshon inonpacoai yoimisiton cunushoni isca huaquin,
“Unfin uhuun facu Egipto anoa afanan yoimanicain,”
ishon yoini cuscacoin man aaquin.

*Herodes ahuun ranushumuaf yononi
facumishtifo rutunonfo*

¹⁶ Ascano fishihuunoa tapicoianfo fai futsan foafo nicai, —Ua paraforan, —icashu Herodes fasi sinacoinni. Nan fishifohuunoa tapicoian-foan yoiafo man fari rafu caano fishi oinquin tau huafo. Ascacun Herodes ranushumuaf yononi, —Belén anoafo yafi a chaima icafoan aton furonanfacufo fari rafu yafo non yomumishti rutuqui cuyotacahuun, —ishon ato yononi. ¹⁷⁻¹⁸ Ascano

“Ato nicafo Ramá anoashu uaicani aton facuhuunoashu uaiyanan shoraras-caifoan nicacaquin. Aton ointi main huamapaicaquin, ‘Uaiyamacahuun,’ ato huafainfono aton facu manocani unupainifomaran,”

ishon Jeremías Diosihuunshon inonpacoai yoishomisiton cununi cuscacoin man aaqui.

¹⁹ Ascashu man Herodes naano Diosin oinmatin afu nai muran icaton José ahuun namapan yoiqui isca huani, ²⁰—Moinacahuahuu. Facu yafi ahua afanan Israelifo muran ato nasoquishquin. A facu rutupaimisifo man naafoquin, —huani.

²¹ Ascaino moinacahuatan José ahua yafi furun Israeli mai ano afanan ato iyoni. ²² Caaquin nica Herodes man naano ahuun facu Arquelao Judea murannoia niaifo nicai José musuni. Ascaiton Diosin oinmati afu nai muran imisiton afanan

ahuun namapan yoini, —Judea muran caquima futsanori catahuun, —huani. Ascano Judea muran catama Galilea anori fonifo. ²³ Ascashu Nazaret pushurasi muran fonifo. Diosihuunshon inon pacuai yoimisiton nannori cunuquin isca huani,

“Cristofin Nazarenon ishquiquin,”
ishon cununi.

3

Nan ato unu muran iquimamisi Juan tsoa istaipama ano ipaoni

Mr 1.1-8; Lc 3.1-9, 15-17; Jn 1.19-28

¹ Ascatan man fari ichapa finoanno nan Juan yorafo unu muran iquimamisi tsoa istaipama Judea ano cani. ² Ascano nannoshon ato yoiquin isca huani, —Nantifi yorafoan ua nicacahuun. Maton chaca shatucoincashon Diosin tsain nica-coincahuun. Samamashta Diosin mato yonoshqui oiquin, —ishon Juanpan oi ashcafchin ato yoini.

³ Nan Isaías Diosihuunshon inon pacuai cuscan yoimisi ipaoni. Nanton Juanhuunoa yoini isca huaquin,

“Tsoan istaipamashon Diosin yonoa cuscan oi ashcafchin yoiquin isca huanon-pacoin, ‘Nocon Ifo nocoqui ooshquin. Ascacun itisharacahuun. Maton chaca shatucoincahuun,’ ”
ishon Isaías Juanhuunoa cununi.

⁴ Ascano camello inapan ahuun rani sahuuti huashon Juanpan sahuua ini. Ascashon yoina fichin aqui nanushumuni. Ascatan ocutsuru pifain afuchi fona ayani. ⁵ Ascano Jerusalén

anoafo yafi unu Jordán ano icafo non Judea muran icafori ahuun tsain nicapaicani aqui funifo.
6 Ascashon aton chaca shatupaicaquin yoiaifoan Juanpan unu Jordán muran ato iquimapacuni afanan ipaoni cuscan huatama ismanonfo.

7 Ascaino Fariseofo yafi Saduceofo Juanqui funifo yorafo ato unu muran iquimanaiton oin fucani. Nanfori Israelifo ini. Ascaiton oinquin Juanpan ato yoini isca huaquin, —Manfin rono paupaton facu cascaracoinfoquin. Icoinra huayamaifoan Diosin atoqui sinaquin ato omitsiscapanonfo. Ascan manfin omitsiscapanacafo muran focasmaquiaqui maton chaca man shatupaima.
8 Ascacun chaca shatucoincashon Diosin mato yoia cuscan nicacoincahuun. Man ipaoni cuscari afanan ayamacahuun. Man ascaiton yorafoan ointirofo man afanan chaca huapaitama Dios fusti man tanasharaiton.

9 Ascashon maton nomuran shinanquin isca huayamacahuun, “Nonfin Abraham funafo non ahuun caforiquin. Diosin Abraham yoiyotiani cuscan nocorifi ashotoiro. Ascan Diosin noco onaintimashquimaran,” ishon anori shinanyamacahuun. Diosin onihuapaiquifin na unu cusumunnoa toquirifo Abraham ahuun funafo oni huatiroquin. **10** Fana fimi sharayamaiton ifoan ahuun tapo nantifi ruratinin shatuquin cuyoshon chi muran potatiro coi futsunon. Nanscarifiai natianri Diosin man itishara chaca shatutama man isharayamacaiyaiton mato omitsiscampacushquin.

11 Ascacun un mato unu muran iquimapacua maton chaca shatucoinshon natian Diosin

tanasharashon man ismanon. Ascafia futsa matoqui chipo oi. Naantofin ua fasi finoncoianquin. Ahuamamishti huatiro. Nantorifi ahuun Yoshin Shara mato ya rafumapacunaca. Ascano ahuunshon maton nomuran man shinansharanon. Matofu rafuano nantifi ahuara chacafó ahuunshon shatuashu a cuscara shara man inon. Ascan uncai a cuscarama. Un ahuara shara huahuu rafanancai un ahuun oinmatima. Ascatama uhuun ramapaiyamainoricaí un ahuun oinmati icuanama. ¹² Ascano naantorifi chipo a icoínra huafó yafi a nicacasmaifo ato pashcanan huaashquin. Nan icoínra huafosi a icari ato ihuicoinshquin afu isharapacushanonfo. Ascan nan nicacasmamisifo chi urumanhuan muran ato potai anoashu omitsiscái unupacunacafomaran, —ishon Juanpan nan Fariseofo yafi Saduceofo yoini.

*Jesús unu muran iquimani
Mr 1.9-11; Lc 3.21-22*

¹³ Ascaino Jesús Galilea anoashu unu Jordán ano cani. Nan Juanpan ato unu muran iquimana nanno cani naanrifi iquimanon. ¹⁴ Ascashu aquí nocooaiton Juanpan Jesús yoini, —Uacaiarocon mian acafín shara icuanaquin, —huaiton. ¹⁵ Jesús cumani, —Upa Diosin noco yonoa cuscan fusti nantifi non aca shara itiro. Ascan natian ua iquimahuu, —huaiton. —Ascan min ua yoiai cuscan un mia unu muran iquimairan, —ishon Juanpan yoini. ¹⁶ Asca huatan Jesús unu muran iquimana cainna cahuan mapuinifoanni. Ascatapaiyaino Dios ica ariashu nai fupuini. Nai

fupuicaino Diospan Yoshin Shara ruhui cuscara Jesusqui fotopacu cahuani. ¹⁷ Ascano nanno ni-afaoan nai murannoia Upa Diosin ahuun oi nican-ifo yoiquin isca huaiton, —Nan uhuun Facu un catoan. Un fasi ahuun noi. Un fasi aqui unima-coinran,—ishon Apa Diosin yoini.

4

Yoshin chacanun Jesús chaca huamapaini

Mr 1.12-13; Lc 4.1-13

¹ Ascano Jesús Diosin Yoshin Sharapan tsoa istaipama ano iyoni. Nannoshon nan yoshin chaca Satanás cuarenta oshatan chaca huamapaifafainni. ² Nan cuarenta oshatan piqui tununi. Ascashu fasi fonaincoinni. ³ Ascaino nan yora chaca huamapaimisi aqui nocoshon yoini isca huaquin,—Min Diospan facumainquin na toquirifo misi onihuahuu,—ishon Satanás yoiaiton. ⁴ Jesús cumani, —Noncai misi fustihuunoashu ipatiroma. Diosin tsain fusti non yopacoin. Nan noco yoia cuscan fustihuunoashu non isharatiroquin,—huaiton.

⁵ Nicaquin Satanás Jesús Jerusalén pushurasi shara Diosin ahuun yorafofu imisi ano iyoni. Nan Israelifoan aton Diosfu tsainti pushu pumancaya cuyacoin iyoshon yoiquin, ⁶ —Minmain Diospan facuquin nuriashu pacuaintahuun. Diosin tsain mihuunoia cununi isca huaquin,

“Diosifin ahuun oinmatifo afu nai mu-
ran icafo yonoiquin min pacuaiton mia
cushunonfo. Min tauri toquirifoquin
rutunonma mia achinonfo,”

nannorifi Diosin tsain mihuunoa cununiquin,—ishon Satanás yoiaiton. ⁷ Afanan Jesús cumani,—Ascafia Diospan tsain cununiri isca huaquin, Ahuara musunicoin huaquin shinanyamacahuun uatsi Diosin cushuiquin ishon. Ascacun asca huayamahuu ishon cununiran,—Jesús huani.

⁸ Ascaiton afanan Satanás Jesús machi cuyamamaquin iyoshon nan manifoti sharashtacoin oinmani. ⁹ Ascashon yoini,—Oinpon Mian ratoconun mai chachishon ua yoiquin, “Minfin uhuun Ifoquin,” mian huaitofin nan na maitio un mia inantiroquin,—ishon yoiaiton. ¹⁰ Afanan Jesús cumaqui,—Diospan tsain cununiri “Nan nocon Ifo Diosin fustifin non ratoconun mai chachishotiroquin. Nan fustimain nocon Ifocun,” ishon cununi. Ascan umaquinoashu cariscatahuun Satanás,—ishon Jesús yoini.

¹¹ Asca huaino Satanás Jesusmaquinoashu caino Diosin ahuun oinmatifo afu nai muran icafo aqui fotonifo pimashcaquin.

*Jesús Galilea anoshon ato tapimaquin tau huani
Mr 1.14-15; Lc 4.14-15*

¹² Ascashu nan Juan ranushumuafaan cunu muran iquimanafa nicatan Jesús Galilea ano nasoni. ¹³ Nan Nazaret anoashu pushconi. Nan noashu Capernaum ano cani atofu iyoicai. Nan Galilea ian cusumunri Capernaum ini. Nannori mani rafutan ato mai Zabulonfo yafi Neftalifo icafo. ¹⁴⁻¹⁶ Jesús nanno inon pacuai cuscan nan Isaías inon pacuai yoimisiton ahuunoa cunuquin isca huani,

“Zabulonfo yafi Neftalifo Galilea
 ian ano icafo. Nanno aton mai.
 Unu Jordán ocuma futsa. Nannori
 Dios icoinra huamafo atofu icafo.
 Ascashu nanfo faquish muran ica
 shinantsafo. Ascafia samamashta
 oianfo shafariscatani cafiscashqui.
 Nanscarifiai numamisimaisi
 omitsiscapanacafo muran focuanafo.
 Ascacun Cristo atoqui nocorisca ato
 numashquiran,”

icashu atohuunoa cununi.

¹⁷ Nannoshon Jesús ato yosiquin tau huaquin
 isca huani, —Nocon Ifo Diosin matoqui sama-
 mashta nocoyoi. Ascacun maton chaca shatuc-
 ahun. Chaca huatamarocon Diosin tsain nicaco-
 incahuun, —ishon Jesús ato yoini.

*Jesús rafu non rafuri nushumisifo ato cunani afu
 fononfo*

Mr 1.16-20; Lc 5.1-11

¹⁸ Ascano ato yoitan Jesús ianmanhuan
 cusumun cani. Caquin Simón chipocu Andrés
 futan nushutinin nushuaifoan ato ointoshini.
 Nan Simón ahuun anu futsa Pedro. Nan rafutafin
 nushumisicoin inifoquin. ¹⁹ Ascaiton ato yoiquin,
 —Ufu fucahuun. Manfin nushumisicoinquin.
 Man shiman ichaparasi nushutinin fia cuscan
 natian man uqui yora ichapa ihuushqui un
 aton Ifo inon, —ishon Jesús ato yoini. ²⁰ Ascaino
 nushuti huafaicani afu fonifo.

²¹ Ascashu chaimashta catan Zebedeo facu rafuri fuchini. Nan rafuri nanu rafu Santiago yafi Juan. Nan rafutan apa futan shasho naquishon
 nushuti icushaifoan atori yoini, —Ufu fucahuun,

—ato huaino. ²² Samamashta apa shasho naqui nichifainifocani afu fonifo.

*Jesús yorahuanrasi ato yosini
Lc 6.17-19*

²³ Ascatan afu foafoanno nantishon Galilea ano cahuancacaiquin. Judiofoan ichananti pushu muranshon Jesús ato Apa Diosin tsain shara yoiquin isca huafoanfafaini, —Itisharacahuun. Upa Diosin mato iquishquin oiran, —ishon ato yoifoafafaini. Ascashon pau futsa futsatapafoan icaifoan ato caya huamani. ²⁴ Ascaiton Siria mai anoafaoanri ahuunoa nicacashon isinincaifo aqui ihuunifo ato cayahuamapacunon. Ascashon isipaunun icaiton caya huamafain yoshin chaca atomaquinoa potafain nisofori caya huamafain yoratisho charishi futsuari caya huamapaoni. Nantifi ato caya huamapacuni. ²⁵ Ascaiton yorafoan mufainifo. Atirifi Galilea anoashu fuaino atirifi Decápolis anoashu fuaino atirifi Jerusalén anoashu fuaino atirifi Judea anoashu fuaino atirifiri unu Jordán oquirinoashu fucatan Jesús mufainifo.

5

*Jesús machi anoshon ato yosini
Lc 6.20-23*

¹⁻² Yorahuanrasi aqui fuaifoan oin Jesús mapufaintan machi pochinin tsaoni. Nanno tsaoano ahuunshon tapiafo a shinain caiton noco yosiquin isca huani.

³ —Tsoa futsan aton nomuran shinanquin isca huai, “Uficai un isharatiroma. Un Dios yopacoinran,” icaiton

- Diosin ato unimamashquin. Ascashu uhuun
Upa Diosin niaifo ano afu ipatirofoquin.
- ⁴ Ascan tsoara futsa uaiquin omitsiscafiašhu chipo
unimatiro.
Diosin atohuun ramapaiquin aton ointi main
huamatiro.
- ⁵ Cacapaimisi itamarocon futsa ahua huamisima.
Mato ahuun nomuran shinanquin isca
huai, “Ufi apaiyai cuscan atama Diosin ua
amapaiyai cuscan fusti un atiroran,” ishon
shinanfafainaiton Diosin ato unimamatiro.
Nan cuscaraofo Diosin yoiyotiani cuscan ato
inanshquin. Diosin icano arifi afu inonfo.
Ascashu nantifi ahuunari atonari iishquin.
- ⁶ Ascan nan ratoranfo Diosifu ipaiquin ahuun
tsain tapipaiquin finaifo a cuscara shara
iishcaquin.
Nan cuscaraoan fuchipaiyaifo cuscan Dios ato
imatiro a cuscara shara inonfo.
- ⁷ Ascan nan futsafohuun ramapaiquin ato shara
huaiton Diosin man tapia.
Ascacun nanrifi ahuun ramapaiqui a shara
huashopacunaca arifi unimanon.
- ⁸ Ascan nan Dios fusti tanasharashu ahuun nomu-
ran shinansharamisi.
Nan cuscaraoan chipo Dios ointirofo. As-
caiton Diosin ato ointi unimamashquin.
- ⁹ Ascan tsoan nan noicasmatanainfoan ato rau-
nan huaino afanano rau huantanano.
Nan cuscaraofo Diosin yoiquin, isca huaqui,
“Min uhuun facuran,” ishon ato yoiaino
fasi unimacoinshcani.
- ¹⁰ Tsoa Diosin yonoa cuscan aiton futsafoan omit-
sisca huafiainfoan tunua.

Nan cuscarafo Diosin ato unimamashquin.
 Ascashon nan Diosin niaifo icariafo nanfori
 atona iishquin.

11-12 Ascan futsafoan uhuunshon mato roaquin omitsiscamafain matohuunoa chani futsa futsatapafo yoifiaifoanno shinanchacayamacahuun. Mato omitsisca huaifo cuscan mato shunifori nan Diosin tsain yoimisifo omitsisca huapaonifo. Ascan man uhuunoashu omitsiscafiashu Upa Diosiqui man nocoitian fasi sharacoin mato imashquin man afu ipashanon. Ascacun unimacahuun.

*Jesús icoinra huafó sao yafi shafa cuscara
 Mr 9.50; Lc 14.34-35*

13 Ascan manfin nan nuno mai anoa sao cuscaraquin. Nami saomua shara payocotiroma. Nanscarifiai yora chacafo muran ishon marifi man ato shinanmasharatiro chaca huanonfoma. Ascan nami saomuamacai shara itiroma. Paismacoin itiro. Ascafia afanan nami shara iyamainoricaí saori shara itiroma. Afanancái ahuashta itiroma. Nanscara non potatiro puamanonfo. Nanscarifiai afanan man ua tanasharayamainocai matohuunshon tsoan ato chaca shatutiroma isharashquin. Man ua tanasharayamashu man funocointiro.

14 Ascafia manfin nan manifoti ato chasha cuscaraquin. Machi cuya mamaquinoa pushurasi fasi chaicushon shafacafi ointirofo. Onucái atiroma. Nanscarifi aquin man ua tanasharaino mato oinquin matohuunshon ua icoinra huatirofo shafacafi iishcaquin. **15** Nanscarifi aquin tsoancai faquishiano oinpafiaquin lamparina tapa camaqui otashon cutipan

fupomisima. Ascatamarocon otashon tapa camaqui huatiro shafacafi tsaocun pushu muran iquicaquin oinsharanonfo. ¹⁶ Ascacun nantifi yorafo shara huacoincahuun. Man ato shara huai cuscan oinquín shinantirofo isca huaquin, “Diospan yorafoan fasi nocó shara huafafaincani. Apa Diosin ato yosisharamisi. Asca aton Upa Dios fasi sharacoinran,” ishon shinantirofo. Anori shinancaquin maton Upa Dios nai muran ica yoitirofo isca huaquin, “¡Aicho! Upa Diosin tsoa futsacai mia cuscara sharama. Min nantifi finoncoianran,” ishon yoishquicani. Afanan yoitiro isca huaquin, “Dioshuunshon nocó shara huashomisifo. Ascan aton Dios sharacoinran,” ishon yoishquicani.

¹⁷ Isca huaquin man shinan raca, “Moisés Diosin yononi cuscan cunushoni yafi Diosin tsain yoimisi futsafoan cununi cuscari nanfo Jesús nocó nicamapaima. Nanfo nocó potamapairan,” ishon raca man shinan. Anori shinanyamacahuun. Uncái Moisés yafi Diosin tsain yoimisi futsafoan cununi cuscan potapaiquimarocon man cununífo cuscan un huamashquin un oa. ¹⁸ Un mato shafacafi yoi. Diospan tsain cunushoni cuscan nannorifi Diosin yonoi. Ato yonoquin cunushopaoni cuscan nan fustishtacai funopacunacama. Nai yafi maitio cuyoyamainon nanscasi apanaca ahuun tsainri inonpacuai cununshoni cuscan nantifi fustishtacai cuyopacunacama aquí tau huani cuscan.

¹⁹ Ascan tsoa Diosin yononi cuscan fustishta potashu non futsafori potamashu Dios icano aacai ahuama itiro. Ascafiaquin tsoan Diosin tsain

nicasharafafainquin futsafori Diosin tsain shafa-cafi yosicun nan Upa Diosin icano niaifo patashari itirofoquin. **20** Ascano nan Fariseofo non Ju-diofo aton niaifofo futsafoanri, “Nonfin fasi shara imisiran,” ifianmisishacaquin Diosin yononi cus-can tanacoianfoma. Diosin yononi cuscan hua-coinmisifoma. Mancai ato finoanshuma Diosin yononi cuscan man huashuma Upa Diosin icano man nocopacunacama.

*—Sinayamacahuun, —ishon Jesús ato yosini
Lc 12.57-59*

21 Moisés nocon shunifo yononi cuscan man nicamisi isca huaquin, “Tsoa rutuyamacahuun. Man futsa rutucun niaifofo ano mato iyotiro ma-tori copiquiri namatirofo,” ishon Moisés nocon shunifo yononi. **22** Cayacafi anori yonofianicun un mato tsain futsa cayacafiri yoinon. Oinfain. Tsoa futsaqui sinaiton a niaifo ari iyotiro a on-aintimanon. Ascan tsoan futsaqui tsain chaca huaiton isca huaquin, “Mincai ahuama. Min ahua tapiamaran,” ishon yoiaiton niaifofo ari iyotiro a onaintimanonfo. Ascafia tsoan futsa chaca huai isca huaquin, “Minfin mapo cha-caquin. Min nisoncoinran,” huaiton Diosin a omitsiscapanacafu muran nan chi muran potatiro anoashu capashononma.

23-24 Ascacufin man Dios cufiaitian nantianri man shinanquin isca huaquin, “¡Ohua! Un futsa chaca huaran,” ishon shinancun. Afanan Dios cufitamarocon iquisi nan futsa min chaca huaa ano catahuun. Aqui nocoshon yoisharahuu mia rauhuanon. Asca huano afanan min nasotiro Upa Dios cufishquin.

²⁵ Man futsa nifishon matoqui nocoiton isca huaquin, “Min ua nifian cuscacai mian inanma. Natian un mia niaifo ano iyoiran,” ishon mia yoicun. Afu caquin niaifo ano nocoataima rufofo aroshararisca huahuun. Asca huaiyamaiton mato niaifo ano iyotiro. Nocoshon niaifoan ranushumua yoitiro, “Na nocofunun futsa nifian cuscan inanma. Ascan cunu muran iquimatahuun,” huatiro. ²⁶ Un mato icon yoicoin. Mato iquimanano man cainritiroma nifian cuscan atifi inanshuma. Nanscarifi aqui man Dios chaca huamisiquin. Oataima arorisca huahuu mato omitsiscahuapanonma.

—*Maton ahuinma oincaquin chotapaiyamacahuun, —Jesús ato huani*

²⁷ Moisés nocon shunifo yononi cuscan man nicamisi isca huaquin, “Maton ahuinma chotaya-macahuun. Ainfofoan maton funuma chota-mayamacahuun,” ishon yononi. ²⁸ Aafin iconquin. Ascarifi un mato yoirifi huai. Tsoa ainfo ahun ahuinma oinquin ahun nomurran shinain, “Un nan ainfo chotapainonran,” ishon nannori shinanquin a chotacoin shinantsai. ²⁹ Ascan man oinquin man chaca huapaiquin maton furon ocuma futsa shara tsucashon potahuu afanan chacanonma. Man mumafiacun omitsiscapanacafo muran mia potacun nancai sharamafinquin. Ascaquimarocon man mumamafiashu Dios icari nocoshon nanno afu ipashanon nan sharacoin. ³⁰ Nanscarifi min mumiorishon min mucuman min ahuara min chaca huaiton, min mushtua shara icuana. Man mumafiashu omitsiscapanacafo muran mia potacun

nancai sharamafinquin. Ascaquimarocon man mumamafiašhu Dios icari nocoshon nanno afu ipashanon nan sharacoin.

Nocofunu yafi ainfo ununantirofohuunoa Jesús ato yosini

Mt 19.9; Mr 10.11-12; Lc 16.18

³¹ Nocon shuni Moisés nocon shunifo yonoqui isca huani, “Tsoan ahuun ahuin unushquin iquisi cunushotiro isca huaquin, ‘Un afanan mia fipaima. Un natian mia unuiran,’ ishon cunushotiro.” ³² Nannori Moisés yonofianicun un mato tsain futsa yoinon. Ratoran futsan ahuun ahuin nocofunu futsa fu iyamafiaitonunuquin chaca huaino. Nan ainfoan nocofunu futsa fu fiananquin fasi chaca huai. Asca huaquin nan funu fu iqui shinantsai. Funumain afi unucun. Ascafia nan funun ahuin unua nan ainfo nocofunun fiiquin aarifi chaca huai. Asca huaquin nan ahuun ahuinma fu iqui shinantsa huai.

—Man yoitiani cuscan acahuun, —ishon Jesús ato yoini

³³ Nocon shuni Moisés afanan tsain futsa nocon shunifo yoini. Nanri man nicamisi isca huaquin, “Man Diosin yoitiani cuscan acahuun. Man Diosin yoitiani cuscan ayamashu nancai sharamafinquin,” ishon Moisés nocon shunifo yoini. ³⁴ Mato anori yoini. Un afanan mato yosinon nicacahuun. Yora futsafona yopaquin ato yoiquin, “Un mia yoia cuscan un acunma Upa Diosin ua onaintimatiroran,” ishon afanan anori yoiyamacahuun.

“Un mia yoia cuscan un acunma nantifi nai muranshon ua nicatiro Upa Diosin ua onaintimatiroman,” ishon afanan anori yoiyamacahuun. Diosin nai muran ica. Ascan anori yoiyamacahuun.

³⁵ “Un mia yoia cuscan un acunma nuno mai anoa ua onaintimatiroman,” ishon afanan anori yoiyamacahuun. Nantishon mai Upa Diosinna. Ascan anori yoiyamafain, “Un mia acunma nocon pushurasi Jerusalén ano ua copitiroran,” ishon afanan anori yoiyamacahuun. Nan pushurasi Jerusalén nocon niaifocoin Diosina. ³⁶ “Uhuun mapon un shinain cuscan un mia acunma ua onaintimatiroman,” ishon yoiyamacahuun. Maton shinanhuanshon maton fo fiso iyamarai osho imatiroma. ³⁷ Ascan maton yora ahuara yoipai ato yoihoo isca huaquin, “Un mia yoia cuscan iconcoin,” iyamarai “Nan iconmaran,” ishon ato yoicahuun. “Un mia acunma ahuara ua onaintimatiroman,” ishon anori yoiyamacahuun. Na yoshin chaca Satanasfin chanimisicoinquín. Ahunshon yora anori yoitiro.

Tsoamain futsa copitiro Jesús ato tapimani
Lc 6.29-30

³⁸ Ascan nocon shuni Moisés afanan tsain futsa nocon shunifo yononi cuscari man man nicamisi yoiquin isca huanicun, “Futsa mia asca huaiton niaifo ano min iyotiro mia copishonon. Min furo ocuma futsa mia tsucacun copiquiri niaifoan ahunun furo tsucamatiro. Ascan mia sutuquin min shuta fusti tucucun niaifoan copiquiri ahunun shuta fusti tucuntiroran,” ishon Moisés yononi. ³⁹ Nocon shunifo nannori yonofianicun un mato tsain futsa yoiaiton ua nicacahuun. Tsoan mato

chaca huafia ato copiyamacahuun. Mato tapasaiton ato copitamarocon nanno nishohuun mia ocuma futsari afiaiton tunuhuu.

40 Futsan mia niaifo ano iyocun min camisa mia fiainton min sahuuti cushtopari inanhuan.

41 Ascano ranushumuaton iyamarai futsan mato yonoquin isca huai, “Uhuun forusa kilometro fusti ua foshoicahuun,” ishon mato yonoaiton shinantaquima kilometro rafu foshoihuun.

42 Tsoanran mato ahuara yocaiton ayashon ato inancahuun. Futsan mato yoiquin isca huai, “Ua inanyopun,” mato huaiton inanriscayocahuun. Fishcotama.

—*Mato noicasmafiaifoan atohuun noicahuun,
ishon Jesús ato yoini*

Lc 6.27-28, 32-36

43 “Ascashon naan maton yorafohuun noicoincahuun. Ascan a mato noicasmaifori copiquirifi ato noicasmacahuun,” ishon nocon shunifoan yoinifo cuscan man man nicamisi.

44 Nannori yoifianifo un mato yoiquin isca huai, Naan mato noicasmafiaifoan atohuun noicoincahuun. Tsoan mato omitsisca huairi Dios cufishocahuun. **45** Diosin fari onihuani yora sharafo yafi chacafori chashashonon. Nanscarifi huaquin Diosin oirifi onihuani nan yora sharafo yafi chacafori ato onihuashoni. Diosifin nan tanaifo yafi a chaca huaiforifi ato shara huamisi. Ascacun marifi nanscarifi huacahuun a mato shara huaifo yafi mato chaca huaiforifi shara huacahuun. Asca huaifin marifi man Diospan facucoinfoshon futsafori man ato ismatiro.

⁴⁶ A matohuun noiaifosi copiquirifi man atohuun noiainocai aacai ahuama. Yora chacaforifi ascarifiaifoanno. Man ascainocai Dios mato yoima man shara huaran ishon. ⁴⁷ Maton yorafo fustisi man tsain shara yoiaino aacai ahuama. Yora Dios icoinra huaamafori nañscarifiaifoanno. Man ascainocai Diosin mato yoima “Man shara huaran,” ishon. ⁴⁸ Ascano maton Upa Diosin nai muranshon nantifi yorafo noia cuscan marifi nansca huacahuun. Upa Diosin shinansharamisi cuscan marifi shinansharacahuun.

6

*—Ahuuomafo atohuun ramapaiquin inanhuan,
—Jesús ato huani*

¹ Oinfain. Man futsafo shara huaino maton nomuran man shinain isca huaquin, “¡Aicho! Un ato shara huacun futsafo ua oincani uqui shinansharanforan,” ishon anori man shinancái Upa Diosin matoqui unimaima. Mato ahua inainma. ²⁻⁴ Nan paramisifo cuscara iyamacahuun. Nanfoan atohuunoa yorafo shinansharamacani isca huaquin, “Nan yora fasi sharacoin. Futsafo shara huashoanran,” ishon nannori futsafo atohuunoa shinanmapai. Nantifi ato ointaifi yora shara huapai ato oinonfo. Ascara chaca. Upa Diosin atoqui unimaima. Futsafoan ato, “Min shararan,” huatirofiaino Upa Diosincái atohuunoa tsain shara yoishquima. Atoqui unimaima. Ascan marifi ato cuscara iyamacahuun. Futsafo ato ointaifi ahuuoma inanpaicahuun mato oinonfo. Ascaquimarocon tsoa futsa oinyamaino man ahu-

uoma inanquin Upa Diosin oin matoqui unimai mato ashosharatiro.

*Jesús afu rafuafó yosini ahuuscashomain Upa
Dios cufitirofoquin*

Lc 11.2-4

⁵ Man Upa Dios cufiaitian nan paramisifoan cufimisifo cuscan huayamacahuun. Nanfoanfin nishon yora ichananfo anoshon yafi ichananti pushu muranshonri ato ointaifi Upa Dios cufipaicani ato nicanonfo. Upa Dios shinancointa-marocon nannoafó atohuunoa shinansharamapaicani. Ascaifoan oinquin futsafoan atohuunoa shinansharatirofia Diosincai atohuunoa shinansharatiroma. Ascashocai ato ahuashta inansharashquima.

⁶ Ascacun marifi ato cuscara iyamacahuun. Man Dios cufiaitian tsoa yamaino Upa cufi-ahuun. Ascafiacon Upa fustiton mato ointiro. Ascashu matoqui unimacoinquin man yopai cuscan mato inansharashquin. ⁷ Man cufiaitianri nan tsain fustisi yoirimacahuun. Nan icoinra huamafoan cashmancoin cufimisifo cuscan. Ascashon yoimisifo. “Un nan tsain nannorisi yoiri-aiton ua Upa Diosin nicatiroran,” ishon shinamisifo. Asca huafainfoancai Diosin ascaran tsain nicapaima. ⁸ Ascacun marifi ato cuscara iyamacahuun. Man Upa Dios yocataima man yopai cuscan man tapiaquin.

⁹ Ascashon cufinquin isca huacahuun,
“Nocon Upa nai murannoaton min fasi sharacoin.
Nantififain mihuunoa yoisharapainon.

¹⁰ Min apaiyai cuscan min ica

nai muranshon samamashta arisca
 huamisifo.
 Nanscarifi nuno manifoti anaoafoan huanonfo
 cuscan
 nanscacoinrifi nuno mai ano anonfo.
 Manifotiton aton niaifo iishquin mia ifoan-
 nonfo.

¹¹ Shafatifi nocon tushu non yopai cuscan noco
 inanhun.

¹² Nan noco chaca huaifoan
 non ato rauhua cuscan huafain
 nocon chacafori noco rauhuashohuun, Upan.

¹³ Satanás yoshin chacapan noco chaca huama-
 paiflaiton
 nocoqui cumatima huahuu.
 Nansca huaquin,”
 ishon cuficahuun ato huani.

¹⁴ Ascacun futsafoan mato chaca huafiacun ato
 rauhuacahuun. Ascacufin maton Upa Diosin nai
 muranshon man aqui chaca huaa cuscari rau hu-
 atiroquin. ¹⁵ Ascafia futsafoan mato chaca huaa
 cuscan man ato rau huayamaiton manrifi chaca
 huacun Uparicai mato rauhuashoima.

Piqui tunumisifohuunoa Jesús ato yosini

¹⁶ Ascano tsain futsari un mato yoi man tapinon.
 Man piqui tunuaitian nan paramisifoan amisifo
 cuscan huayamacahuun. Nanfoan aton fuso
 chocayamafain puusimisifoma piqui tunucani.
 Dioshuunoa shinantama atohuunoarocon
 yorafo shinanmapaican. Yorafoan atohuunoa
 shinanqui isca huanonfo, “¡Oincapon! Naton fuso
 Dios shinanquin piqui tunui puusiquimaran,”
 ishon. Ascashon atohuunoa shinansharafoanno
 unimacani. Ascafiafoanno Dioscái atoqui

unimaqui ato ahuara inainma. Ascacun marifi ato cuscara iyamacahuun. ¹⁷⁻¹⁸ Ascatamarocon man piqui tunuaitian fUCHOQUIMUCAIN foshti isharashon Dios shinancahuun. Man ascaitocai futsafoan mato oinfiaquin tsoan tapitiroma man piqui tunufiaiton. Ascacia Diosin fustichifin tapitiroquin. Ascashon nan icari man nocoaitian mato ahuara sharashta inanshquin.

*—Upa Dios icanoa ahuara sharacoinfo mato mucushotiroran,—ishon Jesús ato yosini
Lc 12.33-34*

¹⁹ Ascan nuno mai ano niyoshon mafo ichapa mucuyamacahuun. Nanfo chacanai futsuaino man funotiro. Yomutsori maton pushu muran iquishon nantifi maton mafo onuntiro. Ascaino marifi man funocoin. ²⁰ Ascatamarocon Dios fu rafufafaincahuun mato amapaiyai cuscan ashquin. Manasca huaiton Dios nan icanoshon mato ahuara sharacoinfo mucushoni. Nanfocai chacanapacunacama. Tsitsa iquiyamacai yomutsoricai iquitirooma maton onunshquin. ²¹ Ascan man mafo fusti shinanfafainquifin nan fusti man noicain. Ascan man Diosihuunoa fustisi shinanfafainquin nanrifi man yonoshosharatiro ahun noicoinquin. Ascashu man afu isharapacusharatiro.

*Nocon furo nan lamparina cuscara huunoa Jesús ato yosini
Lc 11.34-36*

²² Afanan tsain futsa un mato yoi man tapinon. Nocon furo rafu nocon cayan lamparina cuscara. Nan rafu shara non oinsharatiro. Ascashon nocon

caya cushusharatiro non ahuuscanonma. Nan-scarifiai mato nomuranshon man shinansharai man isharacointiro. ²³ Ascafia nocon furo chancocai non oinsharatiroma. Faquishcoin itiro. Nanscarifiai nocon nomuranshon non shinanchacaicain non isharatiroma. Ascacun oinfain. Man Dios shinain isharaflashu chipo Upa Diosin ahuun tsain man cachiquiri huashucai afanan man isharacointiro. Ascashu nan faquish muran ica shinantsain man funocointiro.

*Dios yafi pui
Lc 16.13*

²⁴ Ascan oinmatinincai ahuun ifo nanno rafu nantian yonoshotiro. Futsa noifain futsa noicasmatiro iyamarai futsa nan yoia cusca-coin huashotiro. Ascashon futsa, “Nacai ahumaran,” ishon shinantiro. Tapicai huatiroma ratocaimain nicasharaiquin. Nanscarifiai Dios yonoshopaiquicai man pui noitiroma maton ifo inon.

*—Upa Diosin ahuun facufo cushushararan, —
ishon Jesús ato yoini*

Lc 12.22-31

²⁵ Afanan un mato yoisharanon. Isca huaqui shinanyamacahuun, “Non ahua pitama nonri-cai ahua ayaimaran,” ishon shinanchacayamacahuun. Ahuaricai non sahuuimaran iyamacahuun. Non ahuara pifain non sahuuatocai noco imasharatiroma. ²⁶ Shinancapon. Nan puiyafaoancai ahua fanayamafain ahua chintumisifoma ahuaricai fotsuyamafain ahuamaofiacun Diosin ato pimamisi. Nanscarifi aquin Diosin matohuun noiquin nan puiyaflo aca finonmafain

mato cushushara. ²⁷ Ascacun shinanchacayamachuun. Non shinanchacatocai shafa fusti noco nimayotiroma.

²⁸ Ascashon shinanquiri isca huayamacahuun, “¡Ohuashta! Raniamun un sahuuti fii nan sahuushqui,” ishon shinanyamacahuun. ¡Shinan-capon! Charofocai yonoyamafain sahuuti icushumisifoma. ²⁹ Ascatama sharamishticoin foaicafo. Nocon shuni niaifo Salomón sahuuti sharashtacoin sahuufiapaonicai nan charo sharashtacoininfo cuscarama. ³⁰ Diosin charo sharashtacoininfo onihua. Foai sharafia supashon samamashta tsasicun coatirofo. Nanfo finonmafain mato noiquin mato camisa sahuumashquin. Ascafia mancái icoínra huasharacoinnama.

³¹ Ascacun shinanquin isca huayamacahuun, “¡Ohuashta! Unmun ahua píquin uhuun tushuyamaino. ¿Unmun ahua ayaicai? Unricai ahua sahuiimaran,” ishon shinanchacayamachuun. ³² Ascan nannori nan icoínra huamafoan shinanchacamisifo. Ahuara pífain sahuupaiyaifo fustisi shinanmisifo. Ascan maton Upa Diosifin tapiaquin man yopai cuscan. Ascacun mato inanshquin. ³³ Ascacun Diosicairocon shinanchahuun. Mato yonomapaiyai cuscan nan fusti shinanfafaicahuun. A cuscara shara ipaicahuun. Nancai shinanquin tau huafafaincahuun. Man ascaiton ahuara futsa man yopai cuscan Upa Diosin mato inanshquin. ³⁴ Ascacun shinanchacaqui isca huayamacahuun. “¡Ohuashta! Uncái tapiama funamanri ahuara chaca finoainnoraca un tunuima,” ishon anori shinantama shinanquirocon isca huafafaincahuun, “Upa Diosin

shafatifi ua cushusharamisi cuscan funamanriri ua cushusharairan,” ishon shinanfafaicahuun.

7

Futsafihuunoa shinanchacayamacahuun

Lc 6.37-38, 41-42

¹⁻² Futsafihuun shinanchacaqui yoiquin isca huayamacahuun. “Nanton chaca huai cuscan onaintimapainonran,” ishon futsafihuunoa yoiyamacahuun. Man ascara yoaiton Diosin mato onaintimai. ³ ¿Ascacun ahuuscai yora ahuara pasnanshta fuostamua man futsupaiyain marifi sapa uhuapa fuostamufashocai man muima? Nanscarifiai min chaca huairan futsa huafiaquin mancaifin fasi finacaiquin. ⁴⁻⁵ Ascashon man yoiqui isca huai, “Uhuun yorashtan, un min furo murannoa ahuara pasnanshta un mia futsunon,” man huamisi. Ascafashocai man tapiama man sapa fuostamufafainna. Man fuparamitsapaimisi. Ascacun sapa futsucumucahuun. Asca huashon oinsharafain marifi man futsa pasnanshta futsutiro. Nanscarifi aqui futsafoan ato chaca man shatumapaifiaquin marifi man chaca huaa. Man fasi paran. Ascacun iquisi maton chaca shatucahuun. Ascashon marifi man futsafo chaca shatumatiro.

⁶ Tsain futsari un mato yoi man tapinon. Pashna popu iyamarai yahua popu non tushu inansharatiroma. Non mucuman tushu inansharapaifiaiton nan pitama nocorocon mocotiro. Nanscarifi aquin ratoranfoan man ato tsain shara Dioshuunoa yoipaifiaiton nicacasmacaquin mato chaca huatirofo.

Ascacun ascaraho ato yoiyamacahuun. Man yoisharapaifaiton Diosin tsain potatirofoquin.

*Dios yocafain funafain cunahuu
Lc 11.9-13*

⁷ Afanan ahuara futsa un mato yoiai cuscan nicacahuun. Ahuara yopaquin Upa Dios yocacahuun mato ashonon. Man yocain cuscan funaquima manasharacahuun nan Diosin mato ashooaitian. Ascacun Upa Diosin cufifafaincahuun man cufiai cuscan mato inanon. ⁸ Tsoan Upa Dios yocariai fiishquin. Ascan tsoan ahuara shara fasi fuchipaiyai cuscan Diosin ato fuchimatiro. Ascan tsoan Upa Dios cufiraiton ashoshquin. ⁹ ¿Ascan maton facun mato yoa yocaiton man toquiri inantiromun? Ma. Mancai maton facuasca huatiroma. ¹⁰ ¿Maton facuri mato shiman yocaiton man rono inantiromun? Ma. Mancai maton facuasca huatiroma. ¹¹ Ascacun tapicahuun. Man chaca huamisifiashon maton facufo man inansharamisi. Man ascaiton maton Upa Diosin nai murannoaton man yocai cuscan finacaia mato inansharashquin. ¹² Man futsafo matohuunoa shara huamapaiyai cuscan nanscarifi huaqui fut-safori shara huashofafaincahuun. Moisés cununi cuscan yafi Diosin tsain yoimisifoanri nannori cununifo man shara huashofafainon.

*Caincaiti atsoshta
Lc 13.24*

¹³ Ascashon tsain futsari un mato yoinon. Nan-nofin fai rafuquin. Nan fai tohuaica uhuapaton yorahuanras iahuunsi fomisifo. Ascafia nan mau fai tanashu ahuun unutaqui omitsiscapanacafo muran iquishcani. Ascacun mau fai uhuapaton

catama fai atsoshta tanacahuun. ¹⁴ Nan fai tohuaica uhuapama atsoshtacoin. Ascan nanfin fustirasiton fuchitirofo. Nan atsoshta tanafainashu omitsiscatirofobia ahuun unutaqui Dios ari no-coshcani nipasharashcaquin.

Ihui ahuun fimihuunshon non onantiro

Lc 6.43-44

¹⁵ Oinfain. Paramisifo matoqui fucashon mato yoiqui isca huacani, “Nonfin Diosin tsain yoimisifoquin,” ishon yoifiacani afoancai Diosin tsain yoimisifoma. Ascan nanfofin nan chashoan cuscarafiofiahu ato nomuran nan masharo popu cuscarafioquin. Ascacun ato nicayamacahuun. ¹⁶ Un mato tapimaquin isca huai. Fanafoti ahuun fimifohuunshon non onantiro ahuu cuscarafomainquin. Ihui moshayafohuuncuai uva foaicun non tuscutiroma. Nanhuafaquisihuunricai shopa foaicun non tuscutiroma. ¹⁷ Ascafia ihui sharano ahuun fimiri shara itiro. Ihui chacano ahuun fimiri chaca itiro. ¹⁸ Nanscarifiai ihui sharacai ahuun fimi chaca itiroma. Ihui chacanocai ahuun fimi shara itiroma. ¹⁹ Ascacun ihuin ahuun fimi sharamacun ifoan rurashon coatirofo. ²⁰ Ascacun fimi chaca iyamarai sharacun onantirofo ahuu cuscaramain ihuiquin. Nanscarifiai nan tapimamisifoan amisifo cuscan man onantiro yora sharafo iyamaraimain chacafoquin.

Atificai Upa Dios icano iquitirofoma

Lc 13.25-27

²¹ Ascano atirifiton ua Ifo huafishucuai uhuun Upa Diosin ato amapaiyai cuscan amisifoma. Nan cuscaraflo Upa icari nocotirofoma. Nan uhuun Upa nai ari icaton afi ato amapaiyai cuscan huamisifo nanfo fusti uhuun Upa ari nocotirofo

afu nipashcaquin. ²² Ascacun Upa Diosin nantifi icoinra huamafo onaintimaitian nantianri yora ichapton ua yoiqui isca huashcani, “Ifoshta, shinanhun. Non min anuhuunshon non yorafo mihuunoa tapimamisi. Min anuhuunshonri yoshin chacafu non futsafomaquinoa potamisi. Min anuhuunshonri tsoan atiroma cuscan non huapaoni. ¿Iconmamun, Ifon?” ishon yoishquicani. ²³ Ascaifoan un ato cayacafi cumaqui isca huashquin, “Mancai uhuun yorafo imisima. Manfin paramisifoquin. Chaca fustisi man huamisi. Ascacun umaquinoashu fotacahuun,” un ato huashquin.

*Futsan pushu mutsisipa huaino futsan pushu
mutsisipama huatiro*
Mr 1.22; Lc 6.47-49

²⁴ Ascacun un mato tapimai un mato yoimisi cuscacoin aashucuai man funopacunacama. Nanscarafu nan pushu mutsisipa huamua cuscarafo. Pushu huaquin ahuun quishi mai tuiqui no-coa. ²⁵ Ascano fasi oi ichapa fucain faitahuan pushu naman foannaino fuhuanri nocofiaquicai pushu mutsisipa paon huaquima. Nanscarifiai nan uhuun tsain nicacolianfo nan un yoia cuscan acani. Ascashu ahuara ahuuscarafainocai umaqui itirofoma. ²⁶⁻²⁷ Ascafia pushu futsa mai puuhuqui fuquinishta huaa ahuun quishi mai tuiqui noocoama. Ascano fasi oi ichapa fucain faitahuan pushu naman foannaino fuuhuanquiri pushu mutsisipama paon huaqui chacana huatiro. Nanscarifi aqui tsoan uhuun tsain nicafiaquin un ato tapimana cuscacoin aimar. Aatocai

shinansharama. Ascashu ahuun unutaqui arifi nantifi funoshqui omitsiscairan,—ishon Jesús ato yoini.

28-29 Jesús tsainqui anaitiano yorahuanrasi anoshon nicacanashu yoinannifo, —¡Aira! ¡Nicacapon! Ahuun tsain sharacoin. ¿Ahuuscashon anori noco yositiromun? Ahuun tsain shara iquina. Nocon tapimamisifoan Moisés cununi cuscan noco yosimisi cuscan aacai anori noco yositamarocon niaifo tapia cuscan noco yosiaran,—ishon yoinannifo.

8

Jesús nocofunuyoratishorashquishifutsuacaya huani

Mr 1.40-45; Lc 5.12-16

¹ Ascatan Jesús ato yoiquin anaititan machi tunanmanri tusuriqui cainaiton yorafoan mu-fainifo. ² Jesús caino nocofunun ahuun yorathishon ranimamishti rashquishi futsua Jesusqui no-coshon ratoconun mai chachipacufoan yoini isca huaquin, —Ifon, ua caya huapaiquifin mian cayahuatiroquin, —huaiton. ³ Jesús aqui mupishon yoini, —Icon un mia caya huai. Ascan natian-fin min cayaiquin, —huaino a rashquishi futsua cayariscatani. ⁴ Cayacun Jesús yoini isca huaquin, —Un mia caya huaa cuscan tsoa yoiyamahuu. Nocon caifohuunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mia rutushonon. Min chaca soafain min caya cuscan ato ismashquin. Ascano tapitirofo Moisés noco yononi cuscacoin min aiton,—ishon Jesús yoini.

*Romano ranushumua niaifoan ahuun oinmati
Jesús caya huani
Lc 7.1-10*

⁵ Asca huafaini Capernaum ano cani. Ascaino nanno ranushumua niaifo noconi ahuunshon ahuun oinmati caya huamapai. ⁶ Aqui nocoshon yoiqui isca huani, —Ifon, uhuun oinmati isininqui. Uhuun pushu ano furoiquima raca. Fasi omitsiscairan, —huaiton. ⁷ Jesús cumani, —Un canonqui cayahuashquin, —ishon yoiaiton. ⁸ —Ifon, uncai ahuama. Min nocofunu tsoa cuscaramacoin. Uhuun pushu muran capaiyamaquin. Min tsainmansi uhuun oinmati ua cayahuashohuun. ⁹ Ascan uarifi uhuun niaifoan ua yonomisi. Ascacun urifi ranushumuafu un yonotiro. Ascan un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashohuun,” un huaiton ua ashoriscatiro. Ascan minfin ahuamamishti huatiroquin. Ascacun min tsainmansi yoihu uhuun oinmati cayanon, —ishon yoini.

¹⁰ Ascaiton nicai Jesús afu foaifo yoini, —¡Aira! Nicacapon. Israelimafashion naton ua yoiai cuscacai tsoa futsan ua icoinra huacoinmisima. Israeli anoaofoanricai ua icoinra huacoinmisifoma. ¹¹ Ascacun un mato shafacafi yoi. Mani futsafori anoshon nan Dios icoinra huafoti nocon shunifo Abraham yafi Isaac non Jacobori Dios icano nai murannoashu atofu ichananshcani Diosin yorafo iishcaquin. ¹² Ascafia atirifi nocon caifon Israelifo Diosin ahuun yorafo ato imapaifacai tsoan icoinra huafoma. Ascacanashucal Dios icano nocotirofoma. Ascacun Diosin ato faquish

murán potashquin. Nannoashu uaiqui omitsiscapanacaforan,—ishon Jesús ato yoini.

¹³ Ascashon Jesús Romanon ranushumua niaifo yoini,—Min ua icoínra huaino min oinmati man caya. Ascan natian min pushu ano catahuun,—ishon yoini. Jesús yoiatian ahuun oinmati cayariscatani.

Pedro ahuun raisi yoshafo Jesús caya huani

Mr 1.29-31; Lc 4.38-39

¹⁴ Asca huatan Jesús Pedro pushu ano cani. Nanno caquin oian Pedronun ahuun raisi yoshafo fasi yonacoin oshati camaqui raca ini. ¹⁵ Ascaiton Jesús yoshafoan ahuun mucuqui mupiaino ahuun yona matsiriscatanaino funinaca huan nan isinincama ointsacai Jesús pimashquin tushu huani.

Jesús yora ichapa caya huamani

Mr 1.32-34; Lc 4.40-41

¹⁶ Ascaíno man fari caino isinincai futsa fut-satapafo yorafo aqui ihuunifo ato cayahuampa-pacunon. Atirifi yoshin chacafó atohuun nu-ufafaina Jesús ahuun tsainmansi atomaquinoa potano caya sharanonfo. ¹⁷ Jesús nantifi ato caya huani cuscan nannori ahuunoa Diosin tsain yoimisi Isaías inon pacuai cuscan cunuqui isca huani,—Cristofin ahuara isin futsafoan noco isin-inmai cuscan noco caya huaquin. Nocon isin-fori nocomaquinoa potaran,—ishon Isaías cununi cuscan Jesús huani.

Jesús tanasharapaiyaifo

Lc 9.57-62

¹⁸ Ascashon Jesús oian yorahuanrasi aquí fuaifoan afu rafuafo yoini,—Non ian ocuma

futsa fonon focahuun,—ato huaino. ¹⁹ Nantianri Moisés yononi cuscan tapimamisi aquí cashon yoiquin isca huani,—Tapimamisiton, min raquira caino urifi un mifu cahuacacainon,—huaiton. ²⁰ Jesús cumaque,—Marifi quiniyaquin. Puiyafori naayafofiano uncai pushu yama,—ishon yoini. ²¹ Ascaiton a tanamisi nocofunu futsan Jesús yoiquin isca huani,—Ifon, natian un mifu capaifiai uhuun pushu ano un cayotanon ua nichiyopun. Nan uhuun upa naitian un mai huayotan un mia tanasharashquinon,—huaiton. ²²—Ascaquima ua tanahuun. Ua ifoamaofin nan yora naa cuscaraoquin. Ascashon nanfoan ato yora naacun mai huatirofo. Ascan minfin natian ua tanaicain,—ishon Jesús cumani.

Jesús fuuhuan yafi ian fuchomanhuan nishma huani

Mr 4.35-41; Lc 8.22-25

²³ Asca huatan Jesús shasho naqui nanuano norifi afu rafuafo non afu nanucaini. ²⁴ Ascashu ianmanhuan non pocuaino fuuhuan nocoqui noconi. Nantian Jesús shasho murannoashu osha ini. Ascano ian fuchomanhuanquin shasho muranunu iquimani. ²⁵ Ascaiton non moinni.—Moihuu, Ifon, noco numashqui. Man non asai futsuicai,—ishon non yoini. ²⁶ Ascaino moinacahuan noco yoini —¿Ahuuscai man ratuain? Man ua icoinra huasharashucai man ratucuanama,—ishon noco yoini. Ascatan fuuhuan yafi ian fuchomanhuan yoiqui isca huani,—Fuun nishmahuu,—huafain,—Fuchomanhuan nishmahuu —huaino fuu yafi ian fuchoai nishmafaini. Asacatan ianmanhuan

pusiquima racani. ²⁷ Ascaiton oin non yoinanni, —Ahuu cuscara nocofunushonmun nocon Ifoan isca huaiquin. Fuuhuan yafi ian nan yoiai cuscan man nishma huaquin, —icashu non yoinanni.

*Gadara mai anoa nocofunu rafuhuun yoshin
chaca nuua ini*
Mr 5.1-20; Lc 8.26-39

²⁸ Ascatan ianmanhuan pocufaini Gadara mai ano non nocotan Jesús no fu caino nocofunu rafu yoshin chacafo atohuun numisi aqui funifo. Nan rafu fasi musucoin ini. Nantifi yorafo atoqui musumisifo. Ascan nan rafu icafoanno cai tsoan ato finontiro imisima. Ascacun atoqui turocomumisifo. Nan mahua quini muran naafo mai huamisifo ano nan rafu inifo. ²⁹ Jesús fuchicatan oi ashcafchin yoinifo, —Minfin Diospan facuquin. ¿Min noco ahuusca huapai oamun? Min noco omitsisca huaitian icataiyamafiano min noco omitsisca huai oamun, —ishon Jesús yoinifo.

³⁰ Ascaino nantianri ato chaimashon yahua inafoan piinifo. ³¹ Ascashon yoshin chacafoan Jesús yoicaquin, —Min na nocofunu rafumaquinoa noco potaimancai yahuarasihuun noco nichipun, —huaifoan. ³² Ascaiton —Yahuafohuun fotacahuun, —Jesús ato huaino. Nan nocofunu rafumaquinoashu yoshin chacafo yahuafu muran fonifo. Ascaino yahuahuanrasi ian muran mao-cofainni asai futsunifo. ³³ Ascaifoan oinfaincani yahua cushumisifo ichonifo pushufoti anoafu ato chani huai focani. Ascatan nococashon Jesús nocofunu rafumaquinoa yoshin chacafo potaiton oianfo cuscan futsafo yoifoanfafainifo.

³⁴ Nicacani nantifi nan pushufoti ano icafo Jesusqui funifo. Ascashon yoinifo,—Nuno noco mai anoashu catapun,—huanifo.

9

*Jesús nocofunu funitiroma caya huani
Mr 2.1-12; Lc 5.17-26*

¹ Ascatan Jesús shasho naqui nanucaini ian mahuan pocufaini ahuun pushurasi ano noconi. ² Asca caini pushu muran iquicun rafu non rafuri nocofunufoan aton caifo isinincrai afi raqui caiyamacai afiri ahua huatiroma Jesús shinanmaqui shuhua naratashon ihuunifo a cayahuamanon. Ascaiton Jesús oian nan nocofunu isinincaiton ahuun yorafoan fasi icoinra huaifoan oinquín isinincrai yoiqui isca huani, —Uhuun yorashta, ratuyamahuu. Natian mun mia chaca soashona, —huaiton.

³ Nicacani Moisés cununi cuscan tapimamisi-foan aton nomuranshon shinanquin isca huanifo, —Ajaa. Natocai chaca soatiroma. Fasi Dios chaca huai. Diosin fustitofin chaca soatiroquin. Asca noco paraquin. “Un Diosiran,” noco huamapai, —ishon aton nomuranshon shinanchacanifo.

⁴ Ascaifoan onanshon Jesús ato yoiquin isca huani, —¿Ahuuscai maton nomuranshon man amaqiri shinanchacaimun? ⁵⁻⁶ Unfi Cristoquin yorafoan aton chaca un soashotiro. ¿Ascan ahuuscacaimun un huaicai? Un chaca soashoyamaraquin un cayahuai. Accacun un mato ismai Upa Diosin ua catoan. Ahuunshofin un chaca soafain un yorafo caya huacointiroquin, —ishon ato yoini. Ascatan Jesús nan nocofunu

afi raqui cayamacai afiri ahua huatiroma yoini,
 —Min pushu ano min shuhua ya funicaitahuun,
 —ishon Jesús yoiaino. ⁷ Funinaca huatan ahuun
 pushu ano cani. ⁸ Ascaiton oincani nantifi
 mustaiaricatan yoinifo, —Ahuuscashomun
 Diosin isca huaiquin. Diosin fasi sharacoin tsoa
 cuscarama. Ahuun yonohuunshon na nocofunu
 isinincai Jesús ahuun tsainmansi caya huafain
 ahuun chacari soashonaran, —ishon yoinifo.

Jesús Mateo cunani

Mr 2.13-17; Lc 5.27-32

⁹ Nanscacaini caaquin Jesús ua oinni. Unfin
 noco niaifo pui fishofafainmisi iniquin. Ascan
 uhuun anufin Mateoquin. A muranshon aton
 pui fianti pushun facu muran un tsaoa ini. As-
 caiton Jesús ua yoini, —Un fu cahuun ua tanamisi
 iishquin, —Jesús ua catonquin huani. Ua asca
 huaino un afu cani.

¹⁰ Ascashon Jesús uhuun pushu muranshon
 un pimani. Yorafori no fu cani. Niaifo pui
 fishomisi futsafo non icoinra huamafo futsafoan
 atohuunoa shinanchacamisifo yafi non afu ra-
 fuafori cani. Ascashon nanfoan no futan piinifo.
¹¹ Ascaiton oincaquin Fariseofoan Jesús fu rafu-
 misifo yoini, —¿Ahuuscai maton tapimamisi Jesús
 nan niaifo pui fishomisifo non chaca futsafo futan
 piimun? —huanifo.

¹²⁻¹³ Ascaifoan nicaquin Jesús ato cumani, —A
 isinincaifoma cayahuamamitsamisi yopacanima.
 Ascan nan isinincaifoti fasi cayahuamamitsamisi
 yopacani. Ascarifi aquin, “Uncai ahua chaca

huamisima. Un Numamisi yopaimaran,” icaifo-cai un aton chaca soashotiroma. Ascan tsoan yoiqui isca huai, “Un fasi chaca huamisi. Un numamisi yopacoinran,” icaifoan un ato chaca soashotiro. Ascacun Diosin tsain cununi cuscan tapitacahuun. Cunuqui isca huani, “Ua man ina fushomisi un mato chaca soashonon. Nan fusticai un fuchipaima. Ascatamarocon man futsafohuun ramapaiyai nancaifin un fasi fuchipaiquin,” is-hon Diospan tsain cununi. —Jesús ato huani.

Piqui tunuaihuunoa

Mr 2.18-22; Lc 5.33-39

¹⁴ Ascashon ato yoiaino Juan fu rafumisifo aqui fucashon yocanifo. —¿Ahuuscai Fariseofo futan non piqui tunumisifiano mifu rafuafoan piqui tunumisimamun? —ishon Jesús yocaifoan. ¹⁵ Ato cumani, —Nocofunu fu ainfo fianainnoricai uni-mai fusicaquin tsoan piqui tunutiroma. Nanno funu anocai ahuun yoraoan piqui tunutirofoma. Ascafia funu amaqui rutuafono shinancaquin piqui tunutirofo.

¹⁶ Sahuuti shunicoin fashnucun poto funapan icushumufia ustuashu fasi chacanai finatiro. Tsoancai afanan ascara icushpaitiroma. Nanscarifiai un mato tsain funa shara yosia cuscan nicacoinshocai man apaoni cuscan afanan man huatiroma. Tsoan ua tanacoianshu ipaoni cuscan cachiquiri huacointiro. Ascashu funa cuscara shara iishquin.

¹⁷ Nanscarifiai tsoancai fichi tutso shuni muran vino funa nanutiroma. Fichi tutso toshacainaino vino funa chacanai cuyofotiro. Nanscarifiai maton shunicaifoan mato yosimisi cuscan

yafi un mato yosiai cuscacai nan rafu ositirofoma. Un mato yosiain cuscacoin nannori Diosin tsain shara. Ascafia mato shunifoan mato yosimisifo cuscacai anorima. Nan tanashocai Diosin mato amapaiyai cuscan man huatiroma. Nan rafu osishon nicapaiquicai man shinansharatiroma. Fichi tutso funa muran vino funa nanua sharacoin itiro. Nanscarifiai ratoranfoan apaoni cuscan unucatan un ato tsain funa shara yosiain nan fusti tanasharacun Diosin ato funa shara imai,—ishon Jesús yoini.

Jairo shotocofacu caya huafain ainfoan Jesús sahuuti muunni cayashquin

Mr 5.21-43; Lc 8.40-56

¹⁸ Ascashu Jesús tsaincai muran Israelifoan ichananti pushu anoa aton niaifo Jesusqui noconi. Nocoshon ratioconun mai chachishon yoiqui isca huani, —Uhuun shotocofacushta man naaquin. Un fu capun. Min mucupan uhuun facu mui caashquin cayatan ninon, —ishon niaifoan Jesús yoini. ¹⁹ Asca huaino Jesús niaifo fu caino non acho non afu cani.

²⁰ Nannori ainfon imi imitiani doce fari man aqui cafiando nusu yamacai. Jesús caiton nan ainfoan acachorishori ahuun sahuuti muunni.

²¹ Mun ataima ahuun nomuran shinanqui isca huani, —Un ahuun sahuuti muuanshu un cayatiroati, —ishon shinanni. ²² Ascashon muuaiton Jesús ifiacucahuatan ainfo fuchishon yoini —Achishtan, ratuyamahuu. Min ua icoinra huashufin min caya sharaquin, —ishon yoiaino ahuun imi nusuriscatani. Ascaiton mua man caya sharacoian ini.

²³ Asca huatan Jesús niaifoan pushu muran iquicaiquin nica yorafoan aton shainti manu-aifoanno futsafo shorarascacani. Fasi achacoin uaicani. ²⁴ Ascaifoan Jesús ato yoini,—Chifi cain-tacahuun. Na facucai naama. Oshafinquin,—ato huaiton osanifo. ²⁵ Ato caimatan shotocofacu mutsoinfoannaino samamashta funinaca huani. ²⁶ Ascano Jesús shotocofacu man naafiacun funia nicacani pushufoti chanifoanfafainifo.

Jesús fusho rafu cayahuani

²⁷ Ascano Jesús niaifo pushu anoashu caiton fusho rafutan mufainifo. —Min nocon niaifo ipaoni nan David ahuun funa. Nocohuun ramapaihuu,—oi ashcafchin cunarianifo. ²⁸ Asca huaifono Jesús pushu futsan muran iquicun fusho rafuri afu iquinifo. Iquiafoan Jesús ato yocani,—¿Un mato caya huanon man icoira huaimun?—huaiton. —Ai, Ifon, non mia icoira huai,—huaifoan. ²⁹ Aton furo munquin yoini,—Ua icoira huashufin man cayaquin,—ato huani. ³⁰ Asca huaino oinsharariscatani. Oinsharaifoan Jesús ato yoisharaquin—Ua nicacaquin. Un mato cayahua tsoa yoiyamacahuun,—ishon yoini. ³¹ Anori yoifiacun nan rafutan nantifi nanno icafo atoqui chaninifo.

Jesús nocofunun tsaintiroma caya huani

³² Nan rafu pushu murannoashu foaifono futsafoan nocofunu yoshin chaca ahuun nua ascacai tsaintiroma Jesusqui ihuunifo cayahuamanon. ³³ Jesús yoshin chaca amaquinoa potano nocofunu tsainon. Nanno icafo mustairitan yoinannifo,—¡Aira! ¡Oincapon! Nocon

mai nan Israeli anoshon Jesús rama aca cuscan tsoa oinmisimaran, —icanashu yoinannifo.
 34 Asca huafiainfoan Fariseofoan yoinifo, —Nanton yoshin chacafon aton niaifohuunshon yoshin chacafon potatiroran, —ishon yoinifo.

Jesús yorafohuun ramapai

35 Ascaiton Jesús pushurasifoti nanno Judiofo icano cahuacacaini. Judiofoan ichananti pushu muranshonfin Jesús ato Diosin tsain shara yoquin isca huani, —Itisharacahuun. Diosin nuno maton niaifo ipairan, —ishon ato yoifoanfafaini. Pau futsa futsatapafo caya huani. 36 Yorahuanrasi aqui fuainfoan oin atohuun ramapaini. Aton nomuran omitsiscaifoan. Ascan Jesús shinanquin isca huani, —Chashohuan cushumisioma nanscarifiai na yorafo cushumisiomaforan, —ishon shinannquin. 37-38 Ascashon non afu rafuafo noco yoini, —Yora ichapafoan uhuunoa nicayamafiano ichapamaton ua yonoshocani uhuunoa ato yoishcaquin nanfu nipashquin. Ascashon fasi Upa Dios cuficahuun ahuun yonoshomisifo catonquin uhuunoa ato yoinonforan, —ishon Jesús ato yoini.

10

Jesús doce nocofunufo catonni afu rafunonfo Mr 3.13-19; Lc 6.12-16

¹ Ascatan afu rafuafo noco cunani, —Uqui fucahuun, —noco huaino. Aqui fuaifoan noco yononi ahuuscashomain yorafo ahuunshon cayahuamafain yorafohuun yoshin chaca

nuucun atomaquinoa potatiroquin. Ascashon pau isi futsa futsatapaforimain ahuuscashon caya huatirofoquin. ²⁻⁴ Nonfin doce iniquin. Nocon anufo un mato yoi. Futsa Simonfiacun ahuun anu futsa Jesús tuqui huani Pedro. Nanton chipocu Andrés. Futsafoan aton anu Santiago non Juan. Nan rafu Zebedeoapan facu. Futsafoan Felipe non Bartolomé un Mateo non Tomás non Santiago Alfeopan facu non Simón futsari nanton ahuun caifo futsafo futan Romanonfo potapai afanan Israelifo yonononfoma. Futsan ahuun anu Judas Santiago facu futsarifi Judas Iscariote nanton Jesús potashon ato achimani. Nocofosi Jesús noco catonni non ahuun rafumisi inon non ahuunshon tsain tapishquin.

Jesús afu rafuafo doce nichini Dios niaifo icainomain ahuu cuscara iishquicain ishon ato tapimanonfo

Mr 6.7-13; Lc 9.1-6

⁵ Noco catonshon Jesús noco yonoquin isca huani, —Nan noco caifomafoan aton mai ano foyamacain Samaritanon icafo anorifi foyamacahuun. ⁶ Ari fotamarocon nocon caifo Israelifo muransi fotacahuun. Nanfotin chashoan funoa cuscarafoquin. ⁷ Ascano focashon ato yoiqui isca huacahuun, “Nocon Ifo Dios samamashta nocoyoshquin noco niaifo iishqui,” ishon ato yoitacahuun. ⁸ Ascashon isinincaifori uhuun curushhuunshon ato cayahuamafain man yora nafiacun funimafain yora nami rashquishi futsuafo ato cayahuamafain yoshin chacafu yorafohuun nuucun nanfori uhuunshon atomaquinoa potacahuun. Diosin mato cashman ahuun curush inan

cusca huafain futsaforifi caya huasho ato ahua yocayamacahuun.

⁹⁻¹⁰ Ascashon focaquin mato ahua foyamacahuun. Pui foyamafain mato sahuuti yafi sapatori foyamafain forusa yafi poquitiri foyamacahuun. Nan man nuta fustiya fotacahuun. Man uhuunshon uhuun tsain shara ato tapimanaiton arifi man yopai cuscan mato inantirofo.

¹¹ Ascan nan man pushurasi ano nocoitian nocofunun Dios tanasharacoian funacahuun nan fuchiashu ahuun pushu muran iyoshon ato yoifoanfafaincahuun nan man caitian. ¹² Ascatan ahuun pushu muran icaquin nan pushu ano icafo ato yoiquin isca huacahuun, “¡Aicho! Min pushu muran non oiran,” huacahuun. ¹³ Ascasho nan pushu ifo futan ahuun yorafoanari mato shara huano ato yoihuu isca huaqui, “Dios mato ointi shinanshara huamashquiran,” ishon. Ascafia mato tanasharayamaifoancai Diosin aton ointi shinanshara huamashquima. Ascano Diosicai mato ointi shinanshara huamaqui unuima.

¹⁴ Ascan rato pushu futsa iyamarai pushurasi anoafaoanari mato nicacasmaifoan atomaquinoashu focaquin maton sapato tatashacahuun. Ascaquifin man ato ismatiroquin mato nicacasmafain Diosirifi nicacasmaifo cuscan. ¹⁵ Un mato icon yoi. Diosin nantifi nan chaca huamisifo ato yoipacuaitian nan Sodoma yafi Gomorra ano ipaonifori ato onaintimashqui. Ascashon nan mato nicacasmafori natian ato onaintimaquin finacoinshquin.

Diospan tsain ato yoiaifoan nicacasmaquia ato omitsisca huanifo

16 Chashoanfo masharonun pipaitiro. Nanscarifiai nan icoinra huamafoan mato chaca huapaitirofo. Ascafia nanfo muran un mato nichi. Ascacun nan rono onanya cuscara marifi icahuun. Ruhuincai ahua shinanchacamisima cuscan marifi nanscarifi isharacahuun.

17 Ascacun oinfain. Nan yora chacafo masharo popu cuscarafo mato achimatirofo. Ascano achicashon aton niaifofo ano mato iyotirofo. Asca huashon aton ichananti pushu muranshon mato ihuin futsa coshamatirofo. **18** Ascashori niaifofo ano mato iyocani uhuunshon mato nansca huacani. Ascafia nanfo yafi caifo futsafori nan tsain shara uhuunoa man ato yoitiro. **19** Ascatan mato achifiafo shinanchacayamacahuun ahuuscashomain man ato cumasharaicai. Ascashon niaifofoan ointaifi mato yocaifoanno nantianri Upa Diosin mato shinanmani man ato cumasharanon. **20** Man ato yoitiancrai mafi man ato yoima. Maton Upa Diosifin aficoi yoi cafisca huaiquin ahuun Yoshin Sharapan man ato yoipai cuscan mato huashoi.

21 Ascano nantianri nocofunufoan ahuun yora afu nanuafu achimacani niaifofoan ato rutumanon. Apafoanri aton facufo achimacani ato rutunonfo. Nanscarifi huaquin facufoan aton apa yafi ahua nicacasmacaquin ato achimani niaifofoan ato rutunonfo. **22** Ascasho nantifi yorafoan man ua icoinra huacun uhuunshon mato noicasmacani. Ascan omitsiscafiaquin man ua potama nan man naitian uhuun tsain tanasharashu Upa Dios fu man ipasharaiqui. **23** Ascan pushurasi futsa anoshon mato omitsisca huaifoanno pushurasi futsa ano

ichotacahuun. Ascacun un mato cayacafi yoi. Ua nicasharacahuun. Israel pushurasifo atirifi ari man cataima un afanan matoqui nasoshquin.

24-25 Ascano ahunshon tapiafoancai ato tapisamisi finontiroma. Oinmatifoanricai ato ifo finontirofoma. Ascashu marifi man ua cuscara iishqui. Ua chaca huamisifo cuscan matorifi nansca huashcani. Nanfoan ua noicasmacaquin ua yoimisifo isca huaquin, "Minfin yoshin chacafoan ato niaifoquin," ishon ua yoimisifo. Un mato ifofiacun uaasca huamisifo. Ascan matocaifinasca huaquin finacaicaniquin.

Tsoaquimain man ratutiroquin

Lc 12.2-7

26 Ascacun mato omitsisca huafiaifoanno atoqui ratuyamacahuun. Nanfoan ahuarashta onupaifiamisi nantifi Diosin ato puashoshquin. Ahuarari fomanpaimisifo nanfori ato puashoshquin. **27** Ahuara un mato fusti yoimisi nanfo nantifi yorafo cayacafi ato yoisharacahuun. **28** Ascasho mato rutupaiifoanno ratuyamacahuun. Mato rutufiatirofocai maton yoshin tsoan ahuusca huatiroma. Ascacun atoqui ratucaquimarocon Dios fustiqui musucahuun. Nantofin nooco rutufain nocon yoshin omitsiscapanacafo muran potatiroquin. **29** Ascano tsitsipio rafu inanmitsashon toro fustishtaraca fitiro. Ascafia mato Upa Diosinasca huapaiyamaquicai fustishta namatiroma. **30** Diosin nantifi tapicoian. Nocon foori tanan huani. **31** Ascashon Upa Diosin tsitsipiofo shinamisi cuscan fasi mimacai mato shinanfafainiquin. Ascacun ratuyamacahuun.

Matocaifin tsitsipio aca finonmafain Diosin matohuun noiquin. Cushushon mima huaquin mato cushusharamisiquin.

*Yorafoan ointaifi, —Jesús uhuun Iforan, —huaa
Lc 12.8-9*

³² Ascano yorafoan ointaifi, “Jesús uhuun Iforan,” ishon ato yoiafin uhuun Upa Dios nai muran icanoshori ahuun ointaifi, “Naafin uhuun yoraquin,” ishon un yoishquin. ³³ Ascafia tsoan yorafoan ointaifi, “Jesús uhuun Ifomaran,” ishon yoia. Nantocai ua icoinra huamisima. Nanscarifi huaquin uhuun Upa Diosin nai muranshon ahuun ointaifiri “Nacai uhuun yoramaran,” ishon un yoishqui.

*Jesushuunoacai yorafoan anorisi shinanfoma
Lc 12.51-53; 14.26-27*

³⁴ Man shinanmun nantifi manifoti anoafu uhuunoashu unimanonfo un oni. Ma. Ascaramafiqui. Un mato yoiai cuscacai tsoan nannorifosi shinancima. Asca nan ua icoinra huafuan sharafosi shinainfoanno nan ua icoinra huamafoan ahuara chaca futsafosi shinancani.

³⁵ Ascashon apa ua icoinra huaino furumun ua icoinra huashuma apaqui sinatiro. Ahuanri ua icoinra huaino ainfacun ua icoinra huashuma ahuaqui sinatiro. Ahuun yayan ua icoinra huaino ahuun raru ua icoinra huashuma ahuun yayaqui sinatiro. Un nai murannoashu matoqui oyamanicai tsoa ascacuanafoma. ³⁶ Nanscarifi aquicai tsoan nannorifosi uhuunoa shinancima. Ascano tsoan ua icoinra huacun ahuun yoracoinfoan nan noicasmatirofo.

³⁷ Ascan tsoan ua finonmafain apa yafi ahua noiashucal uhuun yora itiroma. Nanscarifiai tsoan furu yafi ainfacu ua finonmafain noiashucal uhuun yora itiroma. ³⁸ Ascan unfin mato ihui coyan iquinanquin nashoshquicain. Ascafia tsoan yoiqui isca huaima, “Natian un Jesús tana. Ascacun nai omitsiscafiaquicai un shinanchacaimaran,” ishon tsoan anori yoicasmaicai uhuun yora itiroma. ³⁹ Ascashon tsoan shinanqui isca huai, “Un Jesús tanaiton raca ua omitsisca huacaniciti,” ishon shinanqui uhuun tsain cachiquiri huashu nanscara yorafu naashu omitsiscapanacafo. Asca tsoa uhuunoashu omitsiscafiaqui ua potama nanscara yorafu naashu ufu isharapacunacafo.

*Ahuara shara noco Diosin inain cuscan
Mr 9.41*

⁴⁰ Ascano ratoranfoan mato nicafain mato shara huai. Nanfoanfin nan uacoin shara huai cafisca mato huacanquin. Nanscarifi aquin tsoan nan un yoiai cuscan nicacoin yafi nan ua nichini uhuun Upa Dios nicacoin cafisca huaiquin. ⁴¹ Ascashon tsoanri Diosin tsain yoimisi ahuun tsain nicacoinfain shara huacun Diosin nanrifi nan ahuun tsain yoimisi inanshara cuscan huaquin nan shara huari inansharashquin. Ascashon nan Dios tanamisi yora shara futsan ahuun tsain nicasharafain shara huacun, Diosin nan a tanamisi inanshara cuscan huaqui nan shara huarifi inansharashqui. ⁴² Ascano tsoan ua rama icoinra huashon ua tanaiton futsan a shara huaqui unu matsi ayamacun. Ascacun Diosin arifi

a futsa shara huaa. Ahuara shara inanshquiain cuscacai funotiromaran,—ishon Jesús noco yoini.

11

Nan Juanpan ato unu muran iquimapacumisión a tanamisifo Jesusqui nichini

Lc 7.18-35

¹ Ascatan non afu rafumisifo doce noco yoiqui anaititan pushurasi futsafo ano Jesús noco iyoni. Nannoafori ato yosifain ato tapimaicai ahuuscashumain non Dios fu ipatiroquin. ²⁻³ Ascano nantianri Juanpan nan unu muran ato iquimapacuni ranushumuafaoan cunu muran iquimanifo. Nan muranshon Jesús acai cuscan nicaquin ahunoa fasi tapisharapaiqui. Nan cunu muranshon a tanamisifo nichini Jesús yocanonfo. Ascano nan Juanpan ato yonoa cuscan focashon Jesús yocaquin isca huanifo, —¿Iconmun nan minmun nan non manamisi iyamarai futsa raca non manaicai? —ishon Jesús yocanifo.

⁴ Ascaiton Jesús ato cumaquin isca huani,—Nan man nica cuscan yafi man oian cuscari Juan tapi-matacahuun. ⁵ Yora fushocoinfo un ato cayahua afanan oinsharanonfo. Nipaiqui ranainfori un ato cayahua nisharanonfo. Ato yoratisho coyo cuscara tocoi futsuafori un ato caya huaa afanan imisi cuscan ato nami shara inonfo. Pastocoinfori un ato cayahua nicasharanonfo. Man yora naacoinnafori un afanan ato funimana. Ascashon ahuuomafori tsain shara un ato yoifafainmisi ahuuscashumain Dios fu ipatirofoquin. ⁶ Ascan

tsoan ua icoinra huacoinshon ahuara futsa shinanma. Nan cuscara yorafofin unimacointiroquin. Nannori ua Juan yoishotacahuun,—ishon Jesús ato yoini.

⁷ Ascatan man foafono Juanhuunoa Jesús nanno niafo ato yoini, —¿Ahuuscai tsoa istaipama ano Juan oin focani fonifomun? Juancai nan faca tahua pui ninhuun focufocu acai cuscarama. Nanscarifiai man man tapia Juancai nocofunu ointi ranainyama. ⁸ ¿Ascacun ahuuuscai Juan oinpai man fonimun? ¿Man shinamun a nocofunu sahuuti sharacapa sahuucun oin foi man foni? Ma. Juanpacai sahuuti sharacapacoin sahumisima. Niaifofoanfin aton pushu muranshon sahuuti sharashtacoin sahuutirofoquin. ⁹ ¿Ascan ahuuuscai oinpai man fonimun? Man shinanraca Diosin tsain yoimisi Juan oincai man cani. Ascafia nan icon. Juanpan Diosin tsain yoimisifia nanton yoimisi cuscacai tsoa futsafoan anori yoimisima. ¹⁰ Ascacun nanhuunoa Diosin tsain cununi isca huaquin,

“Min nai ariashu mai ano fotoataima iquisi uhuun tsain yoimisi un nichiqui tau huai. Mihuunoa ato yoiaino itisharashon mia nicanonfo.”

ishon cununi. ¹¹ Un mato icon yoi. Tsoash-tacai Juan finoanma. Ascashon Juanpan tsain yoimisi cusracai tsoan ascara yoiyomisima. Ascafia Dios niaifo icanoafoan yoisharatirofo cuscacai Juanpan nicayamafain nanfoan oianfo cusracai Juanpan oinyomisima. Ascashon nantifi Dios icanoafoan Juan finoanfo. ¹² Nan Juanpan ato unu muran iquimapacunitian natianri yorafo

Dios icano fasi iquipaicoincani. Ascashon shinanqui isca huafo, “Diosin niaifoan ahuun yora urifi un ipai afu nipashquin. Ascacucai ahuashton ua nitun huatiroma un ahuun yora icaiton,” ishon shinancani. ¹³ Diosin tsain yoishomisifo futan Moisés cununi cuscan yoiquin isca huanifo, “Nan nocon numamisi noco niaifo oshquiran,” ishon yoinifo. Ascan natian Juanrifi man matoqui nocoa ahuunoari mato yoishquin. ¹⁴ Nanfoan cununifo cuscan icoingra huashon man tapitiro Juan arifi Diosin tsain yoimisi nan Elías cuscara. Ascacun Diosin tsain yoimisifoan cunuqui isca huanifo, “Un matoqui Elías nichishquiran,” ishon Diosin yoini. Ascan nanfin Juanquin. ¹⁵ Manmain ua nicatiroquin ua nicacahuun. Uhuun tsain maton nomuran nanushcaquin.

¹⁶ Ascashon natian niyoafó ahuu cuscarafomainquin un mato yoi man tapinon. Nanfofin nan facu cashumisifo cuscarafoquin. Facufo cashucaquin afu facu futsafo oi ashcafínin cunatirofo. Nanscarifiai nanfofin nanscarafquin. ¹⁷ Nan facu cashumisifoan yoitirofo isca huaquin, “Man non shanti manuflainocai monopaicanima. Fanainca omitsiscati cuscara non fanaifainocai man uaipaimaran,” ishon nan facu cashumisifoan yoitirofo. ¹⁸⁻¹⁹ Nanscarifi aquin nanfoanri Juan yafi uqui tsain chipufafaini. Ascafia Juanpacai piqui tunufain fimiunu pau ayamisima. Ascacun ahuunoa yoiqui man isca huamisi, “Juan nisocoin. Yoshin chaca ahuun nuaran,” ishon yoimisifo. Asca unfin pii sharafain un aya sharamisiquin. Ascafia uhuunoari yoiqui isca huamisifo,

“¡Cuu! Jesús pitsicoin fasi ichapari ayatiroran huafain Roma anoa niaifo puifishomisifo yafi yora chacafu furi rafuiran,” ishon uhuunoa chaca yoimisifo. Ascafia nanfoanri yoiqui isca huamisifo, “Tsoamain shinansharafain icaquin non onantiro. Nan yorafin isharacoianquin shinansharamain huaifin,” ishon nannori yoimisifo. Nannori yoifiaquicai uhuunoa ascara yoipaimisifoma. Ascatamarocon uqui tsain chaca fusti huamisiforan,—ishon Jesús ato yoini.

Pushurasi anoafو nicayosmashunifo

Lc 10.13-15

²⁰⁻²¹ Ascano ato yoiqui anaititan Jesús nan pushurasi anoafو ato yoiqui isca huani, —¡Ohua! Man Corazín anoafو yafi Betsaida anoafan man chipo fasi omitsiscai. Tsoan oinyomisima cuscara shara un mato ismafiano mancái chaca shatupaima. Ascan nan Tiro anoafو yafi Sidón anofori un mato isma cuscan un ato ismaiton nanfoan aton chaca shatucuanafو. Ascasho yoicuanafو isca huaqui “¡Ohua! Non fasi chaca huamisi. Ascacun natian Diosiqui nasoshon non nicashara-noncahuun,” ishon yoicuanafо. ²² Ascafia Diosin nantifi icoinra huamafo onaintimaitian nan Tiro anoafо yafi Sidón anoafori onaintimafiaquicai mato onaintimaquin finai cuscan ato huaima.

²³ ¿Ascan man Capernaum anoafan man shinanmun man nai muran Dios ari foicai? Ma. Omitsiscapanacafo muranrocon mato potai. Tsoan oiyomisima cuscara shara un mato ismafiaitocai maton chaca man shatupaima. Ascan nan un mato isma cuscan Sodoma anoafо un ato ismaiton aton chaca shatu

cuanifo. Tsoaricai cuyocuanama. Nantianri aton pushurasi icuana. ²⁴ Un mato yoi. Diosin nantifi icoingra huamafo onaintimaítian nan Sodoma anoafori onaintimaifiaquicai mato onaintimaquin finai cuscan, —ishon Jesús noco yoini.

Uqui fucahuun. Un mato ointi fiananan huashonon man afanan shinanchacanonma

Lc 10.21-22

²⁵ Ascano ato yoiqui asca huatan Jesús apa cufini, —Upa Diosin, min fasi sharacoin. Nantifi nai murannoafu futan mai anoafuan aton Ifofin minquin. Ascano nan mapo sharayafo yafi cunu tapiafocai min tsain shara min ato tapimanama. Ascafia nan cunu tapiamafiaflashon un ato isma cuscan un ato yoiai cuscan ua icoingra huafu. Nanfotin min ato tapimanaquin. ²⁶ Icon, Upan, minfin nanscara fuchipaiaqui, —ishon apa yoini.

²⁷ Ascashon Jesús afanan ato yoiquin isca huani, —Upa Diosin tapia cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aqui urus fusti Upa Diosin un onancoian. Nanscarifi aqui urifi un futsafo Upa Diosihuunoa onanmanai cuscan nanfoanri Upa Diosin onantirofoquin.

²⁸⁻²⁹ Ascacun uqui fucahuun ua tapishashcaquin. Unmain ahuu cuscaraquin un mato tapimai. Unfin yorafohuun ramapaimisisquin. Uhuun nomuranricai un ahuashta shinanchacayamafain un isharacoin fustimisi. Ascashon un mato yonomapaiyai cuscacai curushma. Nanricai ahua ihuuma. Ascacun maton nomuran ihuucuin mui uqui fucahuun un

maton ointi fiananan huashonon man afanan shinanchacanonma. ³⁰ Ascano uqui oshon man mutiro un mato curush yonomaima. Ascatamarocon ua tanasharacoinyashu mato ointi fiananan huashon man isharacointiroran, —ishon Jesús ato yoini.

12

Jesús fu rafumisifoan tunutitian trigo fimi mutusnifo

Mr 2.23-28; Lc 6.1-5

¹ Ascatan Israelifoan aton tunutitian Jesús yafi afu rafumisifo mau mamaqui focaquin trigo mutuscashon fonaincoincaquin piyaifoan.

² Oincaquin Fariseofoan Jesús yoinifo, —¿Ahuuscai nocon shuni Moisés yononi cuscacai minhuunshon tapimisifoan nicapaicanimamun? Tunutitian trigo mutuscaniran, —huaifoan.

³ Jesús ato cumaquin isca huani, —¿Davidhuunoa cununi cuscan man man oinmisimun? ¿Fonainquin nocon shuni David ahuun yorafo futan ani cuscan man man nicamisimun? ⁴ Dios fu tsanti pushu muran iquicaishon amurannoa misifo ato piquini fasi fonicoinquín. Ano tushu futsa yamaino. A misifofin nan Diosin tsain yoimisinafosi iniquin. Tsoa futsacai a misi pitiro inima. Nannori yonofianifo fasi fonicoinquín David afu rafuafo futan pini.

⁵ ¿Ascashon Moisés cununi cuscari man man oinmisimun? Cunuqui isca huani, “Dios fu tsanti pushu muranshon tunutitian ahuun tsain yoimisifoan yonotirofo. Nanfoan yonofiaquicai

ahua chaca huacanimaran,” ishon Moisés cu-nuni. ⁶ Ascatan un mato yoi. Dios fu tsainti pushu fasi sharashtafia uncaifin fasi shara finaca-iaquin. ⁷ Upa Diosin yoini cuscan cununi isca huaquin, “Man ua inafo rutushomisi un maton chaca soashonon. Nan sharafia man futsafihuun ramapaiquin man ato shara huai. Nan-caifin fasi shara finacaiaquin. Nan fusti un fasi fuchipairan,” ishon yoini. Ascacun nan tapicoin-shocai man ufu rafumisifohuunoa yoicuanama, “Nanfoan chaca huaforan,” ishon. Afoantsi ahua chaca huacun. ⁸ Uafin uhuun Upa Diosin caton-niquin. Ascacufin urusu fusti un yoitiro ahua-main tunutitian man huatiroquin, —ishon Jesús ato yoini.

Nocofunu mucu musufiquia

Mr 3.1-6; Lc 6.6-11

⁹⁻¹⁰ Ascatan Jesús Israelifoan aton ichananti pushu muran iquini. Nanno iquishon ato yosialino nantianri nocofunu musufiquiaton arifi nicani. Ascano nan Fariseofoan Jesushuunoa ahuara chaca yoipaicaquin nan yocanifo. —¿Nocon shuni Moisés yononi cuscumun tunutitian non yora caya huatiro iyamarai non caya huamatiromanmun? —ishon yocaiifoan. ¹¹ Jesús ato cumani, —¿Man chashoan ayano tunutitian quini muran pacucun man ihuiriscatiromamun? Ma. Ascatama manrocon ihuiriscatiro. ¹² Nanscarifi huaquin fasi noicoinquín nocofunuuhuunoa tunutitianfiacun non shinantiro. Moiséscai noco yononima tunutitian non yora cayahuanonma, —ishon ato cumani.

¹³ Ascashon nan nocofunu musufiquia yoiqui isca huani, —Mushahuun, —huaino. Mushatanaino nantian ahuun mucu mumu sharacoin iriscatani. Nan ahuun mucu ocuma futsa cuscara shara ini. ¹⁴ Ascaiton oincanashu Fariseofo focashon shinannifo —¿Ahuuscashomun non Jesús achitiroquin rutushquin? —icashu yoinannifo.

Upa Diosin ahuun facucoin catonni ahuun oinmati cuscara inon

¹⁵ Jesús tapitan a rutupaiyaifoanno anoashu cani. Yorahuanrasiton mufainifo. Ratomain isinincuai nanfo cayahuamani. ¹⁶ Ato cayahuatan ato yoini, —Uhuunoa tsoa yoiyamahuu, —ato huani.

¹⁷ Nannori ato yoi Isaías cununi cuscan icocoin inon. ¹⁸ Isaiasin Diosin tsain cununi isca huaquin,

“¡Oincapon! Naquian uhuun oinmati cuscara un catonni. Un fasi ahuun noi. Un aqui unimacoin. Uhuun Yoshin Shara un afu rafumamisi. Nan manifoti uhuun tsain nicasharacun atorifi aton chaca yama huashotiro uhuun yora inonfo. ¹⁹ Acai yora futsa fu fochishmanantanainma. Tsain isininpaton yoishquima. ²⁰ Nan yora omitsiscai afanan tunutirofoma ato potaima ato cushusharai tunumashquin. Tsoan icoinra huapai ato yoisharashquin icoinra huacoinonfo. Ascan huaino afanan mai ano oaitian nantifi chacafoti unumashquin ahuunshon nantifi ishara fustisinonfo. ²¹ Nantifi manifoti ahuunoa nicaquin isca huacani

shinanshcaquin, ‘Nan fustiton noco numatiro non ahuunoashu Upa Dios fu nipanon,’ ishon yoishquicaniran,” Isaías cununiquin.

—Satanashuunshon Jesús yoshin chacafopotaíran, —ishonyoinifo

Mr 3.20-30; Lc 11.14-23; 12.10

²² Ascatan nocofunu fusho icain tsaintiroma. Ahuun nuushon yoshin chacanun tsainmapaonima nan Jesusqui ihuunifo caya huanon. Ascacun Jesús nan nocofunu afanan oinmasharafain tsainmani. ²³ Ascaiton oincani mustaiaricatan afiranán yoinancaquin yoinifo, —Jesús ahuamamishti shara huatiro. Asca nan naraca David ahuun funa. Nan Upa Diosin catonni, —ishon yoinifo.

²⁴ Ascaifoan nicaquin Fariseofoan yoinifo, —Ma. Atocai Upa Dioshuunshon yoshin chaca potama. Yoshin chacafaoan aton niaifo Satanashuunshon yoshin chaca yorafohuunoa potatiroran, —ishon yoinifo. ²⁵ Ascano nan shinainfo cuscan onanshon Jesús ato yoini, —Mani futsafo afi ranan rutunain cuyotirofo. Nanscarifiai pushurasi anoa icafo iyamarai pushu fusti muran icafo afi ranan chaca huatananfafaincani pashtcanantirofo afanancai tsoa anosi itiroma. ²⁶ Nanscarifiai Satanás niaifoan afu yoshin chacafao potaquin ahuun yono chacana huatiro. Asca huaquin ahuun yono cuyocointiro afu yoshinfocai afanan afu itirofoma. ²⁷ Ascafia manfin yoimisiqui Satanás curushhuunshon yoshin chaca potaran ishon man yoimisiquin. ¿Un asca huaino tsohuunshon

mato yorafoan yoshin chacafu atomaqinoari potafomun? Ascacun nanfohuunshon man tapitiro man uhuunoa amaqiri shinanchacai cuscan. ²⁸ Un Diospan Yoshin Sharahuunshon yoshin chacafu atomaqinoa potaino maton Numamisi Diosin catonni cuscan matoqui nocoa.

29 Afanan mato yoi nicasharacahuun. Ahuuscashomain yorafoan nocofunu mutsisipaton ahuun pushu cushu ano ahuun mafo onutiroma. Ascafaino finoncaia aqui nocoshon achifain munushquin ahuun mafofo cuyonfiaitocai ahuusca huatiroma.

³⁰ Tsoan unfu rafupaiquima ua nicacasmal. Tsoan uhuun tsain nicacasmaifin ua noicasmaiquin. ³¹ Ascano un mato icon yoiquin. Ratoran ahuara chaca huai Diosquiri Upa Diosin rau huashotiro. Ascanfia ratoranton yoia isca huaquin, "Nanton aca cuscan Satanashuunshon acaran," huafishu Diospan Yoshin Sharahuunshon aca. Nanton Diospan Yoshin Sharahuunoa tsain chaca huaa. Asca huacun Upa Diosin ahuun chaca rau huanacama. Ahuun chaca ahuun nuupacunaca. ³² Tsoan ua chaca huafin un ahuun chaca rau huashotiroquin. Ascan tsoan Upa Diospan Yoshin Sharaqui tsain chaca huacai Upa Diosin rauhuanacama. Ahuun chaca ahuun nuupacunaca. Natian naitianri ahuun chaca ahuun nuupacunaca.

*Fimi fana ahuun fimihuunshon non onantiro
Lc 6.43-45*

³³ Ascano shinancapon. Fimi fana naman non orosharaino fana foaisharatiro. Ascashu ahuun

fimirifi sharacoin itiro. Ascan non fana naman oroamacai fana foaisharatiroma. Ascashu ahun fimiri chacacoin itiro. Fimi fana ahun fimihuunshon non onantiro ahuu cuscaramainquin. ³⁴⁻³⁵ Nanscarifiai nocofunu sharapan ahun nomuranshon ahuara sharafosi shinain cuscan ahun tsainrifi sharacoin itiro. Nanscarifiai nocofunu chacapan ahun nomuranshon ahuara chacafosi shinain cuscan ahun tsainri chacacoin itiro. Ascano nocon ointi muranshon non shinain cuscan nannoricoin non yoitiro. Ascan manfin nan rono paupaton facu cuscarafoquin. Ascacun ahuuscashotsi chacacoinfiashon man ahuara shara yoitiro.

³⁶ Ascacun un mato yoi. Ratoran shafatan Diosin nantifi yorafo ichanan huaitian ato yoipacushqui ratotonmain icoindra huamisi iyamarai icoindra huamisimaquin. Nantianri ahuashta shinantama yoimisifo cuscan ato puashoshquin. ³⁷ Ascashon man niyoano nantifi man yoimisi cuscan Upa Diosin mato nicamashquin. Ascan mato tsainhuunshon man afu ipatiro iyamarai mato omitsiscapanacafo muran mato potairan, —ishon Jesús ato yoini.

—Tsoan atiroma cuscan noco ismahuu non mia icoindra huanon, —ishon yora chacafoan Jesús yoinifo

Mr 8.12; Lc 11.29-32

³⁸ Ascaiton Fariseofo futan Moisés cununi cuscan tapimamisifoan yoinifo, —Tapimamisiton, tsoan atiroma cuscan noco ismahuu min Dios ariashu oa non mia icoindra huanon, —ishon yoiaifoan.

³⁹ Jesús ato cumani, —Manfin chaca shinanfain Dios cachiquiri huamisiquin. Ascacun tsoan atiroma cuscan noco ismahuu ishon man ua yoia. Ascafia nan Diosin tsain yoimisi mato shuni Jonás ani cuscacoin un chipo mato ismaiton nan fusti man oinshquin. ⁴⁰ Jonás shimanooan shaqui muran osha rafu non fusti iyoni cuscan. Nanscarifiai un Diospan Facu mai muran osha rafu non fusti un iyoshqui. ⁴¹ Ratoran shafatan Diosin nantifi yorafo ichanan huaitian ato yoipacushquin ratotonmain icoingra huamisi iyamarai icoingra huamisimaquin. Ascaino nantianri Nínive ano ipaonifoan matohuunoa yoishcani isca huacaquin, “Jonás noco Diosin tsain yoini cuscan non nicacoinshon nocon chaca shatucoinshon non Dios icoingra huani. Asca man manfin Diospan furucoin nicafiahocai maton chaca man shatumisimaran,” ishon mato yoishquin. Nan icon un Jonás finonfiacucai man ua nicapaimisima.

⁴² Nanscarifiai Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafo muran foshquicaniqui. Ascaino nantianri nan ainfo Sabafoan ato niaifo ipaoniton matohuunoa yoiquin isca huashquin, “Salomón tapicoian cuscacai tsoan futsan tapipaonima. Ascacun ahuun tsain nicapaicoin un aqui chaicunoashu cani. Ascan mancái nan Diospan Furun nicapaima. Ascatamarocon man nicacasmapaoniran,” ishon matohuunoa yoishquin. Nan icon Salomón tapicoian ipaonifia uncaifin fasi Salomón finoncoinfiacun mancái ua nicapaima.

*Yoshin chaca afanan yoraqui nasotiro
Lc 11.24-26*

⁴³⁻⁴⁴ Yoshin chaca nocofunumaquinoashu cai tsoan istaipama ano cani shara futsa funai cai anoshon tunushquin. Ascafia fuchiamacaiqui yoshin chacanun afanan shinanqui isca huani, “Unfin nan nocofunuuhun ipaoniquin. Ascacun un afanan aqui nasoiran,” ishon shinanni. Ascatan aqui nocoshon oian tsoa futsacai afu rafua inima. ⁴⁵ Ascacun nan yoshin chacanun afu yoshin chacafo siete ato ihuuni nan fasi chaca finacaiafo. Ascashon ato yoiqui isca huani, “Nocofunu un mato ismai non ahuun nomuran iquitiroran,” ishon ato yoini. Ascatan aqui focanashu iquicainaifoanno nan nocofunu fasi mimacai chacacoin ini. Manmain aqui rananri focun. Nan scarifiai maton shunifoan chaca huafiapaonifo mancaifin fasi chaca huaquin finacoianquin, — ishon Jesús ato yoini.

*Jesús ahua yafi ahuun ushtofo
Mr 3.31-35; Lc 8.19-21*

⁴⁶ Ascatan Jesús yorahuanrasi yoi tsaincai muran ahua yafi chipocufo noconi. Ascano aqui iquishon ahuara yoipaifiacaquin chifishon mananifo. ⁴⁷ Ascaiton futsan yoini, —Min uhua futan ushto rananun chifi nishon mia ahuara yoipai fuaforan, —ishon yoaiton. ⁴⁸ Jesús cumani, — Un mato tapimai ratofomain uhuun uhuafu yafi uhuun ushtofoquin, —ishon yoini. ⁴⁹ A tanamisifo oinyacuquin ato yoini, —Nafofin uhuun uhua cuscarafu yafi uhuun ushto cuscarafuquin. ⁵⁰ Nan

uhuun Upa Dios nai ari icaton ato amapaiyai cuscan huaifo nanfofin uhuun ushtofo yafi uhuun chicofo non uhuun uhuafquin,—ishon Jesús ato yoini.

13

*Fimi ushu saacaihuunoa cuscara ato Jesús
yosini tapinonfo
Mr 4.1-9; Lc 8.4-8*

¹ Ascatan nan shafatari Jesús pushu murannoashu cai ian cusumun tsaoni. ² Ascaino aqui yorahuanrasi funifo ahuun tsain nicapai cani. Ascaino shasho muran nanuinacahuan ahuun cusha camaqui tsaoshon ato yoini. ³ Ascashon ahuara futsahuunoa cuscara ato yoini ato tapimashquin. Yoini isca huani, —Nocofunun ahuun noshati murannoá fimi ushu fishon ahuun mau mamaqui saani. ⁴ Saacano ushufo fai nushmancayan pacua puiyafoan piinifo. ⁵ Ascano ushu ranan toquiri camaqui pacua mai ichapamashta anoashu samamashta ushu foaica. ⁶ Fari tsacaqui yositimahuaino man naa. Ahuun taporicai chai foama ini. Ascashu fanafó nai cuyoá. ⁷ Ascaino ushu rananri tasha murannoashu foaiflashucái ushu futsa foaisharanima. ⁸ Ushu rananri mai shara ano saaca nan mai sharanoashu nantifi foaisharashu fimi ichapayacoin ini. Futsa cien fimiya icaino futsa sesenta aya icaino futsari treinta fimiya ini. ⁹ Ascan manmain ua nicatiroquin ua nicacahuun uhuun tsainri maton nomuran nanucoincahuun,—ato huani.

Ahuuscaquimun futsafo yoiflashon Jesús afu rafuafosí shafacafi ato tapimaniquin

Mr 4.10-12; Lc 8.9-10

10 Ascaino non afu rafua aqui fucashon yocanon, —¿Ahuuscai shafacafi ato yoitama ahuahuunoa cuscara min yorafo ato tapimashquinmun? —ishon non yocani. **11** Jesús ato cumani, —Ahuuscashomain Upa Diosin ahuun yorafo iquiniquin mato fusti tapimai. Ascan nafocai ato tapimaima. **12** Ascan tsoan Diosin tsain nicasharafain ahuun nomuran nanucoian naanfin Upa Diosin paratamari tapimashquin. Ascafia tsoan ichapama tapifiashon Diosin nicasharayamafain nan yoia cuscan aimá nanfin funoshquiquin. **13** Ascacun nan yorafo un ahuara futsahuunoa cuscara un ato tapimashquin oinfiacashon tapinonfoma. Nicafiaquiri tapinonfoma. **14** Nannori Isaías nan Diosin tsain yoimisi ipaoniton atohuunoa inon pacoai yoiqui isca huani,

“Man nicafafaifaquiai Diosin ato yoiai cuscan tapinacafoma. **15** Nan yorafoan aton ointi curushcoinyashu nicayos-mashunifo. Diosin tsain man nicamisi-fiashu nan nicama cuscarafo. Uhuun yonoshara oinfiacani nan futsoi cafis-caafo. Ascashon un ato isma cus-can oianfoma. Ascayamacanashu uqui fucuanafó un ato chaca soashonon uhuun yora sharafo iishcaqui,”

ishon Diosin yoini cuscan Isaiasin cununi.

16 Ascafia nannori Isaías cunufiani mancaí ascarama. Ascatamarocon un mato oinmana cus-can man icoinra huafain un mato yoiai cuscan

man nicacoinmisi. Ascashu maton nomuran man unimacoинna. ¹⁷ Un mato icon yoi. Man oian cuscacai uhuun Upa Diosin ahuun tsain yoimisifo futan a tanamisi futsafoanri fasi oinpaifiaquicai tsoan oinpaonima. Un mato yoimisi cuscan fasi nicapaifiacaquin tsoan nicapaonima.

Fimi ushu saamisihuunoa yoiflashon shafacafi afu rafuafo tapimani

Mr 4.13-20; Lc 8.11-15

¹⁸ Nan fimi ushu saamisihuunoa un ato yoia cuscan natian shafacafi un mato tapimai. Ascacun ua nicasharacahuun tapisharashquin. ¹⁹ Ascan nan Dios ahuun yorafo iquinai cuscan nicaflashon tapiama. Nanfomin nan ushufo fai ano pacua cuscaraoquin. Diosin tsain ato nomuran man nanufiafo nan yoshin chaca Satanás atoqui os-hon nicafo cuscan ato fiantiro afanan afohuunoa shinanonfoma. ²⁰⁻²¹ Ascano futsafoanri Diosin tsain nicaquin tau huai unimacoинyoflashu samamashta ahuun tsain cachiquiri huaa. Ascan nanfomin nan ushufo toquiri camaqui pacua cuscaraoquin. Nanfori nan ushufo toquiri camaquinoashu foafia ahuun tapo chai foama. Samamashta nai cuyotiro. Nanscarifiai nanfoancai Diospan tsain aton nomuran nanu sharafoma. Ascashon ahuara chaca finonyamarai futsafoan ato omitsisca huaino samamashta Dios cachiquiri huatirofo. ²² Ascan ushu futsafo moshafo muran pacuashu foaisharatiroma. Nanscarifiai futsafoan Diospan tsain nicaflashon ahuara nan acai cuscan fustisi shinain. Ascashon pui ichapa yafi mafo ichapa noi afi paramuquicai afanan Dioshuunoa shinantiroma. Ascaquicai Diosin

ato amapaiyai cuscan futsafo shara huatiroma.
²³ Ascafiaquin ushu futsa mai shara ano saacano foaiquin yosiashu fimi ya itiro. Nanscarifai futsafo Diospan tsain nicafain tapicanashu nan yoia cuscan aafo. Ascashon nanfoanfin futsafori Diospan tsain yoiquin icoingra huamatirofoquin. Futsan treinta iyamarai sesenta iyamarai cien yorafo icoingra huamatiroran, —ishon Jesús ato yoini.

²⁴ Afanan Jesús ato tsain futsa yoini tapinonfo. Isca huaqui, —Diosin nantifi iquinano nanscarifi aquin nocofunun ushu sharafo fana. ²⁵ Fana sharafiaquin ahuun noicasmamisiton yamu ahuun mau ano caa. Mau ifo ahuun oinmatifo oshano noicasmamisiton tashafori mau ano fana. Fanatan mau anoashu caa. ²⁶ Chipofin nan ushu shara foaicaino tashafori foaini. ²⁷ Ascano aqui fucashon mau ifo ahuun oinmatifoan yoinifo, “¿Iffon, min ushu shara min mau ano fanamamun? ¿Ahuuscaimun natian tashafori foaicaquin?” ishon yocanifo.

²⁸ “Noco noicasmamisiton acaran,” huaiton. “¿Ascan nan tashafo non tsuai fotiromun?” huaifoan. ²⁹ “Ma. Man tasha tsucaino nan fana sharafoi tsucapaiyamafiaquin man afori tsucatiro. ³⁰ Nanscanonquin. Chitunmisitian tashafo yafi fana sharafoi foaitiro. Nantian un mau yonomisifo yoishquin isca huaquin, ‘Iquisi nan tashafo tsucacahuun. Nantifi nushasharahuu coashquinon. Asca huatanfin nan fanasharafori uhuun tapasi muran ua fushotacahuun,’ ” mau ifoan yoiaran, —ishon Jesús ato yoini.

*Mostaza ushuhuunoa Jesús ato yoini
Mr 4.30-32; Lc 13.18-19*

³¹⁻³² Ascasho Jesús mostaza ushuhuunoa ato yoini ahuara futsa ato tapimashquin. Ato yoiqui isca huani,—Nocofunun ahuun mau ano mostaza ushu fanani. Rato fimi ushu futsacai mostaza ahuun ushu uhuapamashtatioma. Ascafia foaica fasi cuya itiro. Rato pushu umainti fimi charo fanacai mostazatioma. Ihui noconan rafutiro. Ascatan yosiano puiyafu ahuun tushpahuu tsaotiro. Nanscarifiai Diosin ahuun yorafo iquisi fustirasi ifiashu chipo paratama caitioran, —ishon ato yoini.

*Jesús misi farashatihuunoa ato yoini nanhuunshon Diosin nantifi yorafo iquinai cuscan tapinonfo
Lc 13.20-21*

³³ Ascan Jesús ahuara futsa ato yoini Diosin nantifi yora iquinai cuscan tapinonfo. Afanan ato yoiqui isca huani,—Diosinmain ahuun yorafo ahuusca huatiroquin un mato tapimai. Diosin ahuun yorafo nantifi ato iquifain ato yonotiro. Ainfoan farashati ichapamashta harinaya osishon camisconano farashinitiro. Nanscarifiai Diospan yorafoan nan icoinra huamafo muran-shon nantifi ato shara huatiro, —ishon ato yoini.

*Jesús ato yoiai cuscan ahuara futsa tapinonfo
Mr 4.33-34*

³⁴ Ascatan ahuarahuunoa yoiqui Jesús ato yoini tapinonfo. ³⁵ Nannori Diosin tsain yoimisiton nan Jesús yoinon pacuai cuscan cunuqui isca huani,

“Un ato ahuara futsahuunoa ato yoi ato tapimashquin. Upa Diosin nantifi onihuani chain tsoan ascara

nicayomisima cuscarafo un ato
yoishquiran,”
ishon yoini cuscacoin man aa.

*Trigo yafi faasi foaitirohuunoa Jesús shafacafi
ato tapimani*

³⁶ Ascatan yorahuanrasi anoashu cai pushu muran iquini. Ascano non afu rafuafo aqui caashon non yocani,—Ifon, min trigo muran faasi foaitirohuunoa yoia cuscacai non tapiama. Shafacafi noco yoihuu non tapisharanon,—ishon non yocani.

³⁷ Ascaiton noco cumani, —Diosifi ua nichiniquin. Un nan ushu fanamisi shara cuscara inon. ³⁸ Nan maufin nantifi manifotihuunoaqui. Ascan nan ushu sharafofin Diospan yorafohuunoaquin. Ascan faasifin icoira huamafona nan yoshin chaca ahuun yorafoquin. ³⁹ Ascan nan mau ifo noicasmamisi nanfin Satanasquin. Ascan nan fana fiaifotianhuunoafi nan manifoti cuyotirohuunoaquin. Nan fana fimisfofin Diospan oinmatifo afu nai muran icafo.

⁴⁰ Nan faasi mushashon coafo cuscan huaquin. Nan manifoti cuyoaitian. ⁴¹ Uhuun oinmatifo ufu nai muran icafo un nichishquin nantifi futsa chaca huamamisifo yafi nan chaca huafafainaifo uhuun yorafomaqui ato pashcashcani. ⁴² Ascashon nan omitsiscapanacafo chi urumanhuan muran ato potano nannoashu fasi uaicani omitsiscacoinshcani. ⁴³ Ascaino nantianri Diospan yora shara icoira huafoti aton Upa Dios

icanoashu fari chasha cuscarafo. Ascacun manmain ua nicatiroquin ua nicacahuun. Uhuun tsain maton nomurana nanucoincahuun.

Ahuara sharashta onuahuunoa cuscarafin ato yoini

⁴⁴ Nocofunu mai futsa ano caa. Nannoahuara sharashta paratama ahuun pui nuua fuchia. Ascan fuchishon nannori afanan onua. Ascashu fasi unimacoquin nan aya cuscati inanmitsashon nannoahai fia nan ahuarashta paratama ahuun pui nuuari ahuuna inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

Perla funoahuunoa Jesús ato ahuaro futsa tapimaní

⁴⁵⁻⁴⁶ Diosin ahuun yorafo ahuu cuscaramainquin afanan un mato yoiqui isca huai. Mafo inanmitsamisi cahuancacaini macush cuscara perla oshopa sharashtao funafoanfafainni. Ascashon man futsa anoa fuchia ahuun pui paratama nuua fuchishon nan aya cuscati inanmitsashon ahuun rafanan nan perla ffi ahuunacoin inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

Nushutihuunoa Jesús ato yoini ahuara futsa ato tapimashquin

⁴⁷⁻⁴⁸ Ascano nushumisiton ahuun nushuti uhuapa pochishon shiman futsa futsatapafo fini. Ahuun nushutinhuan shiman fospiano unuhuan cusumun cashon nini funi. Ascashon nan shiman chacafo nushuti murannoatucashon potani. Ascashon nan piti sharafosi shihuati murana nanuni. ⁴⁹ Nanscarifiai manifoti

cuyoaitian Diospan oinmatifo afu nai muran icafo nococashon nan chacafu yafi sharafo pashcanan huashcani. ⁵⁰ Ascashon nan chacafoti chi urumanhuan muran ato potashquin nannoashu uaiqui fasi omitsiscapashanonfo, —ishon Jesús ato yoini.

⁵¹ Ascatan afu rafuafonon Jesús noco yocaiton, —¿Un mato yoia cuscan nantifi man man tapiamun? —ishon noco yocaiton. —Ai. Min noco yoiai cuscan nantifi man non tapiaran, —non huaiton.

⁵² —Ratoran futsafoan Moisés yononi cuscan tapimamisifo nan Diosin ahuun yorafo iquinai cuscan tapiafo. Ascan nanfofin nan mafo inanmitsamisi cuscaraoquin. Mafo inanmitsamiston yorafo nan yopaifo cuscan inantiro. Ahuara shunifo iyamarai funa ato inantiro. Nanscarifiai tsoan Moisés cununi cuscan yafi un mato rama Diospan yorafohuunoa tapimanai cuscan huafain marifi man futsafo tapimatiroran, —ishon noco yoini.

*Jesús afanan Nazaret ano cani
Mr 6.1-6; Lc 4.16-30*

⁵³⁻⁵⁴ Ascano noco yoia cuscan ahuara futsa tapinonfo anaititan Jesús nan pushconi pushurasi ano nasoni. Ascatan Israelifoan aton ichananti pushu muran iquishon ato yoiaiton ahuun tsain nicacani mustairicatan yoinifo, —¿Ahuuscai na no-cofunun fasi tapi sharacoianmun? Tsoan atiroma cuscan huapaiquifin atiroquin. ¿Tsoanco Jesús ascará tapimanamun? ⁵⁵ Nanfin ihui sapa yonomiston ahuun facuquin. Ahuun ahuan María. Ahuun

ushtofori Santiago yafi José non Simón non Judas. ⁵⁶ Ahuun poifori no fu imisifo. Man nonfin Jesús onanquin. Aacai ahuama. ¿Ascan ahuuscashomun ahuamamishti huatiroquin? —icashu yoinannifo. ⁵⁷ Ascashon nannori ahuunoa shi-nanchacaquicai tsoan icoinra huapainima.

Ascaiton Jesús ato yoiqui isca huani, —Nantifi mai anoshon Diosin tsain yoimisiton yoiai cuscan nicapaitirofo. Ascafia nan cainni anoshon fusticai tsoan nicapaitiromaran, —ishon ato yoini.

⁵⁸ Ascano nannoshon icoinra huaiyamaifoan tsoan atiroma cuscan fustirasi huani.

14

Juanpan yorafounu muran iquimapacutan nani cuscan

Mr 6.14-29; Lc 9.7-9

¹⁻² Ascano nantian Herodes nan Galilea mai anoa ato niaifoan Jesushuunoa nicaquin ahuun oinmatifo yioni isca huaquin, —Nanfin Juanqui. Un tushtumayamua afanan man funia. Ascashofin Diospan curushuunshon tsoan atiroma cuscan huafafainiquin, —ishon ato yioni.

³⁻⁴ Herodes Juan rutumanataima yoiqui isca huani, —Niaifo Herodes, min ushto Felipe ahuun ahuin min fia. Ascaquicai min shara huama. Non-con shuni Moisés Diosin tsain cunuqui isca huani, “Futsan ahuin min fitiromaran,” ishon Moisés cununiran, —ishon Juanpan Herodes yioni. Ascaiton nicaí Herodes fasi sinacoinquin ahuun ranushumuafio yononi Juan achishon cunu muran iquimanonfo. ⁵ Ascashon Herodes Juan ruturiscapaifiaquicai funa rutunima yorafoanmain

Juan fuchipaiyaifoanfin. Ascashon nanfoanri yoinifo, —Juanfin Diospan tsain yoimisiquin, —ishon ahuunoa yoinifo. Ascacun Herodes shinanquin isca huani, —Un Juan rutucun ua yorafoanasca huatiroran, —ishon shinanni. Yorafoqui ratuquin Herodes Juan cunu muran iquimafashocai funa rutunima.

⁶⁻⁷ Ascano Herodes cainnitian yorafo ichananni fuuishcaquin. Ascashu ichananfoanno Herodías ahuun facu shomaya arusu aton ointaifi mononi. Nan Herodías Herodes ahuun ushto ahuin ini. Ascashu shomaya monoaino Herodes fasi unimacoinquin yoini, —¡Aicho! Min monoai cuscan un fasi miqui unimai. Ahuarashta fipaiquin ua yoihuu un mia inanon. Diosin tapia un mia icon yoiaiton min fipaiyai cuscan un mia inantiroran, —ishon yoini.

⁸ Ascashon cashon shomayaton ahua yoini. Ascacun nan ahuan yoia cuscan nasocura niaifo Herodes yoini, —Juan nan yorafo unu muran iquimapacumisi tushtuhuu. Purato naratashon ahuun mapo ua inanhun, —huaino. ⁹ Niaifon Herodes puusinima. Puusitama ahuun nomurran shinanqui isca huani, —¡Ohua! Un Juan tushtumapaima. Ascafia yorafoan un shomaya yoia cuscan man nicafo. Ascacun un asca huapaiyamafiaqui un aquicairan, —ishon shinanni. ¹⁰ Ascashon niaifoan ahuun ranushumua yononi, —Juan tushtushon ahuun mapo ua fushotahuun, —huani. ¹¹ Ascaino cashon ranushumuaton Juan tushtushon ahuun mapo purato naratashon funi. Fushon niaifo inancun nan niaifoanri shomaya inanni. Ascano shomayaton arifi ahua inanni.

¹² Ascashon afu rafumisifoan Juan nicacani focashon ahuun caya mai huanifo. Ascatan focanashu Jesusqui chaninifo.

*Jesús cinco mil nocofunufo pimani
Mr 6.30-44; Lc 9.10-17; Jn 6.1-14*

¹³ Ascashon Herodes Juan tushtuma nicai Jesús shashon tsoa icama ano cani. Jesús caa nicacani pushufoti anoashu yorahuanrasiton naman mu-fainifo. ¹⁴ Ascashu nocooquin Jesús oian yorahuan-rasi oin atohuun ramapaini. Nannoshori isininciai futsafo ato cayahuapacuni.

¹⁵ Ascano man fari caino non afu rafuafo aqui cashon non yoini, —Yorafo nichihuun. Man fari caiquin. Fonaincaniquin. Pushurasi ano yafi a chaima icafoanno ato nichihuun anoshon tushu huanonfo, —ishon non yoini.

¹⁶ Ascaiton noco cumani, —Ma. Noncai ato nichima. Mafirocon ato piimacahuun, —noco huaiton. ¹⁷ —Nonfin nuno misi siete yafi shiman rafu ayaquin, —ishon non yoini. ¹⁸ Ascaiton, —Ua fishotacahuun, —noco huani. ¹⁹ Ascashon yorahuanrasi yoini, —Nanno faasi camaqui tsaoctahuun, —ato huani. Ascatan shiman rafu yafi misi mucu fustiti tsomashon nai ari foisinifoantan Apa Dios cufinquin, —¡Aicho! Upan, mihuunshon un ato pimai. Min fasi sharacoincun, —huatan. Misi torupacutan shiman rafu ya osishon noco inanni non ato pashcanan huapanon. ²⁰ Ascashon picani mayancoinnifo. A picaquin tushu huafu non afu rafumisifoan doce shihuati fospi huani. ²¹ Nan piaifo cinco mil nocofunufoosi ini. Ainfofo

yafi facufocai non tanan huanima. Asca nan-foanri ato futan piinifo.

*Jesús unu fumancayan cani
Mr 6.45-52; Jn 6.16-21*

²² Ascashon ato pimaquin anaititan Jesús noco yoiquin isca huani,—Shashon rufofo oquiri pocui focahuun. Un na yorafo ato nichiyonon,—ishon noco yoini. ²³ Ascashon man ato nichiqui anaititan arus fusti machi ano caashon Apa Dios fu tsainni. Man fari caino arus fusti ini. ²⁴ Ascatan afu rafuafo shasho caino ian nushmancayan no-coqui fuuhuan noconi. Ascashu ian fuchoqueuin noco catima huani.

²⁵ Ascashu man faquishiaiino non oian Jesús ian fumancayan nocoqui ofiaitocai non onannima. ²⁶ Onanshma ratucoin non fisini. “Yoshiran,” icashu non fisicaiton. ²⁷ —Unqui. Ratuyamacahuun,—ishon Jesús noco yoini.

²⁸ Ascaiton Pedronun yoini, —Ifon, minmainquin uarifi mia ano cunahuu. Urifi un ian fumancayan canon,—huaiton. ²⁹⁻³⁰ —Ohuu,—Jesús huaino Pedro shasho naquinoashu fotopacucahuun ian fumancayan Jesús ari caafiaiin oian fuunhuaquin ian fuchoaition oin ratui iquipacucahuunqui yoini,—Ifon, ua ari mutsoinfoanhun,—Pedronun huani. ³¹ Ascaiton Jesús samamashta mutsoinfoanquin yoini, —Miancai ua icoingra huacoinnama. Ahuuscaquimun mian icoingra huamaquin,—ishon Jesús yoini.

³² Ascantan nan rafu shasho muran nanuinfoanafono fuu nishmapacufoanni. ³³ Ascano non shasho murannoafu fasi aqui unimacoinquin non

yoini, —Iconfinquin min Diospan Facu, —ishon non yoini.

Genesaret anoshon Jesús isinincaifo ato caya huapacuni

Mr 6.53-56

³⁴ Ascatañ ian pocufaini Genesaret ano non noconi. ³⁵ Ascashu non nocoaiton nannoafaoan samamashta Jesús onancashon a chaima icafori ato tapimanaino nicafuracani fucaquin aton yora isinincaifo Jesusqui ihuunifo. ³⁶ Ascano fucashon Jesús yoinifo, —Noco yora isinincaifo min sahuuti cupanan fusti ato muumahuu cayanonfo, —ishon yoinifo. Ascatañ ahuu sahuuti muuncanashu cayapacunifo.

15

Nocofunun ahuara chaca huatiro cuscan

Mr 7.1-23

¹ Ascano Fariseofo yafi Moisés cununi cuscan tapimamisifori Jerusalén anoashu Jesusqui funifo. ² Fucashon yoinifo, —¿Ahuuscaimun nocon shunifoan piataifoma muchoquimupaonifo cuscacai mifu rafuafoanasca huapaicanimaran? —ishon yoiaifoan. ³ Jesús arifi ato yocani, —Ascan ahuuuscai marifi maton fuyamisi fustisi man tanapaiyain. Ascashofin Diosin yononi cuscan huatamarocon nan maton shunifoan amaquiri yosimisifo cuscan marifi man nansca huamisiquin. ⁴ Ascacun Upa Diosin yonoqui isca huani, “Maton upa yafi uhua nicasharafain ato shara huacahuun. Ascan tsoan apa iyamarai ahuaqui tsain chaca huacun ato rutumacahuun,” ishon yononi. ⁵⁻⁶ Nannori yononifianicun manfin

noco yorafo yoiquin isca huamisiquin, “Maton upa iyamarai mato uhua man yoiqui isca huatiro, ‘Nantifi uhuun pui un aya cuscan mun Dios inan. Ascacun un mia ahuara inanpaifiaquicai un mia inainmaran,’ ” ishon yoiquicai mato upa yafi uhua man afanan ahua inantiromaran, ishon man fasi ato amaquiri yoimisi. Anori yoiquicai Diosin yononi cuscacoin man aimar. Ascaquifin nan mato fuyamisi fusti man tanaqui. ⁷ Ascashufin man paramitsamisifoquin. Nan Diosin tsain yoimisi Isaías inon pacuai cuscan icocoinquin matohuunoa yoiqui isca huani,

⁸ “Nan yorafoan uhuunoa yoisharamisi-flashocai aton nomuranshon ua shinancoianfoma. ⁹ Ipaitsi ichananshu fanaincaí ua cuficaní. Yorafo tapimamisifo cuscacai Diosin tsaincoinma. Nanfoan aton nomuran shinainfo cuscan futsafori yosimisiforan,”

—ishon Isaías cununi.

¹⁰ Ascashon nannori Fariseofo yafi Moisés cununi cuscan tapimamisifo ato yoitan Jesús yorahuanrasi cunaquin isca huani, —Uqui fucahuun un mato yoinon. Ua nicafain un mato yoiai cuscan tapisharashcaquin. ¹¹ Ahuarao non piatocai noco ointi chaca huatiroma. Nocofununfin ahuun nomuranshon nan shinain cuscan yafi nan yoiai cuscan chaca huatiroquin, —ishon ato yoini.

¹² Ascaíno non afu rafuafó aquí cashon non yocani; —¿Ifon, man min tapiamun nan rama min Fariseofo yoiai cuscan nicacani sinacaniran? —ishon non yoini. ¹³ Ascaiton noco

yoiqui isca huani, —Mau ifoancai ahuara cha-cafo fanatiroma. Ascatama afin foaicun tsu-cashon potatiro. Nanscarifi aqui uhuun Upa Dios nai muran icatocai nan Fariseofo yonoama futsafo ahuun tsain tapimanon. Ascacun nanfo chipo omitsiscapanacafo muran ato potashquin.

¹⁴ Ascacun nanfo shinanyamacahuun. Fushocai afu fusho raqui iyotiroma. Iyopai afu shato mu-ran pacutiro. Nanscarifiai Fariseofoancai Diosin tsain tapishoma futsafo yositiroma atofu funotiro. Ascashu Dios ari tsoa nocopacunacafomaran, —ishon ato yoini.

¹⁵ Ascaiton Pedronun yoini, —Min ato yoia cus-can shafacafi noco tapimahuun, —ishon yoini.

¹⁶ Ascaiton Jesús noco yoiqui isca huani, —¿Ascan marifimun man nicasharama?

¹⁷ ¿Man tapiamamun ahuara man piacai mato shaqui muran nituima? Ascatama manrocon aya poitiro. Ascan nantocai mato chaca huamatiroma.

¹⁸ Ascashon mato nomuran man shinanchacai cuscan huafain yoiashuri man chacacoin itiro. ¹⁹ Ascano aton nomuranshon ahuara chaca shinanco cuscan nanscacoin huatirofo. Shinanchacafain rutumitsamisi icain aton ahuinma fu nocofunufo icaifoanno ainfofori nanscarifiaifoanno.

Ascashon ahuarari onufain futsahuunoa ahuara chaca yoiqui parafain roanmitsamisi itirofo.

²⁰ Nan chacafoanfin yorafo chaca imatiroquin. Ascan nan noco shunifoan apaonifo cuscan muchoquimushoma non piatocai nocon nomuran noco shinanchacamatiromaran, —ishon Jesús noco yoini.

*Ainfoan patasharinoaton Cananea anoaton
Jesús icoinra huani
Mr 7.24-30*

²¹ Ascacaini Jesús nocofu anoashu cai nan pushurasi Tiro ano yafi Sidón ano cani. ²² Nannoashu Cananea anoa ainfo Jesusqui noconi. Nocoshon yoini, —Ifon, minfin David ahuun funaquin. Uhuun ramapaihuu. Uhuun facu ainfoshta fasi omitsiscay. Yoshin chaca ahuun nuushon omitsisca huamisi. Uhuun facu ua caya huashopun, —ishon yoiriani. ²³ Ascaiton nicafiaquicai Jesús cumanimal. Ascaiton non afu rafuafoan yoini, —Ifon, na ainfoan mia yocariaquin noco fucash huaiquin nichihuun, —ishon non yoini. ²⁴ Ascashon Jesús ainfo yoini, —Uhuun Upa Diosin ua Israel ano fusti nichini. Nanfomain nan chashoanun facu funoa cuscarafocun. Ascan uacai caifo futsa ano nichinima, —huaiton.

²⁵ Nicaiyainfo Jesús naman ratoconun mai chachipacufoan yoini, —Ifon, uhuun facushta ua cayahuashopun, —huani. ²⁶ Ascaiton Jesús afanan cumani, —Apacai ahuun facufoan tushu pashnafo inantiroma. Ascaracai sharama. Nanscarifi aqui Upa Diosin ua yonoa cuscan un Israelife fusti un shara huashonon. Ascacucai un caifo futsa ano catiroma ato shara huashoshquin. Un asca huaino nan Israelife funotiro, —ishon yoiaiton. ²⁷ Ainfoanri yoini. —Icon, Ifon. Ascafia ahuara piqui tushu huafu sapa camaquinoashu potomishti pacuaiton pashnafoan pitirofo. Nanscarifi aquin Upa Diosin mia Israelife ano nichini min ato shara huashonon. Ascafia mani futsafori miqui nocoaifoan nanfori min ato caya

huatiro. Ascashon min ato shara huashoainocai Israelifori funotironmaran,—ishon yoiaiton.²⁸— Min ua fasi icoinra huacoinna. Ascacun min ua yoca cuscan un mia ashoiran,—ishon Jesús nan ainfo yoini. Asca huatanaino ainfo ahuun facu cayariscatani.

Jesús yora ichapa isinincaifo ato caya huapacuni

²⁹ Asca huatan anoashu Jesús no fu cai Galilea ian cusumunri cani. Nannoashu cai machi ano inashu tsaoni. ³⁰ Ascano yorahuanrasi aqui funifo. Fucaquin isinincaifo ihuunifo Jesús ato caya huanon. Isinincai futsa futsatapafo. Futsafo nipaiqui ranainfo ihuufain fushofo ihuufain ahuun caya mumamafo ihuufain tsaintromofo ihuufain isinincai futsafori Jesusqui ihuunifo. Ascacun nantifi Jesús ato cayapacuni. ³¹ Ascashon ato caya huaa oincani mustairicatan yorafo afi ranan yoinancaquin yoinifo,— Noncai iscara oinyomisima. Tsaintromofo natian tsaincani. Ahuun caya mumamafori natian man niisharafo. Nipaiqui ranainfori natian niisharatirofo. Jesusfin ahuamamishti huatiroquin. Israelifoan nocon Dios fasi sharacoinran,—ishon yoinifo.

Jesús cuatro mil nocofunufo pimani

Mr 8.1-10

³² Ascatac non afu rafuafu nooco cunashon Jesús nooco yoiqui isca huani,—Un na yorafo-huun ramapai. Ufu rafu non fusti oshatan icafo. Afanan tsoa tushu ayama. Ahuashtacai picanima. Ascacun uncai ato tushuoma nichipaima. Fasi fonaincani shaca fuatiroforan,—ishon nooco

yoini. ³³ Ascaiton non cumani, —Nuno tsoa ica-manocai non tushu fuchitiroma na yorahuan-rasi pimashquin, —ishon non yoiaiton. ³⁴ Noco yocani, —¿Ahuuti misi man ayamun? —noco huaiton. —Siete non shiman ranananri non ayaran, —ishon non yoini.

³⁵ Ascaiton Jesús yorafo yoiqui isca huani, —Nanno tsaoahuun, —ato huani. ³⁶ Ascatan ato yoia cuscan tsaoafoanno Jesús misi siete non shiman rananri finifoantan Apa Dios cufini, —¡Aicho! Upan, mihuunshon un ato pimai. Min fasi sharacoinquin, —huatan. Misi yafi shiman torupacutan non afu rafuafo noco inanni. Ascacun yorahuanrasi norifi non ato pashcashopacuni. ³⁷ Ascashon nantifiton picani mayancoin-nifo. Ascano man piqui tushu huafo siete shihuati non fospi huani. ³⁸ Ascan nan piaifo cuatro mil nocofunufoosi ini. Ainfofo yafi facufocai non tanan huanima. Ascafia nanfoanri ato futan pi-inifo. ³⁹ Ascatan Jesús nantifi yorahuanrasi nichitan. Noco nanuquifaini cai mai futsa ahuun anu Magadán ano no cani.

16

*Fariseofo futan Saduceofoan Jesús yocanifo, —
Tsoan atiroma cuscan noco ismahuu, —huanifo
Mr 8.11-13; Lc 12.54-56*

¹ Ascashu Magadán ano man non nocoano Fariseofo yafi Saduceofori Jesusqui funifo. Ascano fucashon yocanifo. —Minmain Diospan facucoinquin nan Diosin nai aria icahuunshon tsoa atiroma cuscan noco ismahuu non mia icoingra huanon, —ishon yoinifo. Ahuunoa

ahuara chaca ato niaifofo yoipaicaquin.
² Ascaifoan Jesús ato cumani, —Manfin yoiquin isca huamisiquin, “Man fari caino imi poshnan. Ascan funamanrifi nai shara itiroquin,” ishon man yoimisi. ³ Ascashon shafaino nai choshtacun man yoimisi, “Nai choshtapan fupoa. Ascan natian oi fuiran,” man huamisi. Ascashon nai foisquin man tapitiro oi fuyamaraimain ahuuscaquin. Ascan ahuuscaquitsi Diosin mato yoiai cuscan man icoinra huapaima. Natian ahuara ahuuscarai cuscacai man tapiama.
⁴ Man ua icoinra huayamafain chacafashion man ua yocai. Ascafia tsoan atiroma cuscan un Diosihuunshon huatirofiacai un mato ismaima. Man oinpaifiaiton. Nan Diosin Jonás ani cuscan nan fusti man chipo oinshquiran, —ishon Jesús ato yoini. Ascatan atomaquinoashu cani.

Fariseofoan yositirofo cuscahuunoa

Mr 8.14-21

⁵ Ascano man ian pocufaini cashon non shinanni, —Non tushu ointiaquimacuranaran, —ishon non yoini. ⁶ Non ascaiton onanshon Jesús noco yoini, —Oinfain. Fariseofo futan Saduceofoan aton misi farashati cuscara fiyamacahuun, —ishon noco yoaiton. ⁷ Nicai nofi ranan non yoinanni, —¿Ahuuscaimun Jesús noco yoiqui isca huaiquin, “Fariseofo futan Saduceofoan aton misi farashati fiyamacahuun,” noco huai? Non tushu fucuma racan noco isca huaiquin, —icashu non yoinanni.

⁸ Ascano nan non yoiai cuscan onanshon Jesús noco yoini, —¿Ahuuscaquimun tushuhuunoasi man

yoicai? Mancai ua icoinra huaa sharacoiantaima.
⁹ Ascashon mancai tapisharataima. ¿Un muci fustiti misihuunshon cinco mil nocofunufo un pimaita nan man shinainmamun? ¿Ahuuti shihuati fospia tushuita man ointiaquimamun? ¹⁰ ¿Nan siete misihuunshori un cuatro mil yorafo pimaita nanri man man ointiaquimanamun? ¿Ahuuti shihuati fospia tushuitamun man ointiaquimanamun? ¹¹ ¿Ascan ahuuscrai un mato tushucoinhuunoa yoiyamafaiton man tapimamun? Unfi tushuhuunoa yoi cafisca huaquin nan Fariseofo futan Saduceofoan yosiaifo cuscahuunoa un mato yoiqui,—ishon noco yoini. ¹² Ascashon Jesús noco yoiai cuscan nicaquin non tapini tushucoinhuunoa yoitama naan Fariseofo futan Saduceofoan noco amaquiri tapimapaiyai cuscan Jesús noco yoini.

*Pedronun, —Jesús Diospan facuran, —huani
 Mr 8.27-30; Lc 9.18-21*

¹³ Ascatan Jesús no fu mai futsari cani. Nan mai ahuun anu Cesarea Filipo. Nanno nocoshon Jesús noco yoini,—Unfin Diospan Facufiashu un nocofunucoinquin, —ishon yoitan afanan noco yocani, —¿Yorafoan shinamun un tsoaquin? —ishon noco yocaiton. ¹⁴ Non cumaquein isca huani, —Futsafoan yoiafin min Juanquin. Nan yorafo unu muran iquimapacumisi, ishon yoiaifoanno futsafoanri yoiquifin min Eliasquin. Ascano futsafoanri yoiafo minfin Jeremiasqui. Ascan futsafoanri yoiafo minfin nocon shunicaifo Diosin tsain yoimisi futsa afanan funiaquin, —ishon noco yoiaiton. ¹⁵ Afanan noco yocani,

—¿Asca marifi man shinanmun un tsoaquin?
 —noco huaiton. ¹⁶ Ascaiton Pedronun cumani,
 —Minfin Cristoquin. Nan Diosin nipanacaton
 mia catonni min ahuun facuran, —ishon yoaiton.
¹⁷ Ascaiton Jesús cumani, —Simón, minfin Jonás
 ahuun facuquin. Diosin mia noiquin mia shara
 huaa. Rato nocofununcai mia tapimanama un
 Diospan facu. Uhuun Upa Diosin nan nai muran
 icaton mia tapimana.

¹⁸ Un mia afanan yoi. Minfin Pedroquin,
 —ishon Jesús yoini. Ascan Pedrofin Israeli
 tsainman toquirininhuan. Tsoan putsiquitiroma.
 Ascasho Jesús afanan yoiqui isca huani, —
 Min yoia cuscahuunshon futsafoan aarifi
 icoingra huashquicani. Ascaifoan uhuun yorafo
 un ato imashquin. Yoshin chacafoan aaton
 curush huahuunshon ato namapaifiaquicai
 ato shatuyamafain aato finontiroma. ¹⁹ Tsoan
 shafi ya fupoti fuputiro yorafo pushu muran
 iquimashquin. Nanscarifi aquin un mia yonoi
 uhuunshon min yorafo uhuunoa yoitiro uhuun
 yorafo inonfo. Ascashu uhuun Upa icano
 iquitirofo. Min yorafo yosiae cuscan tsoa
 nicacasmai uhuun yora itiroma Upa Dios fu
 ipashcaquin. Nannori Diosin yoini. Ascan min
 yorafo yosiae cuscan tsoa icoingra huai uhuun
 yora itiro Upa Dios fu ipashquin. Nannori Upa
 Diosin yoini. Ascacun un mia yonoi min futsafo
 tapimatiro Upa Dios icano iquinonfo. Un mia
 shafi inain cafisca huai min ato fupushotiro
 iquiashu afu ipanonfo. Ascashon tsoan min yoiae
 cuscan icoingra huayamashocai iquitiroma afu

ipashquin. Ascan tsoan min yoiai cuscan icoinra huacoinnashu afu ipashquin, —ishon Jesús Pedro yoini. ²⁰ Ascatañ non afu rafuafo futsafori noco yoiqui isca huani, —Unfin Cristoquin tsoa yoiyamacahuun, —noco huani.

—Unfin chipo naashquicai, —ishon Jesús ato yoini

Mr 8.31–9.1; Lc 9.22–27

²¹ Ascatañ nantian yafi nan achiaifotian Jesús noco shafacafi yoiqui isca huayofafainpaoni, —Un Jerusalén ano cai. Nannoshon nocon niaifo-foan ua omitsisca huafain ua ato rutumafiafo osha rafu non fustitan un afanan furnishquiran, —ishon noco yoini. ²² Ascaiton Pedronun Jesús mutsofaitan yoini, —Ifon, ascayamahuu. Miacai tsoan rutupacunacama, —huaiton.

²³ Jesús ifiacucuhuan Pedro yoini, —Satanás catahuun. Min ua amaquiri shinanchacamapai. Upa Diosin shinain cuscacai shinantama nan no-cofunufoan shinainfo cuscan min shinanran, —ishon Jesús yoini.

²⁴ Ascatañ non afu rafua futsafori noco yoiqui isca huani, —Tsoan ua tanapaisharaquicai afi apaiyai cuscan huatiroma. Ascatañ nan un yoiai cuscacoin huatiro. Ascashon shinanqui isca huatiro, “Ua omitsisca huafiaifoanno uncái uhuun Ifo potapacunacama. Ahuunshon ua rutufiaifoanno un tanaqui unupacunacaraman,” ishon man shinantiro. ²⁵ Ascan tsoan shinanqui isca huai, “¡Ohua! Un Jesús tanaiton raca ua omitsisca huacanicati,” ishon shinanquin uhuun tsain cachiquiri huaa. Nanscara yorafo

naashu omitsiscapanacafo. Ascan tsoa uhunoashu omitsiscacai naa. Nanscara yorafofin nacanashu ufu isharapacunacafoquin. ²⁶ Ascan ratoran futsa nantifi manifoti anoafu ahuara fia ahuunacoin ifiashu amaqui naino nantifi ahuunafo funotiro. Ascashu nantifi ahuuna iyopaonifia omitsiscapanacafo muran cainocai afanan ahuashta itiroma. Ahuaracai Dios inantiroma afu ipashqui.

²⁷ Ascatan un chipo nai murannoashu mai ano fotoaino nan uhuun Upa cuscaracoin iishqui. Ascashu un chasha curanaino uhuun oinmatifo ufu nai muran icafo ufu fotoshcani. Nantianri un nantifi yorafuan aton niaifocoin iishquin. Ascashu nan yorafuan acafo cuscan un ato inanpacushquin. Nan shara huamisifo un ato inansharafain un ato unimamashquin. Ascan nan chaca huamisiforai un ato ahua inansharashquima. ²⁸ Ascacun icon un mato yoi. Man futsa nuno ufu niaton naataishoma un maton niaifo Upa Dios cuscaracoin un icaiton man oinshquiran,—ishon Jesús noco yoini.

17

*Jesús fianananriscatani
Mr 9.2-13; Lc 9.28-36*

¹ Ascano man seis osha finontan Jesús Pedro non Juan non Santiago machi cuya pochinishon ato iyoni. ² Ascan nannoashu aton ointaifi Jesús ahuun yora mumacoin fianananriscatanaino ahuun fusori fasi chashacointani.

Nan fari chashai ointsa. Ahuun sahuutiri oshopa-coin nan yoa rama furoa ointsa ini. ³ Ascaino nantianri Moisés yafi Elías aqui niriscatanifo. Ascashu nan rafu Jesús fu tsaincaiton oinnifo. ⁴ Ascaiton Pedronun yoini, —Ifon, nuno non icashara itiro. Man ascapaiyaiton un mato tapasi rafu non fusti huashotiro. Mina futsa non Moisésna futsa non Eliasna futsa un mato ashotoran, —ishon yoini.

⁵ Ascashu Jesús fu tsaincaino coin osho shara-coin atoqui cuyopacuni. Ascaino coin murannoa oi nicanifo yoiqui isca huaiton, —Nanfin uhuun Facuquin. Un fasi ahuun noi. Nanfin un catoanquin. Un aqui unimacoin. Asca-cun a nicacoincahuun, —ishon Upa Diosin yoini. ⁶ Ascaiton nicacani fasi ratucoinca fuopacu-foannifo. ⁷ Ascaifoan Jesús ato pumanqui yoini, —Funicahuun. Ratucaquima, —ishon ato yoini. ⁸ Ascaiton foisinifoanquin oianfo Jesús fusti nia ini.

⁹ Ascata machi pochininnoashu fotoshon Jesús ato yoiqui isca huani, —Nan man rama oian cus-can tsoashta yoiyoyamacahuun. Nan un naashu afanan funiano man rama oian cuscan man yorafo yoitiroran, —ishon ato yoini.

¹⁰ Ascaiton nicacaquin afu rafuafo yocanifo, —Ascan ahuuuscaquimun Moisés cununi cuscan tapimamisifoan noco yoimisifo isca huaquin, “Nocon Numamisi Cristo nan Diosin catoan nocoqui oataima rufofo Elías oshquiran,” ishon noco yoimisifor? —huaifoan. ¹¹ Jesús ato yoini, —Icon. Elías rucun oitautiro. Oshon nantifi ato imasharapai aton chaca shatunonfo. ¹² Ascan man ofiacucai tsoan onannima. Nan chaca

huapaiyaifo cuscan fusti nan chaca huanifo. Nanscarifi aquin ua omitsisca huashcaniran, —ishon Jesús ato yoini. ¹³ Ascaiton nicacani afu rafuafoan shinantani nan Juan yorafounu muran iquimapacumisihuunoa ato yoiai cuscan tapinifo.

Jesús furonanfacuhuunoa yoshin chaca nuua caya huani

Mr 9.14-29; Lc 9.37-43

¹⁴ Ascatañ machi anoashu fotocuranaino yorahuanrasi aqui noconifo. Ascaino nannoshon nocofunun ratoconun mai chachipacufoan Jesús yoini, ¹⁵ —Ifon, uhuun facuhuun ramapaihui. Yoshin chaca ahuun nuushon fasi omitsiscamai. Chii muran potafain unu muranri potatiro. ¹⁶ Uhuun facu mifu rafuafo ano un iyofiacai tsoan caya huama, —ishon yoiaiton. ¹⁷ Ascaiton Jesús non afu rafuafo nocoyoini, —¡Ohua! Mancai ua icoinra huacoinnama. Man fasi amaqiri shinamisi. ¿Ahuutia un matofu icamun man ua nicayamacaiyai? —ishon nocoyoini. Ascatañ facun ahuun apa yoini, —Min facu ua ihuushonhuun, —huani. ¹⁸ Ascaiton furun ihuushocun Jesús yoini, —Minfin yoshin fasi chacacoinquin. Na facumaquinoashu catahuun, —ishon Jesús curushcain yoiaino cayariscatani.

¹⁹ Ascatañ non afu rafuaftosi Jesús fu tsaintan non yocani, —¿Ahuuscaimun norifi non yoshin chaca facumaquinoa potamaquin? —ishon non yocaiton. ²⁰ Noco afanan yoini. —Manfin ichapama ua icoinra huaquin. Ascacun un mato icon yoinon. Nan mostaza ushu uhuapamashtacoinfia foaicashu yosia uhuapacoin itiro. Nan scarifiai man ua ichapama icoinra huaquin tau

huatiro. Ascan chipo uhuun tsain maton nomuran nanucoinshon man ua fasi icoinra huaqui finacointiro. Ascashon man machi yoitiro shucuaitahuun man huaino shucucaini futsa ano catio. Ascaino ua icoinra huacoинshon nan man apaiyai cuscacoin man huatiroquin.²¹ Ascan man Upa Dios cufiyanan piqui tunuyamashocai nan na cuscara yoshin chaca man potatiromaran, —ishon Jesús noco yoini.

*Jesús nashquiai cuscan afanan yoi futsani
Mr 9.30-32; Lc 9.43-45*

²²⁻²³ Ascata Galilea ano nocofu caquin afanan Jesús noco yoiquin isca huani, —Un mato yoimisi cuscan afanan un mato yoi. Futsan ua ato achimashquin ua rutunonfo. Ascafia osha rafu non fustitan un afanan mai murannoashu funishquiran, —ishon Jesús noco yoini. Ascaiton nicaquin non fasi shinancoinni nocon nomuran noconi.

*Israelifoan pui inantiro cuscan Dios fu tsainti
pushu cushusharanonfo*

²⁴ Ascata nannoashu non cai Capernaum pushurasi ano non noconi. Nanno non nococun nan Dios fu tsainti pushu murannoa pui fimisifoan Pedro yocanifo. —Man min tapia nocon caifoan faritifi pui inanfo Dios fu tsainti pushu muran yonoafoan nan yopaifo cuscan ahuun finonfo. ¿Ascan mato Ifo Jesús arifi man inanmisimun? —ishon Pedro yocaifoan.

²⁵ Pedronun ato cumani, —Aifain. Naanfin inanmisiquin, —ishon ato yoini. Ascashu Jesús

man pushu muran iquiano Pedro arifi iquini. Ascaiton Jesús Pedro yoini. —¿Maifoti anoa niaifo-foanmun ahuun caifocoin pui fiapai iyamarai mai futsa ariafo yocaiqui? ¿Pedro,asca min raquiri shinainmun? —ishon Jesús Pedro yocaiton. ²⁶ — Mai futsa ariafo frantiroran, —ishon Pedronun cumani. ²⁷ Ascaiton yoini, —Min ua cuma cuscan iconfia non na pui fimisifo nocouqui shi-nanchacamapaima. Ascacun ian ano catahuun shuamaquin shiman fishquin. Ascashon ahuun shaqui muranno toro fuchishon min fitiro uhu-una yafi mina nan Dios fu tsainti pushu muranno pui fimisifo nocohuunshon ato inanshquin, — ishon Jesús yoini.

18

*Ratotocaimun Dios icari fasi finoncoianquin
Mr 9.33-37; Lc 9.46-48*

¹ Ascaiton non Jesús yocani. —¿Ifon, ratoto-caimun Dios icari fasi finoncoianquin? —ishon non yocaiton.

² Jesús facu cunani, —Facushta, nuri ohuu, — huaino ocun ato nastui nimani. ³ Ascashon ato yoini, —Un mato icon yoi. Man shinan futsaya-mashu nan facu cuscara man iqui. Man ascaya-macai Dios icari man noconacama. ⁴ Ascacun na facu apa yafi ahua nicafain icoindra huatiro cuscan ratoran futsan ua icoindra huacoinnashu nanfin uhuun Upa Dios icariashu fasi finoncoian iishquiquin. ⁵ Asca ratoran futsan uhuunshon facufo shara huafin nan uari shara huai cafisca huai.

*Futsafoan noco chaca huaquinaino fasi musu-
coin*

Mr 9.42-48; Lc 17.1-2

⁶ Ascafia ratoranfoan ua icoinra huafuna futsan chaca huamai nancaifin fasi onaintimaquin finacoinquin. Chaca huamataima toquiriya tunushushon unu noacoin muran potafin shara icuanaquin. ⁷ Ascano nan icoinra huamafoan futsafo chaca huamamisi. Ascafia nanfocaifin fasi omitsiscacoinshcaniquin. Ascashon mato chaca huamapaifafaincani. Ascafia nan futsa chaca huamafocaifin fasi omitsiscai finacoinshcaniquin. ⁸ Ascano mato mucuman man chaca huacun mushatumushon potacahuun afanan chaca huashquima. Man raquira caquin chaca huashon mato tau shatuhuu potashquin afanan chaca huashquima. Man mumamafiaflashu Dios icano caafin sharacaiqui. Mumafiaflashu man omitsiscapanacafo muran cacuana. Nanno chii urumanhuan matsinacama. ⁹ Nanscarifiai ahuara oinquin chaca huashon mato furo tsucahuu potashcaquin afanan chaca huashquima. Niyoashu furo fustiya man Dios icano caafin sharacaiqui. Ascan niyoashu furo rafuya man omitsiscapanacafo muran cacai sharama. Nanno chii urumanhuan matsinacama.

*Chashoan fusti funoahuunoa Jesús ato ahuara
futsa tapimani*

Lc 15.3-7

¹⁰ Facufohuunoa isca huaqui shinanya-macahuun, “Na facucai ahuamaran,” ishon atohuunoa shinanyamacahuun. Un mato cayacafi yoi Upa Diosin ahuun oinmatifoan facufo cushusharafafainmisifo. Nan oinmatifori

Upa Dios fu ifafaincani. ¹¹ Ascacun nantifi yora funoafu numayoifin un oaquin. Ascashon un aton chaca soashona isharapacushanonfo un oni.

¹² Ascano un mato yoinon. Ratoran futsa cien chashoan ayafiano fustishta amaqi funoano atirifi nan noventa y nueve faasi fununun potay-ofaintio a fusti funoa funayoicaquin nan fuchi-aitian. ¿Ascan man ahuu cuscara shinantiromun? ¹³ Ascashu noventa y nueve ahuun chashoanfoqui unimafiaicai nan funoa fusti fuchiaquicaifin fasi unimai finacoinquin. ¹⁴ Nanscarifiai maton Upa Dios nan nai muran icatocai nan ua rama icoinra huafu fustishta funopaima.

—*Ahuuscashumain Diospan yora rafu raunantirofoquin, —ishon Jesús ato yoini*
Lc 17.3

¹⁵ Ascacun tsain futsari un mato yoi. Ua icoinra huaa futsan mia chaca huacun aqui cashon mia chaca huaa cuscan nan fusti yoihu. Min yoiai cuscan nicashquin yoinon, “Ai. Mian yoia cuscan icon. Un mia chaca huaa. Ascacun ua rau huapun,” ishon yoitiro. Ascaquifin mihu-unoashu afanan Diosqui nasoquin afanan mifu rafushquin. ¹⁶ Asca min yoiai cuscan mia nicacas-maiton icoinra huaa fusti iyamarai rafu iyohuu nan nocofunun yoiai cuscan nicaquin arifi icoinra huanonfo. ¹⁷ Ascafia nan rafuri nicapaiyamaiton icoinra huafu ichanainfotian nañnoshon nantifi tapimahu. Asca nan ichananfori nicacasmaiton nanfoan yoitirofo, “Aacai afanan Diospan yoracoin cuscaramaran,” ishon.

¹⁸ Ascacun un mato icon yoi. Ahuara man nunoshon yoia cuscan arifi Dios nan icanoshon

nannori yoi. Nanscarifiai man ahuara nunoshon yoiyamaino arifi Dios nan icarishon yoitiroma. ¹⁹ Afanan un mato yoi. Man rafu nuno mai ano ichananshon nannori rafu shinanqui man ahuara yocaiton nan uhuun Upa Dios nai muran icaton mato ashoshqui. ²⁰ Ascashu rafu iyamarai rafu non fusti yora ua icoinra huashu ichanainfoanno urifi un atofu ichanainran, —ishon Jesús noco yoini.

²¹ Ascaiton Pedronun yocani —¿Ifon, futsan ua chaca huafafainaitomun un rau huaquin ahuuti huatiroquin? ¿Siete un rau huaquin huatiromun? —huaiton. ²² Jesús cumani, —Ma. Siete huaquima. Nan mia chaca huafafainaiti min rau huatiroran, —ishon yoini.

Oinmatinin futsa rau huapainimahuunshon ato yoini

²³ —Ascacun un mato yoiai cuscan nanfohunshon man tapitiro ahuu cuscaramain Diosin ahun yorafo iquifain ato yonotiroquin. Isca huaquin mato tapimai. Niaifoan ahun oinmatifo cunani nan niaifo cuscan inanonfo. ²⁴ Ascano nan oinmati futsan ahun niaifo fasi ichapacoin millones nificun aqui ihuunifo. ²⁵ Nan nifian cuscacai ahua inantiro inima. Ascacun ahun niaifoan yoiqui isca huani, “Min ua ahua inantiroma. Ascacun un mia niaifo futsa inain min ahun yonomati inon. Nanton mihuun rafanan ua pui inanon. Ascacun un mia inanfain min ahun yafi min facufo non min mafofori nantifi min aya cuscan un inanmitsai ahun rafanan min ua nifian cuscan fiishquin,” ishon niaifoan

yoiaiton. ²⁶ Nicaquin oinmatinin ahuun ratoconun mai chachishon yoiqui isca huani, “Ifon, uhuun ramapaihuu. Funayamapun. Un mia nifian cuscafin un mia chipo nantifi inainqui,” ishon yoini. ²⁷ Asca huaiton nicaí niaifo ahuun ramapaiquin yoini, “Afanan ratuyamahuu. Nantian min ua nifian cuscan un afanan shinainma. Min ua inanyamafaiton nantifi un soai min ua afanan nifinonma. Ascacun casharatahuun,” huani.

²⁸⁻²⁹ Ascano niaifoan ahuun pushu murannoashu caqui afu oinmati futsa fuchini. Nantori nan ichapamashta nifian ini. Shafa fusti yonona nifian ini. Ascafiajuncun aqui nocoshon tumosfain achishon yoini. “Mian nifian cuscan ua inanriscahuu,” huaiton ratioconun mai chachishon yoini, “Funayamapun. Un mia inanon,” huani. ³⁰ Asca huafiajtocai futsa manapainima. Ascataama fut-sanrocon cunu muran iquimani nan nifian cuscan inaintian amuran iyeron. ³¹ Ascaiton oincani oinmati futsafo fasi ahuun ramapaicoinnifo. Ascano focashon nan acaiton oian cuscan niaifoqui chaninifo. ³² Ascano focashon yoiaifoan nicaquin niaifoan ahuun oinmati cunashon yoini, “Minfin fasi chacacoinquin. Mian fasi ichapacoin nififashon min yoiqui isca huaa, ‘Ifon, manayopun. Un mia nifian cuscan un mia inanon,’ ishon mian yoiaiton un mia nantifi soashona. ³³ Ascacun un mihiun ramapaia cuscan nanscarifi aqui mifu oinmati futsa min ahuun ramapaia shara icuana. Ascataamarocon min ahuun ramapaiamaran,” ishon niaifoan yoini. ³⁴ Ascashu fasi sinacoinquin niaifoan oinmati cunu muran iquimafain fasi on-

aintimashqui. Ascashon ahuun oinmatifo yonoqui isca huani, “Nan ua nifian cuscan nantifi ua inanyamaiton cunu muranshon cainmayamacahuun,” ishon nan yora omitsisca huamisifo ato huani.

³⁵ Nanscarifi huaquin ratoran futsan mato chaca huafiacun man ato rau huayamaino niaifoan ahuun oinmati chaca onaintimana cuscan huafain nanscarifi aquin nan uhuun Upa Diosin nai muran icaton matori onaintimashquiran,—ishon Jesús noco yoini.

19

Nocofunu yafi ainfo ununantirofohuunoa Jesús ato yosini

Mr 10.1-12; Lc 16.18

¹ Ascano tsainqui anaititan Jesús nocofu Galilea anoashu Judea mai unu Jordán ocuma futsa cani. ² Ascaiton yorahuanrasiton mufaincun nannoshon nan isinincaifoti ato caya huani.

³ Ascaino Fariseofo Jesusqui funifo. Amaquiri cumamapai fucani. Ascacun yocanifo, —¿Moisés cununi cuscan nocofunun ahuin unupaiquin unutiromun? ¿Nocofunun ahuin ahuuscarashta aiton unutiromun? —ishon yocaifoan.

⁴ Jesús ato cumani, —¿Man Moisés cununi cuscan oinmisimamun? Diosin nantifi onihuani. Tau huaquin nocofunu yafi ainfo onihuani. ⁵⁻⁶ Ascano Diosin yoiqui isca huani, “Ascacun nocofunun ainfo fiaino apa yafi ahuamaqui pashcashu ahuin fu itiro. Ascashu nan fusti shinantsa ashcaquin,” ishon cununiquin. Ascacun Diosin ato fianan

huaa cuscan afanan tsoa pashcanantiromaran,—ishon ato yoiaiton.

⁷ Yocanifo, —¿Nan iconfiacunascaahuuscaquimun Moisés yonoquin isca huanquin? “Tsoan ahuin unupaiquin iquisicunushoquin isca huatiro, ‘Un afanan mia fipaima. Mun mia unuiran,’ ” ishon Moisés cununiran,—huaifoan. ⁸ Afanan ato cumani,—Manfin nan maton shunifo cuscaraquin. Nanfoanri Dios nicacasmapaonifo. Nanscarifi huaqui marifi man nicacasmai. Ascacun rama man yoia cuscan nannori Moisés cununi. Ascafiai Diosin tau huaqui anori yononima. ⁹ Ascacun un mato cayacafi yoi. Ratoran futsan ahun ahuin nocofunu futsa fu iyamafiacun ahuin unui futsa fiishquin. Asca huaquifin nanton chaca huaiquin. Nan ahun ahuinma fu iquin cafiscairan,—ishon Jesús ato yoini. ¹⁰ Ascaiton nicaquin non afu rafuafoan yoini,—Nanscaracun nocofunu yafi ahuin fiananfoma shara icuanaran,—non huaiton.

¹¹ Jesús nococumani,—Un yoiai cuscacai atirifi yorafoan tapitirofoma. Nan Diosin ato shinanmanaoansifin tapitirofoquin. ¹² Ascano atirifi nocofunufocaiyainfo fu fianantirofoma. Atirifi nan cainni cuscan ainfo fu itiroma. Ascan futsafoan atirifi chaca huatiro ainfo fu inonfoma. Ascaíno atirificaiyainfo fu fiananfoma Dios yonosharashoshcaquin. Ascacun tsoa ahuionma itiromainquin nan un mato yoiai cuscan nicachuun,—ishon Jesús ato yoini.

*Jesús apa Dioshuunshon facufo shara huani
Mr 10.13-16; Lc 18.15-17*

13 Ascaino yorafoan aton facumishti Jesusqui ihuunifo ato manmanpacuquin Apa Dios cufishonon. Asca huafiaifoan non afu rafuafoan ato yoini, —Maton facufo ihuutan nocon Ifo fucash huayamacahuun, —ishon non ato yoaiton. **14** Jesús noco yoini, —Ato nitun huayamacahuun uqui funonofo. Uhuun Upa Dios niaifo icariaofin nan facumishti cuscaraforiquin, —ishon yoini. **15** Ascashon facufo manmanpacután Jesús cani.

*Pushcohuai mafo ichapaya Jesús fu tsainni
Mr 10.17-31; Lc 18.18-30*

16 Ascano pushcohuai Jesusqui caashon yocani, —Tapimamisiton minfin sharacoinquin, ¿Unmun ahua shara huatiroquin Dios fu ipashashquin? —ishon yocaiton. **17** Jesús cumani, —¿Ahuuscaquimun mian yocaiquin ahuara sharahuunoa? Nannofin fustiquin shara. Naanfin Diosiquin. Ascan min Dios fu ipapaiquin nan noco yononi cuscan nica-coinfain nan yoia cuscacoin min huatiroran, —huaiton. **18** —¿Rato noco yononicaimun un nica-coinfain nan yoia cuscan un huaiiqui? —ishon yocaiton. Jesús yoini, —Futsa rutuyamahuu. Min ahuinma fu iyamahuu. Ahuara onuyamahuu. Chaniri yoiyamahuu. **19** Upa yafi uhua nicas-harafain ato shara huahuu. Nan mifiri min noiai cuscan futsafohuunri noihuu, —ishon yoaiton. **20** —Nantifi min ua yoiai cuscan mun nanscacoin huaa. ¿Ascan ahua futsamun un ahuusca huatiroquin ahuunoashu isharashquin? —huaiton.

21 Afanan yoini, —Min Dios cuscara shara ipaiqui nantifi min aya cuscan inanmitsashon

ahuun rafanan pui fihuun ahuuomafo ato inan-shquin. Min ascaitofin Upa Diosin nai muranshon mia ahuara sharacoin mucushoniquin. Asca huatan ua tanasharahuu,—ishon Jesús yoini.

²² Asca huaiton nicai nan pushcohuai puusima. Mafo ichapayashu ahuun mafofo inanmitsacasmai. Ascatac Jesusmaquinoashu cani. ²³ Ascashu man caano Jesús noco yoiqui isca huani,—Un mato icon yoi. Yora mafo ichapaya fustirasi uhuun Upa Dios niaifo ari nocopaifiacani nocotirofoma. Nanfoan aton mafo ichapa shinanquicai tsoan Dios shinantiroma. ²⁴ Ascacun afanan un mato yoi. Nan ina camellocai acoya shoi muran finontiroma. Mimacaifi nocofunu mafo ichapaya Diosin niaifo ari nocotiromaquin,—ishon noco yoini.

²⁵ Ascaiton nicacaquin non afu rafuafo mustairitan non yoini. —¿Ascan tsoa Dios fu nipatiromun? —ishon non yocaiton. ²⁶ Jesús nocoqui fusoacuahuan noco cumani,—Nocofunucai afiri numatiroma. Diosin fustitofin yorafo numatiroquin. Nantofin ahuamamishti huatiroquin. Nocofunufoan atiroma cuscan nan Diosin huatiroran,—ishon noco yoaiton. ²⁷ Pedronun yoini,—Ifon, nonfin nocon ahuarao nantifi yafi nocon yorafo non pota furani mifu oaquin. ¿Ascan Diosimun noco ahua inainquin? —ishon yocaiton.

²⁸ Afanan Jesús noco yoiqui isca huani,—Un mato icon yoi. Un chipo nantifi manifoti iquinaitian nantifiton ua oinshquicani uhuun Upa Dios cuscara sharacoin icaiton. Nantianri marifi nan ua tanamisi nocon caifo doce shoco Israelifo marifi man ato iquishquin. ²⁹ Ascataci

tsoan uhuunshon ahuun pushu yafi ahuun yorafo potafain apa potafain ahuari potafain ahuun facufo yafi ahuun mairi potashon ua tanapaisharai. Nanscara yorafin uqui nocoitian fasi paratama fiishquiquin. Ascashu ufu ipanaca.

³⁰ Ascafia yora ichaparasi niyoashu nan niaifo cuscaraofo. Ascan naashucuai afanan tsoa ahua ishquia. Nanscarifiai atirifi niyoashu nan ahuama shinantsafo. Ascafia naashu u futan futsafori iquishcani.

20

Mau yonomisifohuunoa ahuara futsa Jesús ato tapimani

¹ Ascano ahuu cuscaramain Upa Diosin ahuun yorafo iquinai cuscaraquin afanan un mato tapi-mai isca huai. Mau ifoan funamanrishta nocofunufo funai cani ahuun mau uhuapa ano yonoi fononfo. ² Ascano ato fuchishon yoiqui isca huani, “Uhuun mau ano yonoi focahuun. Nan man shafa fusti yonoa cuscan un mato inain. ¿Ascan sharamun?” ato huaiton. “Ai. Sharafinquin,” huanifo. Ascashon ahuun mau ari ato nichini.

³ Ascatañ man fari cuyainano mau ifoan caaquin oian plaza ano nocofunufo nia ini tsoa yonoima. ⁴ Ascaiton mau ifoan ato yoini, “Uhuun mau ano yonotacahuun un mato ahuun rafan inansharanon,” ato huaiton. Nicacani fonifo yonoi focani. ⁵ Ascano mau ifo afanan fari masafinin racano caaquin oian atirifi nocofunufoan ahuushta huatama niafo oinquín. Ato yoini, “Uhuun mau ari fotacahuun,” ato huaino man foafono. Afanan man fari cushca

cainnaino macushcamuano atirifi fuchishon nanscarifi huaquin ato nichini. ⁶ Ascatañ man yatai fari nii manaon caano mau ifoan afanan caaquin atirifi fuchini yonocanima niafoan. Ascaiton ato yocani, “¿Ahuuscaimun nan shafatisho yonotama man niaquin?” ishon ato yocaiton. ⁷ Cumanifo, “Tsoan ahuashta noco yonoamaran,” huaifoan. “Ascacun marifi uhuun mau ari ua yonoshotacahuun,” ato huani.

⁸ Ascashon man yamuaino mau ifoan yonona niaifo patashari yononi, “Ua yonoshonaifo cu-nahuu nan yonoafo rafanan ato inanshquin. Ascahu ato inanqui tau huahuu nan ahuun un-taqui foafo yafi nan foi tauafo,” ishon yononi. ⁹ Ascaino man fari nii manaon caano foafo. Nanfo ato inanni naan shafa fusti yonoa shinantsa huaquin. ¹⁰ Ascano nan funamanrishta yonoi tauafoan oincaquin yoinifo, “Mau ifoan ato inanshara. Ascan nonfin paratama yonoquin. Ascacun noco fasi paratamacoin inainran,” ishon shinannifo. Ascafia nan chipo iquiafo ato inan cuscari ato inanqui huani. ¹¹ Ascashon ato yono-huunshon ato inainton fiicani mau ifoqui tsain chaca huacani afi ranan yoinancaquin yoinifo. ¹² “Ascan nonfin nan shafatishon yonoquin. Fari isicoin muran. Ascan man fari caino chipo fuafu min ato inan cusan huaquin nocorifi min inainran,” ishon yoiaifoan. ¹³ Mau ifoan futsa cumaqui isca huani, “Uhuun yorashta. Unci mia inanqui chaca huama. ¿Ascan manmun u futan shara huama man shafa fusti yonoaihuunoa? Man manfin ‘Shararan’ huaquin. ¹⁴ Ascan naquian min pui fihuu min pushu ano catashquin. Ascan

nan fari man nii manaon caano yonoafo nan un mia inain cuscan nanfori un ato inansharapai. ¹⁵ Nan un ato inanpaiyai cuscan un ato inantiro. Nanmain uhuun puicufin. ¿Ascan ahuuascaquin nan faricaino yonoafo yafi man uqui shinain chacaimun? Unfin futsafori shara huapaiquin,” ishon mau ifoan ato yoini.

¹⁶ Ascan nanscarifiai Upa Diosin nan icoindra huaqui tau huafo ato shara huaa cuscan huaquin nan chipo icoindra huafori nanscarifi ato shara huairan,—ishon Jesús ato yoini.

Naashquiai cuscahuunoa afanan Jesús yoi fut-sani

Mr 10.32-34; Lc 18.31-34

¹⁷ Ascashu Jesús Jerusalén ano caquin doce non afu rafuafo noco fusti futsano iyoni nannonshon noco yoiquin isca huani, ¹⁸—Non Jerusalén ano canon. Nannoshon futsan ua ato achimai nan nocon niaifofo futan Moisés tsain tapimamisifoanri ua chaca huacaquin yoicani isca huacaquin, “Jesús rutucahuun,” ishon yoifocani. ¹⁹ Ascashon caifo futsafori ua inancani nanfoan ua cashu mutsama huafain fichi cunoqui tuchiaton ua coshacani. Ascatan ihui coyán iquinanqui ua mastacani un nanon. Uaasca huafiafo osha rafu non fustitan Upa Diosin afanan ua funimairan,—ishon noco yoini.

Juan futan Santiago ahuan yocani cuscan

Mr 10.35-45

²⁰ Ascano Zebedeo ahuun facu rafu Juan yafi Santiago ahuan ato Jesusqui iyoni. Ascatan aqui

nocoshon ahuan Jesús ratoconun mai chachishoni. Ahuara futsa yocapaiquin. ²¹ Ascaiton Jesús yocani, —¿Min ahua yoipaimun un mia ashonon? —huaiton. —Ifon, Upa Dios icari nantiffain min aton niaifo icaitian uhuun facu rafu mifu niaifo patashari ato imahuu. Ascatan niaifoan ahuun tsaoti ano min tsaoaitian uhuun facu rafutan mia naqui huashu tsaononfo, —ishon yoiaiton. ²² — Man ua yocai cuscacai man tapiama. ¿Un omitsiscashquiain cuscan man ufu omitsiscatiromun? —ishon Jesús ato yocaiton. Cumanifo, —Ai. Non mifu itiroran, —huaifoan. ²³ Ato cumani, —Icon marifi man omitsiscai. Ascafia uncai yoitiroma tsoanmain ua naqui huashu tsaoicai. Uhuun Upa Diosin fustitofin tapiaquin. Nan catoanfosi ufu nanno tsaotiroran, —ishon ato yoini.

²⁴ Ascaiton nicai non afu rafuafo atirifi mucu rafuti nan nanu rafuqui non fasi sinacoinni Jesús naqui huashu tsaopaiyaifoan nicai. ²⁵ Non ascaiton tapishon Jesús noco cunashon yoiqui isca huani, —Uqui fucahuun un mato yoinon. Nan icoingra huafoma niaifofoan ato curushcain yonafafainmisifo. Aton niaifo patasharifoanri ato yoiqui isca huamisifo, “Nonfin mato ifoquin. Ascacun non mato yoia cuscan man noco ashorisca huatiroran,” ishon curushcái ato yoimisifo. ²⁶ Ascafiaifoanno ato cuscara iyamacahuun. Man ratoran futsan niaifo ipaiqui maton oinmati man shara huafafainmisi itiro. ²⁷ Ascatan man futsan futsafori finonpaiyaino ahuun yonomati man itiro. ²⁸ Nanscarifiai futsa ua ashononcái un oama. Ascatamarocon un futsafo ashoyoi ua oa. Ascatari un atohuunoashu naashquin un oni

afanan Satanás ato ifon inonma, —ishon noco yoini.

Jesús fusho rafu caya huani

Mr 10.46-52; Lc 18.35-43

²⁹ Ascatan non Jericó anoashu caiton yorahuanrasifain noco mufainifo. ³⁰ Ascaíno nannori fai cusumun fusho rafu tsaoafo ini. Jesús fain caiton nicaquin nan rafutan cunanifo isca huaquin, —Ifon, minfin David ahuun funaquin. Nocohuun ramapaipun, —ishon cunanifo. ³¹ Ascaifoan yorahuanrasifain atoasca huanifo afanan tsainonfoma. Atoasca huafiainfoanno oi ashcafínin afanan cunanifo, —Ifon, minfin David ahuun funaquin. Nocohuun ramapaipun, —huariaifoanno. ³² Jesús nituacucahuan ato cunashon yocani, —¿Un mato ahua ahuusca huashotiro mun? —ishon ato yocaiton. ³³ —Ifon, non fasi oinpaicoin, —huaifoan. ³⁴ Jesús atohuun ramapaiquin aton furo muainno cayariscatan oinsharanifo. Ascashon nan rafutari Jesús mufainifo.

21

Jesús Jerusalén ano cani

Mr 11.1-11; Lc 19.28-40; Jn 12.12-19

¹ Ascatan non Jesús fu cai Jerusalén chaima non noconi. Nan chaimari pushurasi futsa ahuun anu Betfagé machi Olivo tunanman ini. Nanno nocoti chaima Jesús afu rafuafo rafu pushurasi Betfagé ano ato nichini. ² Ato nichiatima ato yoiqui isca huani, —Nan pushurasi ano fotacahuun. Nanno nocoshon man oian burro facuya

nushua man fuchicai. Nan tupushon nuri ua ihuushotacahuun. ³ Futsan mato yocaiton ato yoicahuun, “Nocon Ifo yopaiton non iyoshoni cai. Ascafia non mato nasorisca huairan,” ishon ato yoitacahuun,—Jesús ato huani.

⁴ Jesús acai cuscan huaquin nannori ahuunoa Diosin tsain yoimisiton cununi. ⁵ Ascano cunuquin isca huani,

“Jerusalén anoafó yoihúu isca huaquin,
‘Oincapon. Mato niaifocoin matoqui oi.
Nan burropan facu camaqui tsaoashu
matoqui oi. Nancaí nocofunu ahua-
ton curafiapaitama shara fustisi oitsii
huafain fusti yoitiroran,’ ”

ishon Diosin tsain yoimisiton ahuunoa cununi.

⁶ Ascátan nan rafutan Jesús ato yoia cusca-
coin huashonifo. ⁷ Ascashon burro yafi ahuun
facu Jesús iyoshonifo. Iyoshocata burropan facu
camaqui ato camisa fucashonafoanno acamaqui
Jesús tsaoinacahuani. ⁸ Ascátan caiton yorahuan-
rasifoan fai naman cayan afufori aton camisafo
fucashonifo. Ascaíno atirifiton shupa shatushon
nan caifufori nichinifo. ⁹ Ascano nan yorahuan-
rasi afufori foaifo futan acachori foaifoan nantifi-
fain oi ashcafinin yoinifo.

*jAicho! David nocon niaifo ipaoniton ahuun funa
nocoqui oi. Nanfin Dioshuunoashu nocoqui oiquin.*

*Ascacun Upa Diosin nan shara huahuu,
ishon yoinifo.*

¹⁰ Ascashu Jesús Jerusalén ano caiton
nicacani nantifi yorafo mustairicatan afi ranan
yocanonannifo,—¿Tsoamun naaquin? —icashu.

11 Ascaifoan nan Jesús fu foafoan yoinifo, — Nanfin Jesusquin. Diosin tsain yoimisi. Nanrifi pushurasi Nazaret nan Galilea anoáquin, —ishon yoinifo.

*Jesús Dios fu tsanti pushu muranshon ahuara
chacafo potani*

Mr 11.15-19; Lc 19.45-48; Jn 2.13-22

12 Asca huatan Jesús Israelifoan Dios fu tsanti pushu muran iquitoshiquin oian amurannoashu ahuara inanmitsashon pui fiaifoan oinqui nan sapa acamaquishon pui fiaifo finifoan arasaquin futsani. Ascashon nan ruhui inanmitsaifoan aton tsaotiri finifoan potaquin futsani. **13** Ascashon Jesús ato yoini, —Diospan tsain cunuquin isca huani, “U fu tsanti pushu muranshon man ua fusti cufitiroran,” ishon cunufiani nan yomutso-foan ichananti cuscara man huapairan, —ishon ato yoini.

14 Ascaíno fushofo yafi nipaiqui ranainfo Dios fu tsanti pushu muran Jesusqui funifo. Ascacun ato caya huani. **15** Ascaiton nan Dios fu tsanti pushu muranshon unimacaquin facufoan oi ashcafínin yoinifo, —¡Aicho! Nan David ahuun funa Jesús fasi shara. Ascacun nan shara huahuun, Upa Diosin, —ishon yoinifo. Tsoan atiroma cuscan huaquin Jesús ato shara huashomisiascaifoan nicai Israelifoan niaifofo yafi Moisés tsain tapimamisifo sincóinnifo. **16** Ascashon nanfoan Jesús yoinifo, —¿Nan facufoan yoiaifo cuscan min nicaimamun? —ishon yocaifoan ato cumani, —Aifain. Munfin nicaiquin. ¿Ascan marifi nan Diosin tsain cununi

Mateo 21:17

civ

Mateo 21:22

cuscan man man nicamisimun? Cunuqui isca huani,

“Mihuunshon facufoan mihuunoa tsain shara yoicaniran,”
—ishon cununi.

¹⁷ Anori ato yoitan atomaquinoashu no fu cai pushurasi ahuun anu Betania ano cani. Nanno osha fustiyoni.

Fana higuera fimiymacaiyaiton Jesús ahuun tsainmansi namani
Mr 11.12-14, 20-26

¹⁸ Iyoconaino Jesús Jerusalén ano cai fonaincoinni. ¹⁹ Ascashu caquin oian fai cusumunri fana higuera fuchini. Ahuun fimi pipaifia ahuun puifosi ini. Ascacun nan fana Jesús yoiqui isca huani, —Afanancai min fiminacamaran, —ishon yoini. Yoiquinasca huaino fana tsasisiriscatani.

²⁰ Ascaiton oin non afu rafuafo non mustairini. Ascashon non yoini, —¿Ahuuscashumun nan fana tsasiriscaaquin? —ishon non Jesús yocaiton.

²¹ Noco yoini, —Un mato icon yoinon. “Un icoingra huai iyamarai un icoingra huaimaran,” ishon shinantama man icoingra huacoingron un fana tsasi huaa cuscan marifi man nanscarifi huatiro. Ascashon machiri man yoitiro, “Tscucuai. Unuhuan muran pacuhuu,” man huaino unuhuan muran pacuriscatiro. ²² Ascacun man icoingra huacoingron ahuarashta man Upa Dios yocaiton mato ashotororan, —ishon Jesús noco yoini.

Jesús noco yonotiro
Mr 11.27-33; Lc 20.1-8

23 Asca huatan Jesús Israelifoan aton Dios fu tsainti pushu muran iquishon ato yoiaino Israelifoan aton niaifofo aqui funifo. Aqui fucashon yocanifo, —¿Min acai cuscan tsoan mia yonoamun? —ishon yocaifoan. **24-25** Jesús ato cumani, —Urifi un mato yocai. ¿Juanpan yorafounu muran iquimapacuni tsoan yonoaasca huanimun? ¿Diosin iyamarai nocofunufoan yononifomun? Man ua cumasharaiton urifi un mato cumatiroran, —ishon ato yoiaiton. Nicacani afiranayoinannifo —Diosin Juan nichiniran non huaiton Jesús noco yoitiro, “¿Ascan ahuuuscaquin man Juan icoingra huamamun?” noco huatiro. **26** Ascan Juan nocofunufoan nichiniran non huaino yorafo nocoqui sinatirofo. Nantifi yorafoanmain yoimisifo “Juanpan Diosin tsain yoimisiran,” ishon. Ascacun noco asca huatiroforan,—icashu niaifofo yoinannifo atoqui musucani. **27** Ascashon Jesús yoinifo, —Noncatapiama tsoanmain Juan yonoquin, —ishon yocanifoan. Jesús afiri ato yoini, —Urificai un mato yoima tsoanmain ua yonoa un ahuarafohuaiquin,—ishon Jesús ato yoini.

Pushco rafuhuunoa ahuara futsa ato yoini

28 Asca huatan ato yocani, —¿Man raquiri shinainmun? Nocofunu facu pushcohuai rafuya ini. Ascashon furu iyoa apan yoini, “Upashta, nocon mau ano yonotahuun,” huaiton. **29-30** Furumun cumani, “Ma, upa, un yonoicaimara,” huafashu chipo shinan futsashu cani. Ascashon furu chipocuri yoini, “Upashtan, nocon mau ano yonotahuun,” huaiton. “Ai, upa. Mun yonoicairan,”

huafiašhuai canima. ³¹ ¿Ascan rato ahuun facu rafu nan apa yoia cuscacoin animun? —ishon Jesús ato yocaiton. —Nan iyoaran, —ishon cumaifoan. Afanan ato yoini, —Un mato icon yoi. Nan yora chacafo niaifo pui fishomisifo yafi ainfo furomafoanri ua icoínra huacanashu nanfo Diosin nantifi iquinai ano iqui tautirofo. Ascan mancai ari iquitiroma. ³² Juanpan mato yoisharapaoni isca huaquin, “Man chaca huamisi cuscan shatufain natian Dios shinancahuun,” ishon mato yoipaoni. Ascafíacai man icoínra huanima. Nan niaifo pui fishomisifo futan ainfo furomafoanri icoínra huaifoan oinfiaquicai maton chaca shatuyamafain man icoínra huamismaran, —ishon Jesús ato yoini.

Mau yonomisi chacafohuunoa ahuara futsa ato yoini

Mr 12.1-12; Lc 20.9-19

³³ —Nicacahuun un afanan ahuara futsahuunoa un mato yoi mato tapimashquin. Mau ifoan ahuun mau ano fimi ahuun anu uva fanani. Ascashon ahuun fimi ica cuscan toquiri cunuacuni ahuun fimi fana ahuaton chaca huanomma. Asca huatan mai quini huashon amuran uva huashon ahuun tau puama puama anifo ahuun fimiunu fishcaquin. Ascashon toquiri cuyacoin masoni anoshon ahuun yonomatinin cushushonon. Asca huaquin anaitishon futsafo yoini ahuun mau cushushononfo. Asca huafaini mau ifo mai futsa ano cayoni. ³⁴ Ascashu man fimi ano mau ifoan ahuun oinmati futsafo mau ano nichini ahuun fimi fishononfo. ³⁵ Ascano nocoafoan fimi cushumisifoan ato achicashon futsa sutufain futsa ru-

tucointfain futsari toquirinin tsacaqui futsanifo. ³⁶ Ascano mau ifoan ahuun oinmati ichapama nichiqui tau huani. Ascashon afanan acachori fasi paratama nichini. Ascafia nanfori ato chaca huanifo. ³⁷ Ascashon mau ifoan shinanni, “Uhuun facucoin un nichicuraca nicatirofoati,” ishon ahuun unutaqui furucoin nichini. ³⁸ Ascashon apa nichian caiton oincani nan fimi cushumisifo ahuun yoinancaquin yoinifo, “¡Oincapon! Mau ifoan ahuun facu oi. Na maufin apanaquin. Ascafia apa chipo ahuun facu inanshquin. Ascacun non rutunoncahuun nocona mau inon,” icashu yoinannifo. ³⁹ Ascatan furu iquicuranaiton achicashon mau tsisumun sharafoshon rutunifo.

⁴⁰ ¿Ascan mau ifo oshon nan fimi cushumisifo ato ahuuasca huashquimun? —ishon ato yocaiton. ⁴¹ Cumanifo, —Nan yora chacafo rutui atohuun ramapaitama nanonfo. Ascashon ahuun mau futsafo cushumani cushusharashononfo. Nanfoan man fiminun cashcu futsa mau ifo inanonfo, —ishon yoiaifoon.

⁴² Jesús afanan ato yoiqui isca huani, —¿Diosin tsain cununi cuscan man man oinmisimamun? Isca huaquin cununi,

“Pushu yonomisifoan pushu quishi shara potanifo. ‘Nan sharamaran’ ishon potafiafo pushu ifoan afanan fini nanhuunoashu pushu mutsisipa inon.” Nanscarifiai niaifofoan Diospan facuhuunoa isca huaqui yoishquicani, “Nacai ahuama. Sharamaran,” ishon yoiqui potashcani. Ascafia Upa Diosin ahuun facu catoan ahuunoashu nantifi

ahuun yorafo nipanonfo. Ascacun non yoitiro “Diosin Furunhuunshon aca cuscan fasi shararan,” ishon cununi.

⁴³ Ascacun Diosin maton niaifocoin ipai ahuun yorafo ato iquifai ato iquipacushquin. Ascafia man Dios nicacasmaiton futsafo catonshquin a fu ipanonfo. ⁴⁴ Unfin nan pushu quishi cuscaraqui. Futsafoan uhuunoa cayacafi tapimana cuscan icoinra huayamashu funocoinshcani. Un atoqui sinaqui omitsiscapanacafo muran un ato potashquin,—ishon Jesús ato yoini.

⁴⁵ Ascaiton nicacani Israelifoan aton niaifofo futan Fariseofoan tapinifo atohuunoa Jesús yoiaiton. Nanfoan icoinra huafomahuunoa ato yoini. ⁴⁶ Ascano ahuun yoinannifo, —¿Ahuuscashomain non Jesús ato achimanan ranushumuaton rutunon? —ishon shafatifi shinannifo. Ascafiaifoanno yorafoan yoinifo Jesús Diospan tsain yoimisiran ishon ahuunoa yoinifo. Ascacun na yorafoan yoiaifo cuscan tapinifo niaifofo yafi Fariseofoan yorafoqui musucaquin Jesús achimatai inifoma.

22

Nocofunu yafi ainfo fianantirohuunoa ahuara futsa ato yoini

Lc 14.15-24

¹⁻² Afanan Jesús ato yoiqui ahuara futsa ato tapi-manon isca huani, —Upa Diosin niaifoan ahuun yorafo iquinaimain ahuu cuscaraquin un mato yoinon. Ua nicacahuun. Niaifoan ahuun facu ainfo fiaino ato chanihuani ichananshon ato futan pifain atofu fasi unimashquin. ³ Ascano

man itisharashon ahuun oinmatifo nichini nan ato chani huaifo ato ihuitanonfo. Ascafiacai tsoan opainima. Fucasmarocon anifo.⁴ Ascataan afanan oinmati futsafori nichiqui yoini, “Ato yoitacahuun. ‘Uhuun facu ainfo fiaino mun tushu itishara huaaquin. Moi rafu rutufain yoina shoasharari un rutuaqui pii funonfo.’ Nannori ato yoitacahuun,” ato huani.

⁵ Ascano focashon ato yoifiafo afanan fucasmanifo. Atirifi aton mau ari fonifo, pashaifocani. Atirifiri ato inanmitsati ari fonifo. ⁶ Ascan atiri nanno nituafoan niaifoan ahuun oinmatifo achicashon ato sutufain atirifi ato rutucoinnifo. ⁷ Ascano ahuun oinmatifohuunoa nicai niaifo fasi sinacoinquin ahuun ranushumuafo nichini a rutumitsamisifo ato rutuqui cuyofain aton pushufo coanonfo.

⁸ Asca huatan niaifoan ahuun oinmati futsafo yoini, “Uhuun facu ainfo fiaino un tushu ichapa itishara huaa ato futan piishquin. Ascafia futamarocon fasi chaca huafo. Asca huashucai afanan futirofoma. ⁹ Ascacun nan fai uhua-pafo nanno nan yora ichapa fotirofo ano fotacahuun. Ratoran futsafo fuchicashon ato yoicahuun Funonfo,” ishon yoini. ¹⁰ Ato asca huaino focashon nan fai uhua-pafo anoa ratoran futsafo fuchicashon ato ihuunifo. Yora sharafo ihuufain yora chacafori ihuunifo. Ascano nan niaifoan ahuun facun ainfo fiai pushu muran yorahuan-rasi fospicoinnifo.

¹¹ Ascataan niaifo pushu muran iquini nantifi fuafo ato oinpai. Ascashon oian nantififain sahuuti shara sahuuafo ini. Niaifoan ahuun facu ainfo fiaino sahuuti funa sharacoin ato sahuuman. Ascafiaquin oian nocofunu futsan sahuuti

shuni sahuua niaifoan fuchini. ¹² Fuchishon yoiqui isca huani, “Ahuuscai sahuuti sharacoin un ato sahuumana cuscan min sahuumamun. ¿Ahuuscai ascara min iquiamun?” ishon yocafainocai nan nocofunu pusinima. ¹³ Ascaiton niaifoan ahuun oinmatifo yononi, “Nan nocofunu munushfain onushushon faquish muran potacahuun. Nannoashu uaicaifoanno omitsiscapashanon,” ishon ato yoini.

¹⁴ Nanscarifiai Upa Diosin yora ichapa cuna a icano funonfo. Nan ahuun facu noiaifosi afu ipanacafo. Ascafia Upa Diosin fustirasi ato catoin nan icoingra huafosi afu ipashanonfo, —ishon Jesús ato yoini.

*Niaifoan aton caifofo pui yocamisifohuunoa
Mr 12.13-17; Lc 20.20-26*

¹⁵ Ascatacán Jesús ato yoiai cuscan nicacani Fariseofo Dios fu tsainti pushu murannoashu chifi focanashu yoinannifo, —Non Jesús ahuara yocanon. Noco amaqiri cumaque chaca huaiton non cunu muran iquimanon, —icashu ahuun yoinannifo. ¹⁶ Ascashon Herodes ahuun tanamisifo yafi atohuunshon tapimisifori Jesusqui nichinifo cucun huaquin yocatanonfo. Ascana focashon yocaqui isca huanifo, —Tapimamisiton, man non tapian min icocoin fusti noco yoifafainmisi. Upa Diosin noco amapaiyai cuscan nannoricoin min noco cayacafi yoimisi. Mincaí ahuara yoipai ranomisisimari. Nan min noco yoiai cuscan cayacafi min yoimisi. Ahuaricai min fomamisima. Yora ahuaton cunama min yoimisi cuscan huaquin niaifofori min yoitiro. ¹⁷ Ascacufin min shinain cuscari

noco tapimahuu. ¿Nan Romanonfoan aton niaifo Cesari pui inanfo cuscan norifi non inantiromun? —huaifoan. ¹⁸ Nan fuparamitsamisifoan cucun huaquin yoiaifo cuscan onanshon Jesús ato yoini, —Fuparamitsamisifoan manfin ua amaqiri cumamapaiquin ranushumuafaon ua achicashon ua cunu muran iquimanonfo, —ishon ato yoitan. ¹⁹ —Toro ua ismacahuun. Nan man ahuunshon niaifo inanmisi, —ato huaiton. Toro fushonifo. ²⁰ Ascashon Jesús ato yocani, —¿Tsoan ahuun anuri nuamun? —ishon ato yocaiton. ²¹ —Niaifo Cesarinnaran, —huaifoan. —Ascan Cesarinacun nan inancahuun. Ascan Diosinacun Diosiri inancahuun, —ishon ato yocaiton.

²² Nicacani fasi mustairicatan yoinifo, —Jesús yoiai cuscacai tsoan taftiromaran, —icashu afi ranan yoinannifo. Ascatan amaqinoashu pashcafaini fonifo.

*Yora naashu afanan funitirofihuunoa yocanifo
Mr 12.18-27; Lc 20.27-40*

²³ Ascano nan shafatari Saduceofo Jesusqui funifo. Nanfoan shinanquin isca huamisifo, —Yora naashucal afanan funinacamaran, —ishon yoinifo. ²⁴ Ascan nanfo Jesusqui fucashon yocanifo, —Tapimamisiton, noco shuni Moisés noco cunushoqui isca huani,

“Nan ratoran futsa ahuin futan facu acashma naano afu nanua futsan ahuun facahua fitiro a futan facu aashqui,”

ishon cununi. ²⁵ Un mia yoinon. Siete nanopacuafihuunoa. Nanfo nocofu iyopaonifo. Aton

iyaoacoin ahuinyain tauni. Ascafiashon a futan facu acashma nani. Ascano chipocuton ahuun facahua fiini. ²⁶ Ascashu arifi a futan facu acashma naani. Ascano chipocu futsari fiini. Arifi a futan facu acashma naani. Nanscasiai. Ascapacutan amaqui nai cuyonifo. Aqui facu ayamacaina. ²⁷ Ascatan ahuun unutani ainfori naani. Facu nanuyamacai. ²⁸ ¿Ascan ratotocaimun nai muranshon nan yorafo naashu funiaifotian fishquiquin nan fusti fipashquin amaqui nai cuyoaflo? —ishon yocaifoan.

²⁹ Jesús ato cumani, —Man man funoa. Mancai Diosin tsain tapiamafain ahuun yonoricai man tapiama. Ascashofin amaqiri man ua yoiquin. ³⁰ Naacanashu funiafocai Dios icari nocotan afanan fianannacafoma. Nantifi Diospan oinmatifo afu nai muran icafo cuscara iishquicani. ³¹ ¿Ascacun yora naashu furnishquiaifohuunoa Diosicoinin mato cunushoni cuscan man man oinmisimun? ³² Isca huaquin Diosin yoini, “Unfin Abraham non Isaac non Jacob afoan aton Diosiquin,” ishon yoini. ¿Yora naashu afanan funiyamaino ahuuscashumun Dios fu itiroquin? Ascafia ascarama. Yora man naafianishaquin afanan nia nanfomin Dios fu itirofoquin. Ascacun Upa Diosifin aton Diosiquin, —ishon Jesús ato yoini.

³³ Jesús Saduceofo yoiai cuscan nicacani mustairicatan yoinifo, —¿Ahuuscashomun iscara tsain noco yoiquin? Tsain sharacoin iquinaran, —ishon yoinifo.

Diosin yononi cuscan nantifi sharafiaшу nan

*fusti shara finacaia**Mr 12.28-34*

³⁴ Ascano Jesús Saduceofo tsain shatumana nicacani Fariseofo afanan aqui funifo yocai fucani. ³⁵ Ascacun Moisés yononi cuscan tapicoian futsan Jesús amaqiri cumamapaiquin yocani, ³⁶ —¿Tapimamisiton, Moisés Diosin yonoa cuscan cununi. Ascan nan ratocaimun fasi shara finacaiaquin? —ishon yocaifoan. ³⁷ Jesús cumaqui isca huani,

“Nocon Ifo Dios noiqui fasi mato ointi muranshon noifain fasi mato nomuranshori noifain mato shinanfo yashon fasi noihuú,”

ishon Moisés cununi. ³⁸ —Nan yononicaifi fasi shara finacaiaquin. ³⁹ Futsari nanscaracuana yonoqui isca huani,

“Nan mifiri min musu huamuai cuscarifi aquin mia chaima icafori noihuú.”

⁴⁰ Nantifi Moisés yononi cuscan yafi Diosin tsain yoimisifoan yosipaonifo nan Diosin yononi rafuhuunoa cununifo. Dios yafi futsafo noicoinquifin nantifi Diosin yononi cuscacoin man aiquin,—ishon Jesús ato yoini.

*Tsoancaimun Cristo ahuun shuni ipaoniquin**Mr 12.35-37; Lc 20.41-44*

⁴¹ Ascashu Fariseofo afu ichananfoan Jesús ato yocani, ⁴² —¿Nan Diosin catonni Cristohuunoa ahuu cuscara man shinamun? ¿Tsoan funacaimun? —ishon ato yocaiton. —David ahuun funaran,—huaifoan. ⁴³ Ato yoini —¿Ascaahuuscai David Diospan Yoshin Sharahuunshon nan Diosin catonni yoiqui isca huanimun?

⁴⁴ “Upa Diosin uhuun Ifo Cristo yoini isca huaquin, ‘Minfin ufu niaifocoinquin. Mia noicasmaifoan min ato finoncoian. Un ato shatumashquin mia afanan ahuuasca huatiroma. Min ato iquiniran,’”

ishon Diosin yoini cuscan David cununi. ⁴⁵ ¿Criston David Ifono ahuuscashucon ahuun funa itironum? —ishon Jesús ato yoaiton. ⁴⁶ Nicaquicai tsoan ahuashta cumatiro inima. Ascashu nantifi puusinifoma. Ascan anantiancái tsoan afanan Jesús ahuashta yocanima. Ato cayacafi cumaiton nicacanashu aquí ranonifo.

23

Fariseofo futan Moisés cununi cuscan tapimamisifoan chaca huamisifo cuscan Jesús yoini

Mr 12.38-40; Lc 11.37-54; 20.45-47

¹ Asca huatan Jesús afu rafuafo yafi nanno ni-
afo yoini, ²—Moisés cununi cuscan tapimamisifo
futan Fariseofoan Moisés yononi cuscan mato
tapimacani. ³ Ascan mato tapimanaifo cuscan
huacahuun. Ascaflashon nanfoan acai cuscan
huayamacahuun. Nanfoan Moisés cununi cus-
can mato tapimafiaquicai Moisés yononi cusca-
coin acanima. ⁴ Mato ahuara ihuucoin papi-
mafiaflashocai aton mucuman ahuashta mupaican-
ima. Nanscarifiai Moisés yononi cuscan nantifi
huacahuun. “Fustishta finonmayamacahuun,” is-
hon mato yonoafo. Moisés yononi cuscan fasi
finonmafain mato huamacani. Ascano marifi

apaifiaquicai man atiroma. Ascashu maton nomuran man omitsiscafaitocai matoahuun rama-paicanima. Mato yonomisifo cuscacai aafi acanima.⁵ Ascashon nanfoan acaifo cuscan futsafoan yoiqui isca huacani, “Nanfofin sharaquin,” ato huamapaicani. Diosin tsain fichiqui cunushon fumananqui nutafain ato sahuuti poyan ocuma rafu nutafain sahuuti chainipari sahuuafo.⁶ Ascatan picani ichananshu nan niaifoan ahuun tsaoti ano tsaoafo nantififain ato oinonfo. Nanscarifai aton ichananti pushu anori shafacafi tsaoatiofo.⁷ Ascashu nan yora ichaparasi anori fopaicani ato-huunoa yoisharanonfo. Nanscafín apaicaniqui. “Tapimamisiton,” ato huaifoan nicapaicani.

⁸ Ascacun “Tapimamisiton,” ato huayamacahuun. Nocon tapimamisifin fustiquin. Naan nocon Ifo Dios. Ascashufin man nantifi yorahuantananquin.⁹ Ascashori tsoa nuno mai anoa Upa huayamacahuun. Nan nocon Upacoinfi nai ari icaquin. Nan fusti non upa huatiro.¹⁰ Ascatan “Iforan” ato huayamacahuun. Nocon ifofin fustiquin. Nan nocon Upa Dios. Nan man Iforan huatiro.¹¹ Ascatarí nan man ratoran futsa niaifo ipaiyaifi nantifiton ato oinmati itiroquin¹² Tsoan nantifi finonpaifafaini naanfin Diosin ismashquiquin aacai ahuama. Ascan tsoa futsafoan aton oinmati cascarashon ato shara huafafainai nanfin Upa Diosin chipo niaifocoin imashquiquin,—ishon Jesús ato yoini.

¹³ Ato asca huatan Jesús Moisés cununi cuscan tapimamisifo yafi Fariseofori yoiqui isca huani, —¡Ohua! Moisés cununi cuscan tapimamisifo futan Fariseofoan ua nicasharacahuun.

Manfin fuparamitamisicoinfoquin. Upa Dios icano man yorafo iquimapaiquiaquicai man ato iquimatiroma. Ascashu marificai man iquitiroma. Iquipaifiaifoan man ato catima huaa. Ascacun Diosin mato fasi onaintimaquin finacoinshquin.¹⁴ Ascashon man futsafo matohuunoa shinansharamapaifiai man fasi chacacoinfo. Ainfo tatuomafori parashon man pushu ato fian. Ascatan fasi chaicoinri man cufiriatiro matohuunoa shinansharanonfo. Ascafia manfin fasi fuparamitsamisicoinfoquin.

¹⁵ Ascashu man foanfafaitsia man shinain cuscan yorafori shinanmashquin. Ascaqui fusti fuchishon man icoindra huaa cuscan nanrifi man icoindra huama mato cuscara inon. Ascashon man futsa mato cuscara imano fasi chaca finacaia iiquin. Manfin fasi chacacoinfoquin. ¡Ohuashta! Nanrifi matofu omitsiscapanacafo muran cai.

¹⁶ ¡Ohua! Ascacun Diosin mato fasi onaintimai. Manfin nan fusho cuscarafoflashon man futsafo tapimapaiqui ahuuscashomain Dios tanatirofoquin. Ascan ato tapimapaiquiaquicai marifi man tapiama. Ascashon futsafo man yoiqui isca huamisi, “Tsoan yoiqui isca huai, ‘Dios fu tsainti pushu ahuun anuhuunshon un mia yoia cuscan un mia ashonon,’ huafashion chipo man shinan futsashon man yoi ‘Nanscanonquin,’ ishon. Ascafia nan Dios fu tsainti pushu murannoa orohuunshon un mia ashoiran futsa huashon, Nanscacoин huashohuun. Ascan nan non yoia cuscan huashoyamaino ahuara chaca finontiroran,” ishon man yoimisi. ¹⁷ Asca nan icon. Manfin nan fushon futsa iyopaiyai cuscarafoquin. Maton mapo curushcoin. Mancai ahua tapiama. ¿Ascan

rato shara finacaiamun Dios fu tsanti pushu murannoa oro iyamarai Dios fu tsanti pushucoin? Nan Dios fu tsanti pushuanofin Dios itiroquin. Ascan nancaifin shara finacaiaquin.

¹⁸ Ascashon marifi man yoiqui isca huamisi, “Tsoan yoiqui isca huai, ‘Nan cufiti camaqui ahuara coamisifohuunshon un mia yoia cuscan un mia ashonon,’ huafashion chipo man shinan futsashon man yoi nanscanonquin ishon. Ascafia, ‘Nan cufiti camaqui un Dios ahuara inanhunshon un mia yoia cuscan un mia ashoiran,’ futsa huashon nanscacoin huashocahuun. Ascan nan min yoia cuscan huashoyamaino ahuara chaca finontiroran,” ishon man yoimisi. ¹⁹ Manfin nan fusho cuscarafquin. Mancai cayacafi shantiroma. ¿Ascan ratocaimun shara finacaiaquin? Nan cufiti camaqui ahuara man inan iyamarai nan cufiticoin. Man cufiahuunshon ina man coashonaino Diosin matoqui unimatiro. Ascafia nan cufiticaifin fasi shara finacaiaquin. ²⁰ Ascashon Dios fu tsanti pushu murannoa cufitihuunshon futsa man yoiquifin nan cufiti camaqui ahuara man inan nancoin yoi cafisca man huaiquin. ²¹ Nanscarafi aqui tsoan Dios fu tsanti pushuhuushon futsa ahuara yoiquifin nan Diosicoin yoi cafisca huaiquin. Nan muranmain Diosicun. ²² Nanscarifi aqui tsoan Dios ica muranhunshon futsa ahuara yoiquifin nan Diospan tsaotihuunshon yafi nan Dioscoinhuunshon man yoi cafisca huaiquin.

²³ ¡Ohua! Moisés yononi cuscan tapimamisifo futan Fariseofoan manfin fuparamitsamisi-

coinfoquin. Ascacun Upa Diosin mato fasi onaintimashqui. Moisés yononi cuscan nantifi mato fanafo atirifi man Dios inanmisi. Manasca huafiaquicai ahuara shara finacaia man huamisima. Ascashucai man futsafihuun ramapaiyamacain atori man shara huacoianmisima. Mato yorafoan ahuara chaca finonfiacun man ato shara huatamarocon man ato potamisi. Ascan man futsafihuun ramapaicai ato shara huafain ahuara ahusscarafiaino man ato potayamaino Diosin matoqui unimatiro. Ahuara futsafó Moisés yononi cuscan man huamisi cuscan man shara. Ascafia ahuara shara finacaiarocon huacahuun.²⁴ Ascafia manfin nan fusho cuscarafoquin. Fushocai oinsharatiroma yora iyoshqui. Nanscarifiai marificai man cayacafi shinantiroma yorafo tapimashquin. Motsa muran napun pacucun man nushfitiro aya shuashquima. Ascafia man nan ina uhuapa camello shuai cafisca huai. Asca huaquifin ahuaraoan yora imasharatiroma man shinanfafainiquin. Ascafiaflashon yorafo ahuara yopacoiainfo cuscacai man ato ashomisima.

²⁵ ¡Ohua! Ascashufin man fuparamitsamisicoinfoquin. Maton cucho yafi purato fumancayan chocha sharafiaquicai ocumuran man chocamisima fasi choshtacoin. Nanscarifiai man yorafo shinanmapai yorasharaforan mato huanonfo. Ascafia maton nomuranshocai man shinansharamisima. Man shinanchaca fustimisi. Ahuara fipaiqui futsa chaca huashon man fianmisi. Futsafó yopai cuscan atohuunoa shinantamarocon mafi man fipaiyai cuscan fusti man shinanfafaini. ²⁶ Fariseofoan mancái

cayacafi shinansharamisima. Ascacun iquisi mato nomuran cayacafi shinansharacahuun isharashcaquin. Man ascaiton nantifiton ointirofo man yora sharacun.

²⁷ ¡Ohuashta! Ascashufin man fuparamitsamisicoinquin. Mahua quini muran yorafo nacun mai huamisifo. Amuran yorafoan shao suyacoinfo. Nan ahuun fupoti toquirinhuan raishamisifo oshopa sharashta inon. ²⁸ Nanscarifiai futsafoan mato oinqui shinantirofo man yora shara ointsa man sharaya-mafiacun. Manfin fuparamitsamisicoinquin. Mato nomuranshon ahuara chacacoinfo man shinamisi. ²⁹ ¡Ohua! Moisés yononi cuscan tapimamisifo futan Fariseofoan. Manfin fasi fuparamitsamisicoinquin. Ascacufin Diosin mato onaintimaquin finacoinquin. Ascashon manfin mato shuni Dios tsain yoimisifo mai huanifo ano man ahuara toquiri onihuamisiqui ato shinanshquin. Ascashori maiafo manaon man charofo huamisi. ³⁰ Ascashon man yoimisi isca huaquin, “Nocon shunifoan Diosin tsain yoimisifo rutunifo cuscan nantian norifi niyoshocai non ato rutu cuanimaran,” ishon man yoimisi. ³¹ Ascan nan man yoia cuscan icon. Maton shunifo rutumistsamisifoan. Marifi man ato cuscaracon. ³² Nanfoan ato chaca huafafainqui ato rutunifo. Ascan marifi man ato cuscaraquin na Diosin matoqui nichiarifi man rutushquiquin.

³³ Ascashu manfin rono cuscarafoquin. Rono paupaton facu cuscarafo. Diosin yoini cuscan nan omitsiscapanacafu muran marifi man iquishcani. Tsoancai mato nitun huatiroma. Marifi

nanno man catio. ³⁴ Ascacun un afanan Diosin tsain yoimisifo yafi Diosin tsainhuunshon cay-acafi shinansharamisifo non ahuun tsain tapimamisifori un matoqui nichishqui. Nanforifi man ato rutushquin. Futsan ihui coyán iquinanqui man mastashquin nanon. Ascashon atirifi maton ichananti pushu muranshon man fichi cunoqui tuchiaton man coshashquin. Ascaquin man ato omitsisca huai nan pushufoti cafoquin man ato omitsisca huafocaiquin. ³⁵ Ascashofin nantifi Dios icoinra huafó rutunifoqui. Nan Abel shara rutuqui tau huafain ahuun unutaqui nan Zacarías Berequiaspan facu rutunifo. Nanfin Dios fu tsainti pushu muranshon. Anoshon cutifti chaimashon man rutunifo. Ascan manfin nantifi nan rutunifo cuscan marifi man rutui cafisca huaiquin. Ascacun Diosin atohuunshon mato omitsisca huaqui finacoin. ³⁶ Ascacun un mato icon yoi. Nantifi Diospan yorafo chaca hua-paonifo cuscan natian man niyoano atohuunshon mato omitsisca huaqui finacoin.

*Jerusalén anoashu Jesú斯 yorafohuunoashu uaini
Lc 13.34-35*

³⁷ ¡Ohua! Jerusalén ano icafoan. Manfin Diosin tsain yoimisifo rutufain nan Diosin matoqui nichian futsafori man toquirinin ato tsacaqui nanonfo. ¡Ohua! Tacaranun ahuun facufo ahuun pui naman onutiro cuscan huaquin un mato yorafoya cushupaifia mancaifin ua nicacasmamisiquin. Manricai uqui fumisima un mato cushunon. ³⁸ Ascan natiancai tsoan mato cushuima. Diosiricai afanan mato cushuima. ³⁹ Ascacucai man ua afanan oinnacama nan

Diosin matoqui nichian un nai murannoashu oaitian. Man yoiqui isca huaino, “Dios nocoqui nichian fasi shara finacaia. Upa Diosin a shara huapanacaran,” ishon man uhuunoa yoishquin, —ishon Jesús ato yoini ahuunoa.

24

Jesús yoini Dios fu tsanti pushu paoinshquiran ishon

Mr 13.1-2; Lc 21.5-6

¹ Ascatan Jesús Dios fu tsanti pushu murannoashu caiton non afu rafuafoan yoini, —Ifon, oinpon. Nocon Dios fu tsanti pushu fasi sharash-tacoinran, —non huaiton. ² Noco cumani, —Ai. Nan icon. Natian Dios fu tsanti pushu toquiri putsamuashu cunuacua sharashtacoin. Ascafashu nan man oiain chipo paoincanocai afanan rato toquirishta tushushquima, putsamushquima. Nantifi paoinquin cuyocoinskirian, —ishon Jesús noco yoini.

Nan cuyoaitian ahuarao iishquiae cuscan

Mr 13.3-23; Lc 21.7-24; 17.22-24

³ Ascatan machi Olivo ano mapufaintan Jesús tsaoni tsoa futsa anomano non afu rafuafoan yocaqui isca huani, —¿Nan min yoiiae cuscan ahuitian ishquimun? ¿Ahuuscashomun non tapitiroquin nantifi cuyoaitian min afanan oshquiai? Noco yoihue, —non huaiton.

⁴ Jesús noco cumani, —Oinfain mato paranonfoma. ⁵ Yora ichapafoan “Un Cristoran,” ishon mato parapaishcani. Ascashon yora ichapatori parashcani. ⁶ Ascaino mani futsafo ya futsafo rutunainfoan man nicashquin. Ascará

nicacani ratuyamacahuun. Un mato yoimisi cuscan nanscacoin aiquin. Ascafia nantifi cuyoaitian icataima. ⁷ Mai futsa ariafo fu futsafo ya rutunainfoanno mani futsafori mani futsafo ya rutunanshquicani. Ascaino mai futsafoanri yora tushuomafo icaifoanno. Mai futsafo ari fasi mai nayanaiyaishquin. ⁸ Nanscaifin omitsiscai taushcaniquin. Ascafia chipo fasi finacai omitsiscashcani.

⁹ Ascano mato achicashon omitsisca huaquin mato rutushcani. Uhuunshon manifotiton mato noicasmashcani. ¹⁰ Ascaino nantianri atirifi yorafoan ua cachiquiri huashquicani afanancatsoan ua icoira huashquicanima. Nanfo afiranana achinantanananshcani noincasmatanancani. ¹¹ Ascaino nan fuparamitsamisifoan yoiqui isca huashcani, “Unfin Diospan tsain yoimisiquin,” ishon mato yoishcani. Afocai Diosin tsain yoimisiyamafiaflashon yora ichapafo ato icoira huamashcani. ¹² Ascaifoanno fasi yora chaca huaquin finacoinshecani. Ascashocai afanan atirifi yorafoan Diosi noishcanima. ¹³ Ascafia nan omitsisca huafiaifoan tsoan ua cachiquiri huatama tunufain uhuun tsain tanasharacun un cushusharatiro Uhuun Upa Diosin icano afu ipasharanon. ¹⁴ Ascano nan tsain shara Diosin nantifi yorafo iquinai cuscan manifoti uhuun tsain yoimisifoan yoiaitian un afanan oshquin.

¹⁵⁻¹⁶ Ascacun Daniel nan Diosin tsain yoimisiton inon pacoai cuscan cunuqui isca huani,

“Dios fu tsainti pushu muran ahuara fasi chacacoinfo futsafoan huanonpacorran,”

ishon cununi. Ascacun nan tapicahuun. Daniel cununi cuscacoin aiton oin nan Judea ano icafoan machi ari ichoriscatacahuun. ¹⁷ Ascan tsoa pushu fomancayan niashucuai afanan ahuun pushu muran iquitiroma ahuara fishquin. Ascatama ichoriscatacahuun. ¹⁸ Nanscarifiai tsoacai mau ano yonofiai afanan ahuun pushu ano nasotiroma ahuun sahuuti fishquin. ¹⁹ Ascacun ohua ainfo nan facu nanuafó yafi aton facu yomumishti chocho acaifo omitsiscaashcani. ²⁰ Ascacun Upa Dios cuficahuun nan omitsiscaitian oipacutian yafí tunutitianri ascanonma. Ascan nantian ascayamaino man ichoima. ²¹ Nan omitsiscaitiancái tsoan ascara oinyomisima cuscara fasi yorafo omitsiscaí finacoinshcáni. Diosin yora onihuakin tau huani chaincái tsoa omitsiscái ascayomisima. Ascashucuai tsoari afanan omitsiscái ascanacama. ²² Ascashu nan omitsiscaifotian nantifi yorafo cuyocuashquin. Diosin ahuun yorafo nan catoanfo atohuun ramapaiqui omitsiscaifotian ato shatumariscashquin. ²³⁻²⁵ Ascacun ua nicasharacahuun. Omitsiscaifotiancái icataima iquisi un mato yoiyoi. Nan omitsiscaifotianri nan fuparamitsamisifo fucani. Fucashon yoiqui isca huacani, “Un Cristoran,” ishon yoi yamarai “Un Diospan tsain yoimisiran,” ishon nanfoan yoishcani. Ascashon nanfoanri Satanashuunshon tsoan atiroma cuscara mato ismaquin mato parapaishcani. Ascan Diosin nan catoanfo ato cushuyamaino nanfoanri nan fuparamitsamisifo icoínra huaacuana. Ascaíno nantian mato yoishcani, “¡Oincapon! Nanfin nocon Cristoqui,” ishon yoi iyamarai, “Nanno chaimashta Cristo nocooqui

oaran,” ishon yoiaifoan ato icoingra huayamacahuun.

²⁶ Ascashon nanfoanri yoicani, “Cristo tsoan istaipama ano noocoaran,” ishon mato yoiaifoanno ari foyamacahuun. Nanscarifi aquin mato yoishcani, “Criston nan pushu cunu muran iquieran,” ishon mato yoiaifoan ato icoingra huayamacahuun. ²⁷ Ufico un oaiton man ua shafacafi oinshquin. Canan facaicaiton shafacafi nantio non oinriscatatiro. Nanscarifiai unfin Diospan Facuquin un afanan oaiton nantifi yorafoan ua shafacafi oinshcani. ²⁸ Ahuara naa nanno cotocotofo nocoriscatiro. Nanscarifiai un noocoaitian ua tanamisifo uqui furiscashcani.

*Diospan facu nasoaitian
Mr 13.24-37; Lc 21.25-28*

²⁹ Ascashu nan omitsiscaifo cuscan anaitiano fari afanan chashayamafain oshuricai afanan chashashquima faquishicoin iishquin. Ascaino fishifori nai ariashu pacui futsushquin. Nantifi nai murannoafori nayanaiyaishquin. ³⁰ Ascashon ahuarafo nai arishon un ismai cuscacoin aiton tapitirofo un afanan mai ano nasoai cuscan nantifi yorafoan tapinonfo. Un Diospan facushon un nantifi iquinai cuscan. Un nai murannoashu coin camaqui fotoaiton oincani manifoti nan icoingra huamafo fasi ratucani uaishcani. Uhuun curushhuunoashu un fotoaiton oincani. ³¹ Ascaino nantianri uhuun oinmatifo ufu nai muran icafo un nichishquin aton manuti fasi curushcrai chaan chaan acaino uhuun yorafo manifoti anoafu yafi nai murannoafori uqui fushcani.

³² Ascacun un mato fana huiguerahuunoa ahuara futsa yoinon. Ua nicasharacahuun. Huigera pui risquisi futsuaiton man tapitiro faritian itiro cuscan. ³³ Nanscarifiai nan un mato yoiai cuscacoin aiton tapicahuun mun oti chaima nanscacoin aiquin. ³⁴ Ascacun un mato icon yoi. Ahuarafu un mato yoiai cuscacoin aiton nataishoma oinyocani. ³⁵ Ascaino nai yafi mai cuyoshquin. Uhuun tsain cayacafi iconcoin fianananciai apanacama. Un mato yoiai cuscacoin aashquin.

³⁶ Ascafia ahuitiaran un nai ariashu afanan fotoainocai tsoan tapiama. Diosin oinmati afu icafoanricai tapiafoma. Urifi uhuun Upa Diosin facufiashocai un tapiama. Nan uhuun Upa Diosin fustitofin tapiquin. ³⁷ Noco shuni Noé niyoano inifo cuscacoinrifi afanan un oaitian nanscarifi ashcani. ³⁸ Ascano nantian tsoan Dios shinantama pii sharafain ayafain fiananshara-cainaifoanno. Fai tahuan noconi. Nanscasi ari-aifoanno Noé ahuun shashohuan muran iquini. ³⁹ Ascashu iquiffiaitocai tsoan tapinima fai tahuan nocoai. Ascashu nantifi yorafo asai futsunifo. Nanscacoainrifi aashcani un afanan oaitian. Ua shinantama afi apaiyaifo cuscasi huarialifoanno. ⁴⁰ Ascaino nantianri nocofunu rafu mau ano yonocani futsa uari cai yamariscatanaino. Futsa nitushquin omitsiscapanacafo muran caashquin. ⁴¹ Nanscarifiaiyainfon rafu nanincani. Futsa uari cai yamariscatanaino futsa nitushquin omitsiscapashquin.

⁴² Ascacun itisharacahuun. Un maton ifofiacucai marifi man tapiama ahuitiamain

un afanan matoqui oshquicain. Un mato yoimisi cuscan nanscacoin acahuun. ⁴³ Ua nicasharacahuun tapishcaquin. Pushu ifoan iquisi itisharashon yomutso yamu ahuuscaraino ahuun pushu muran iquiai tapishocai iquimatiroma. ⁴⁴ Nanscarifiai marifi itisharacahuun. “Iscaino nocon Ifo oimaran,” ishon shinanyamacahuun. Ahuuscara atanaino un matoqui nocoriscaquin.

*Oinmati rafu futsa ifoan yonoai cuscacoin aino
futsa nan yonoai cuscacoin aim*

Lc 12.41-48

⁴⁵ Man tapinon un mato yoi ahuu cuscaramain oinmati shara itiroquin. Niaifocoin mai futsa ari caquin niaifo patashari yoitiro isca huaquin, “Uhuun oinmati futsafo ato tushu shafatifi inanhun. Nanticoin rafu ato pashcananshara huahuun. Ascashon ua ato cushusharashohuun,” huafaini catiro. ⁴⁶ Ascatan niaifocoin afanan nocoshon oian ahuun niaifo patashari nan yoia cuscacoin aano fasi aqui unimacointiro. Ascashon naan shara huatiro. ⁴⁷ Ascacun un mato icon yoi. Nan niaifoan ahuun oinmati yoi, “¡Aicho! Natian nantifi uhuunafo mian cushusharashotiroran,” ishon yoitiro. ⁴⁸ Ascafia niaifo patashari chacapan ahuun nomuran shinanquin isca huatiro, “Uhuun ifo funa nasoimaran,” ishon shinanquin. ⁴⁹ Oinmati futsafo nantifi suntuqui futsatiro. Ascashon shafatifi nan paunmisifo ya pauncain monocai. ⁵⁰ Ascashon shinantiro isca huaquin, “Natiancái uhuun niaifo oimaran,” ifiaino samamashta nocoriscatiro. ⁵¹ Ascashon niaifoan nan

niaifo patashari fasi onaintimai. Asca huatan ahun oinmati futsafo yonoqui isca huai, “Nan omitsiscapanacafo muran fuparamitsamisifo ano nan chaca potacahuun,” ishon ato yoishquin. Ascan nannoashu uaiqui omitsiscapanaca.

25

Diez shomayafohuunoa Jesús ato yoini ahuara futsa ato tapimashquin

¹ Ascatac diez shomayafohuunoa un mato yoi un oaitian ahuu cuscaramainquin un mato tapimashquin. Ascatac nan diez nan nocofunun rama ainfo fiai manafo atofu fuusishcaquin. Ascafia nan nocofunun ahuun ahuin fiicashu nasoataimacai tsoa afi ranan fuusi tauafoma. Nan diez shomayafoan iquisi lamparina foafo. Nocofunu manai focani. ² Nan muci fustiti shomayafoan tsoancai cayacafi shinansharayamafain itisharafoma. Asca nan muci fustiti futsafoan shinansharafain iquisi itisharafo. ³ Nan shinansharaimafoancai aton lamparina fofiaquin tsoan kerosene foama. ⁴ Ascafia nan shinansharafain itisharafoan aton lamparina fofain iquisi keroseneri foafo. ⁵ Ascafia nan nocofunun ahuun ahuin fiaicai funa nocoyamaino nan shomayafoan manariacani fasi oshapaicoincani oshafo. ⁶ Ascashu oshafoanno futsan yamu nacuahuanaino oi ashcafimin ato cuna, “Nan ainfo fiicaitan man oiquin. Moinifoancahuun. Non ihui sharanon,” ato huaa. ⁷ Ascaino shomayafo moinifoan aton lamparinafo otaqui futsafo. ⁸ Ascashon nan muci fustiti shinansharaimafoan nan itisharafo

yocani “Maton kerosene ichapamashta noco inancahuun. Man nocon lamparina nocaiquin,” ishon ato yocaifoan. ⁹ Nan itisharafoan ato cumani, “Ma. Noconariraca itiroma. Ascan kerosene inanmitsafó ari fotacahuun fiishcaquin,” ato huanifo. ¹⁰ Ascaino kerosene fí focani foaifoanno nan ahun ahuin fiai nocotan iquicainaino nan shomaya itisharafo afu pushu muran iquiafo fuuishcaquin. Ascashon caincaiti fupoafó.

¹¹ Ascaino chipo shomaya futsafo nococashon yoiafo, “Ifon. Noco fupushohuun non iquinon,” huaifoan. ¹² “Un mato fupushotiroma. Icon un mato yoi. Uncai mato oinmisima,” ishon ato yoini. ¹³ Nanscarifiai ahuutiaran un afanan matoqui os-hquicain tsoan tapiama. Ascacun itisharacahuun.

Puihuunoa yoiqui Jesús ahuara futsa ato tapimaní

Lc 19.11-27

¹⁴ Afanan un mato ahuara futsahuunoa yoi. Nocofunu ahun pushu anoashu chai caquin ahun oinmatifo cunashon yoiquin isca huani, “Uhuun pui ua cushusharashocahuun,” ato huafaini cani. ¹⁵ Ascashon ahun oinmati rafu non fusti ato pui inanni. Futsa cinco mil pui inanfain futsa dos mil pui inanfain futsari mil inanni. Nan tapiafo cuscan ato inanpacua. Ascan ato inantan mai futsari cani. ¹⁶ Niaifoan caquin nan cinco mil inan cuscahuunshon samamashta ahuarao fiaflashu afanan inanmitsashon ahun rafanan cinco mil fia. Asca huaquin diez mil man fia. ¹⁷ Nanscarifi aqui nan pui dos mil fiaton afanan dos mil fia. ¹⁸ Ascan nan

oinmati mil pui fusti fiaton funocasmaquin mai poquishon amuran ahuun niaifo pui huashoan.

¹⁹ Ascashu fari ranan finontan afanan niaifo ahuun pushu ano nasoni. Nasoshon nan rafu non fusti ahuun oinmati ato cuna ahuutimain fishoafquin ato yocashquin. ²⁰ Ascano nan cinco mil pui inanniton yoiqui isca huani, “Niaifon, mian cinco mil pui inanni. Ascafia mun mia natian afanan cinco mil fishoan. Ascan oinpon. Naquian,” ishon inanni. ²¹ Ascaiton ahuun niaifoan yoini, “¡Aicho! Mian fasi shara huaa. Un mia yoia cuscacoin min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

²² Ascano nan dos mil pui inanniton arifi yoiqui isca huani, “Niaifon, Mian dos mil pui inanni. Ascafia mun mia natian afanan dos mil fishoan. Ascan oinpon. Naquian,” ishon inanni. ²³ Ascaiton nanrifi ahuun niaifoan yoini, “¡Aicho! Mian fasi shara huaa. Un mia yoia cuscacoin min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

²⁴ Ascan nan mil pui inanniton arifi yoiqui isca huani, “Niaifo, mun tapian mincái tsoa shinainma. Minricai nocohuun ramapaima. Non mia yonoshofaitocai min noco ahua inantiroma. Mina fusti itiroran. ²⁵ Ascacun un ratuqui min ua inan cuscahuunshon ahuarafó fipaifiai un

funotiroracati, ishon un shinan. Ascacun nan mian inan cuscan un mai muran onua. Ascan natian mun mia fishoan. Oinpon. Naquian,” huaiton.

²⁶ Ahuun niaifoan cumani, “Min fasi chacacoin. Minfin oinmati shanishuniquin. ¿Min shinanmun un futsafo shinainmaquin? ¿Uaraca futsafoan yonoshonaiton un ato ahua inanma? ²⁷ ¿Ascan nannori shinanfiaquin ahuuscaquin mai muran min pui huamun? Asca huatamarocon nan pui huamisifoanno min huacun un nocoshon paratamari un ficuanaran,” ishon niaifoan yoini.

²⁸ Ascashon ahuun niaifo patashari yononi, “Nan oinmati shanishuni ahuun pui fianhuun futsa nan cinco mil aya inanshquin. ²⁹ Ascano nan ua icoinra huacoinnaffin un fasi paratamacoin inainquin. Ascan nan ua icoinra huama ichapama aya cuscan futsan flain. ³⁰ Ascacun nan oinmati ahua tapiama chaca faquish muran potacahuun. Nannoashu fasi omitsiscai fasi uainon,” ishon niaifoan yoini.

Cuyoaitian Jesús yoishquin ratofomain afu ipatiro iyamarai omitsiscapanacafo muran focaniquin

³¹ Ascacun un mato afanan yoi. Unfi Dios arishu mai ano fotoniquin. Ascashu un afanan oaitian nantififain aton niaifocoin un iishqui. Un Diospan Facucoinuncun nantififain ua oinshcani. Uhuun oinmatifo ufu nai muran icafoya un oaiton. Nantianri un ato yoishquin ratofomain Diospan yorafo iyamarai ahuun yorafo-maquin. ³² Ascashu nantifi manifotifi uqui fushcani. Chashoan cushumisiton ahuun chashoanfo

yafi nan chashoan ointsafo aton anu cabra aton ichanan huai. Nan chashoanfosi tiri futsa huafain nan cabrafori tiri futsa huai.³³ Ascashon ahuun mumihuuri chashoanfo huafain ahuun mushqui-huuri cabrafo huai. Nanscarifiai ua tanamisifo un tiri futsa huafain nan ua icoinra huamafo un tiri futsa huai. Ua tanamisifo uhuun mumihuuri huafain uhuun mushqui-huuri nan ua icoinra huamafo ato huashquin.

³⁴ Ascatan un Niaifoshon nan ua tanamisifo un yoiqui isca huashquin, “Uqui fucahuun. Uhuun Upa Diosin mato unimamanon. Nan mai onihuaitian matohuunoa shinanquin isca huani, ‘Un icano un ato iquimanonpacoí uhuun yorafo inonfo. Uhuunafori atona inonpacoiran,’ ishon Upa Diosin shinanyoni.

³⁵ “Man ua shara huamisi. Ascacun uhuun Upa Diosiri mato shara huashquin. Un fonaicaiton man ua pimamisi. Un nomiaiton man ua ayamamisi. Un matoqui nocaiton ua oinyamafiamisishaquin man ua yoiqui isca huamisi, ‘Uhuun pushu muran iquiyohuu. Un mia pimafain min nuno uhuun pushu muran oshatiro.’³⁶ Un sahuitiromacuri man ua sahuti sahuumaní. Un isinincaitori man ua cushusharamisi. Ua cunu muran iquimanafaanno man ua oin camisiran,” ishon ua tanamisifo un yoishqui.

³⁷ Ascacun ua tanamisisharafo uhuun Upa Diosin aton chaca soashona. Nanfoan ua cumacaquin isca huashcani, “¿Ifon, ahuutian non mia oinmisimun min fonaincaiton non mia pimafain min nomiaitorí non mia ayamamisi?³⁸ ¿Ahuitianritsi min nocouqui nocaiton non mia oinyamafiamisishaquin non mia nocon pushu

murán iquimafain min sahuutiromacuri non mia sahuuti sahuumamisi? ³⁹ ¿Ascan ahuutianritsi mia cunu murán iquimanafoan non mia oincani?” ishon ua yoishcani.

40 Ascaifoan un aton niaifoan un ato yoiqui isca huashquin, “Uhuun yorafo nan ua icoínra huafo futsafoan atohuunoa yoiqui isca huamisi ‘Nancai ahuamaran,’ ishon man yoimisi. Asca nan uhuun yora ahuamafashi man ato shara huamisi cuscafin nan uari shara huai cafisca man ato huamisiquin,” ishon un ato yoishquin.

41-43 Ascashon nan ua icoínra huamafo tiri futsa niafoan un ato yoiqui isca huashquin, “Manfin ua chaca huamisiquin. Un fonainfiaitocai man ua pimamisima. Un nomiaitoricai man ua ahuara ayamamisima. Un matoqui nocofiaitocai ua oinyamafiamisishaquin man ua pimayamafain un sahuutiromafiacuri man ua sahúumamisima. Un isinincaitoricai man ua cushumisima. Ua cunu murán iquimanafoanno cai man ua oincamisima. Ascacun umaquinoashu fotacahuun. Nan yoshin chaca Satanás yafi afu yoshin chaca futsafo Upa Diosin ato chi urumanhuan itishara huashoan nannori mato potai. Nannoashu nanfoya man omitsiscapashquin,” ishon un ato yoiaiton.

44 Nan ua icoínra huamafoan ua cumaquin isca huashcani, “¿Ifon, ahuutiamun non mia oinmisiquin min fonaincaiton non mia pimayamafain min nomiaiton non mia ayamamisima? ¿Ahuutianmun min nocooqui nocofiaiton oinyamafiamisishaquin non mia cushusharayamafain min sahuutiromacun non mia sahuumamisima? ¿Ahuutianritsi min

isinincaiton mia cushuyamafain mia cunu muran iquimafiafo non mia oin camisimamun?” ishon ua yocashcani.

⁴⁵ Ascaiton un ato cumaque isca huashquin, “Un mato icon yoinon. Nan ua icoinra hua futsafo man yoimisi isca huaquin, ‘Nancai ahuamaran,’ ishon atohuunoa man yoimisi. Atoasca huaquifin nan ua shara huaima cafisca man huamisiquin,” ishon un ato yoishquin.

⁴⁶ Un ato nannori yoiaino umaquinoashu omitsiscapanacafo muran foshcani. Ascaino nan ua icoinra huafu uhuun Upa Diosin aton chaca soashonafo un icano ufu foshcani ufu ipashcaquin,—ishon Jesús ato yoini.

26

*Jesús rutushcaquin afi ranan yoinannifo
Mr 14.1-2; Lc 22.1-2; Jn 11.45-53*

¹ Ascano noco yoiqui anaititan Jesús afanan afu rafuafosi tsain futsa noco yoiqui isca huani,
² —Man man tapian nocon fusiti shafa man nococuana. [Diosin ahuun oinmati nan afu ica yonoa Egipciofoan aton furun iyoafofosi rutuqui futsani. Ascafiaquicai nocon shunifoan aton furun iyoafofo finomani ato rutuquima.] Nan non shinamisi nocon fusiti osha rafutan iqui. Ascan nantianri ua ato achimacani ua mastanonfo,— ishon Jesús noco yoini.

³ Ascan nantianri nocon yorafohuunshon Dios cufimisi niaifofo futan Moisés cununi cuscan tapimamisiso non Dios fu tsainti pushu cushumisiso Caifás pushu ano ichanancani. Nan Caifás nocon yorafohuunshon Dios cufimisi

niaifocoin ini. ⁴ Ascashu ichanancashon shinannifo, —¿Ahuuscashomain non Jesús achinoanti rutushquin? —ishon ahuara chanishtahuunshon rutupaicaquin. ⁵ Ascacun yoinifo, —Fusititiancai non achitiroma yorafo fasi mucacani nocouqui sinatiroforan, —icashu yoinannifo.

*Ainfoan Jesusqui inti ocani
Mr 14.3-9; Jn 12.1-8*

⁶ Ascatan non Jesús fu Betania ano cani. Caashu Simón pushu muran non iquini. Nan Simón nami tocoi futsua ini. ⁷ Jesús nannoshon nocó futan piaino ainfo inti tsomashu oni aqui ocashquin. Nan moticanun ahuun anu alabastro. Amuran ahuun inti fasi paratamacoin ahuun pui nuua. Ascashon ainfoan Jesús ahuun mapoqui inti ocani.

⁸ Ocaiton oin non afu rafuafo ainfoqui non sinacoinqui yoini, —¿Ahuuscaimun nan inti fasi paratamacoin ahuun pui nuua na ainfoan ocaiqui? ⁹ Nan inti ocatama inanmitsashon ahuun rafanan pui fishon nan yora ahuuomafo inanshara icuanaran, —icashu non yoinanni.

¹⁰ Ascaiton non yoiai cuscan Jesús onanshon nocó yoini, —¿Ahuuscaimun na ainfoqui man tsain chipuicain? Uafin nanton fasi shara huaquin.

¹¹ Manfin yora ahuuomafo fu ipanacaquin. Ratoran shafatan man ato ahuara shara huashotiro. Ascafia uncai nuno mai ano matofu ipanacama.

¹² Ascan nan ainfoanfin uqui inti ocaquin. Nan yora maiamamaquin inti ocamisifo cuscan un nataiyamafiaiton na ainfoan ua shinanquin uqui inti oca. Uhuun caya iquisi itishara huapai ua

mai huashquiaifo cuscan. ¹³ Ascacun un mato icon yoi. Nan tsain shara uhuunoa manifotiton yoishcani. Nan ainfoan ua rama aca cuscari yoishcani. Ascashon ua shara huaa cuscan ahunoa shinanpacushcaniran, —ishon Jesús noco yoini.

*Judaspan Jesús ato achimani
Mr 14.10-11; Lc 22.3-6*

¹⁴ Noco nannori Jesús yoaino non afu rafuafo doce futsan ahuun anu Judas Iscariote nocon yorafohuunshon Dios cufimisi niaifofo ano cani.

¹⁵ Ascacaini cashon ato yoiqui isca huani, —¿Un mato Jesús achimacun ahuuti pui man ua inantiromun? —ishon ato yocaiton. Cumanifo, —Non mia treinta toro oshopafo inantiroran, —ishon yoinifo. Asca huatan inannifo. ¹⁶ Ascano nantian Judaspan ahuun nomuran shinanqui tau huani, —¿Ahuuscashomain un ato Jesús achimanoanti? —ishon shinanriani.

*Ahuun unutaqui Jesús afu rafumisifo futan pini
Mr 14.12-25; Lc 22.7-23; Jn 13.21-30; 1Co 11.23-*

26

¹⁷ Ascano noco fusiti shafan man nocoano nan shafa misi farashati maisi non pimisi. Nantian non afu rafuafo Jesusqui cashon non yocani, —Ifo, na shafan nocon fuusititian. Nan nocon shunifoan ato facu iyoafifo Diospan nai oinmati finonmani ato rutuquima nan non shinamisi. ¿Ascan rani min noco nichipaimun non mia itishara huashonon no futan anoshon piishquin? —ishon non yocani.

18 Jesúś noco cumani, —Jerusalén ano fotacahuun. Nanno nocofunu futsaqui nocoshon yoiqui isca huacahuun. “Nocon tapimamisiton mia tsain fomaqui isca huaa, ‘Un naitian man nocoti chaimashtaqui. Nocon fusititian non min pushu muranshon piiran,’ ishon noco Jesúś yoíaran,” —ishon yoitacahuun noco huani. **19** Ascashu nan noco yoia cuscacoin huaquin cunu muran non itishara huani. Nannoshori chashoanun facu non pichani piishquin.

20 Man fari caino non afu rafuafoya Jesúś sapa ano tsaoni. **21** Nannoshon non piaiton Jesúś noco yoini, —Un mato icon yoi. Nan ratoran futsan man ua ato achimairan, —noco huaiton. **22** Nicai non pusinima. Ascashon non yocani, —¿Umun, Ifon? —ishon nantifiton non yocapacuni.

23 Ascaiton noco yoini, —Nan man ufutan taso murannoá misi pocotan piaitofin man ua ato achimaiquin. **24** Ascan Upa Diosin tsain inon pacuai uhuunoa cununi cuscacoinfin un naicain. Ascafia nan nocofunun ua ato achimanai cainyamanifin shara icuanaquin, —ishon Jesúś noco yoíaiton.

25 Nicaquin Judas, nan ato achimaiton Jesúś yocani, —¿Umun, Ifon? —huaiton. —Aifain. Minfiqui, —huani.

26 Ascashon piaifoanno Jesúś misi finifoantan iquisi apa Diosin cufiyoni —¡Aicho! Upa, min noco cushusharafafainiran, —huatan noco yoini, —Na uhuun caya cuscara. Picahuun, —ishon torupacushon nocoti inanni.

27 Ascashon cucho finifoan afanan Apa cufini, —¡Aicho! Upa, min noco cushushararan, —huatan cuchoqui fimi unu manuta noco inan-

qui yoini. —Nantififain na ayacucahuun, —noco huani. ²⁸ Asca huatan noco yoini, —Naafin uhuun imi cuscaraquin. Uhuun imi focain un nai. Nantifi yorafoan chaca huamisihuunoashu un nai aton chaca soashonon. Un ascano yora ichapafo Diosin potapacunonma. ²⁹ Ascacun un mato icon yoi. Uncai funa afanan mato futan ayaima. Nan uhuun Upa Diosin niaifoan nantifi iquinaitian un afanan maton futan ayashquin, —noco huani.

³⁰ Ascano man ahuun tsain yoiqui anaititan Diosin tsain non fanainni. Ascatan machi ahuun anu Olivo ano non cani.

*—Pedro min futsafo, “Un Jesús oinmisimaran,”
ishon min yoiran, —Jesús huani*

Mr 14.26-31; Lc 22.31-34; Jn 13.36-38

³¹ Ascashon afanan noco yoini, —Na yamutafin nantififain man ua potafaini ichoi caiquin. Diosin tsain cununi isca huaquin,

“Unfi chashoanfo cushumisi rutuicain.
Ascaino chashoanfo ichoi futsucaniran,”

icashu cununi. Nanscarifiai ua rutuaifoanno na yamutan man uhuunoashu ratufaini ichoicai.

³² Ascafia un funiashu Galilea ano un cai tauicai. Ascano man uqui chipo nocoicashquiran, —ishon Jesús noco yoiaiton.

³³ Pedronun Jesús cumani, —Nantifiton mia potafiaifoannocai un mia potaimaran, —huaiton.

³⁴ Jesús Pedro yoini, —Un mia icon yoi Pedro. Tacara cuoataima min ato yoiqui “Uncai Jesús oinmisimaran,” ishon min ato yoiqui rafunon fusti huairan, —huaiton. ³⁵ —Ma, Ifo. Un mifu nafi aquicai un ato yoinacama un mia oinmisimaran,

—ishon Pedronun yoini. Ascaiton norifi nantifton non nannori yoini.

*Jesús Getsemaní anoshon apa cufini
Mr 14.32-42; Lc 22.39-46*

³⁶ Ascatañ ihuifo mapoano ahuun anu Getsemaní nanno Jesús no fu cashon noco yoini, —Nuno tsaocahuun. Uhuun Upa un cufiyotanon, —noco yoini. ³⁷ Ascatañ Pedro yafi Zebedeo ahuun facu rafu Santiago yafi Juan nan rafu non fusti ato iyoni. Nan fasi omitsiscai tauai cuscan shinain fasi ahuun nomuran isicoinni. ³⁸ Ascashon ato yoini, —Un fasi omitsiscai cuscan uhuun nomuranshon shinain mun naacuana. Ascacun nunoshon oinyocahuun. Oshacaquima, —ishon ato yoini.

³⁹ Ato asca huatan chaimashta caashu fuopacucahuan Apa Dios cufini, —Upa un omitsiscai cuscan mian numatiromainquin ua numahuu. Ascaflashon un apaiyai cuscan huaquima nan min apaiyai cuscan fusti ua huahuu, —huani.

⁴⁰ Ascashon apa cufinquin anaititan afanan atoqui oquin oian man oshafo ini. Ascaiton Jesús Pedro yoini, —¿Man u futan Diosin cufiyotioma-mun? ⁴¹ Oshacaquima. Dios cuficahuun Satanás mato chaca huemapaiyai cuscan huashcaquima. Ascashon Diosin mato amapaiyai cuscan marifi huapaifiaquicai Diospan curushyamainocai man atiromaran, —ishon Jesús ato yoini.

⁴² Ato asca huatan afanan apa Dios cuficaicani. Cashon apa yoini, —Upa, min ahuara futsa yorafo numashqui atiromamainquin nan min apaiyai

cuscan huahuu. Unfi man itisharaqui atohunoashu omitsiscacaini naashqui, —ishon Jesús apa cufini.

⁴³ Ascashu afanan atoqui oquin oian afu rafuafo afi oshafo ini. Fasi osha murancoianfo. ⁴⁴ Ascaíno afanan ato anoashu cashon apa Dios cufini. Nan cufia cuscacoin afanan nannori cufini.

⁴⁵ Ascatan afanan oquin oian afi oshafo ini. Ascaiton ato yoini, —¿Manmun afi moiama? Natianfin nan chaca huamisifoan ua ato achimai fucaniquin. ⁴⁶ Funicahuun. Non canon. Nan nocofunun ua ato achimai man oquin, —ato huani.

Jesús achinifo

Mr 14.43-50; Lc 22.47-53; Jn 18.2-11

⁴⁷ Ascaíno nan Judas Jesús fu rafumisi futsan oaino a yorahuanrasi nopu yafi coshatifo tso-macanashu funifo. Nocon yorafohuunshon Dios cufimisi niaifofoan futan Dios fu tsainti pushu niaifo patasharifoan ato yonoa funifo. ⁴⁸ Nan Judaspan yorafo iquisi yoiqui isca huani, —Un Jesús tamoquei tsoacaiton tapicahuun nanfin Jesusquin achicahuun, —ato huani. ⁴⁹ Ato yoiqui asca huatean samamashta Judas Jesusqui nocoshon ahuun tamo tsoacatan yoini, —Tapimamisiton, man yamuaran —ishon yoiaiton.

⁵⁰ Jesús cumani, —Uhuun yoran, nan mian apaiyai cuscan ua huahuu. Nanscayoi min oaquin, —huani. Ascaiton nan Judas fu fuafoan Jesús achinifo niaifofo ano iyoshcaquin. ⁵¹ Ascaiton Jesús fu rafua futsan nopu fitan nocon yorafohuunshon Dios cufimisi niaifocoinin ahuun oinmati pashtufain rurani.

⁵² Ascaiton Jesús yoini, —Unuhuu. Min nopu ahuun ona muran huahuun. Nan nopun yora rutuafin arifi nopun natiroquin. ⁵³ Uhuun Upa Dios un yocaitofin ahuun oinmatifo afu icafo 72,000 ua nichishotiroquin ua cushui funonfo. ⁵⁴ Ascan uafin uhuun Upa Diosin ahuun nai oinmatifo ua nichishotiroquin ua cushui funonfo. ¿Ascafia ahusscashumun Diosin tsain uhuunoa cununi cuscan un yorafihuunoashu natiromaquin? Ascan uncai Upa Dios cufima ua ahuun oinmatifo afu icafo ua cushunon,—ishon Jesús ato yoini.

⁵⁵ Ascaino nantianri Jesús achipaiyaifoan ato yoini, —¿Unmun yora popu cusscaracun man ua nopu yafi coshatifo yashon achi fua? Shafatifi un Dios fu tsainti pushu muranshon un mato yoiflaitocai man ua achipaiti huama. ⁵⁶ Ascafia nan man ua acai cuscan Diosin tsain yoimisifoan uhuunoa cununifo cuscan nanscacoin man ua huairan,—ishon Jesús ato yoini. Ascaino non afu rafuao nantifi non amaqi ichoni.

Jesús niaifofoan ointaifi iyonifo

Mr 14.53-65; Lc 22.54-55, 63-71; Jn 18.12-14, 19-

24

⁵⁷ Ascano achicashon nocon yorafihuunshon Dios cufimisi niaifocoinin ahuun pushu ano iyonifo. Nan niaifoan ahuun anu Caifás. Nan nori niaifofo ichanannifo. ⁵⁸ Ascaino Pedro acachori cani. Acachori cafiai fishtatama cani. Dios fu tsainti pushu cushumisifoya Pedro niaifoan umainti ano tsaoni Jesusmain ahuusca huacaniquin ishon oinpai.

⁵⁹ Nannoshon niaifofoan shinanpainifo, —¿Nonmun raquiri huatiroquin Jesús ahuara chaca

huaran ishon rutushquin? Ahuacai ahuuasca huaiton non nicayomisima non rutuai, —icananshu nocon niaifofo afi ranan yoinannifo.

⁶⁰⁻⁶¹ Yora ichapafoan, —Jesús ahuara chaca huaran, —ishon ahuunoa tsain chaca yoinifo. Paracaquin. Ascafia niaifofoancai Jesushuunoa ahuara chaca iconcoin nicanifoma rutushcaquin. Ascashon futsafoan Jesushuunoa tsain chaca huaquin anaitiafoanno chipo nocofunu rafutan niaifofoan ointaifi Jesusqui tsain chaca huanifo. —Man non nicaitan na nocofunun isca huaquin yoia, “Nocon Dios fu tsanti pushu yorafoan aca cuscan unfi choquatiroquin. Ascashon osha rafu non fusti finontan un afanan futsa huatiro. Uncai tsofutan atiroma. Urus fustifin un atiroquin,” Jesús iquitaran, —ishon nan rafutan yoinifo.

⁶² Ascano yorafohuunshon Dios cufimisifo aton niaifocoin nan Caifás Jesús yocani, —¿Miqui tsain chaca huafu cuscan icon iyamarai iconmamun? —ishon yocaino. ⁶³ Jesús puusinima. Ascaiton afanan yoini, —Diosin nan nipamisi ahun anuhuunshon ua yoihuu. ¿Minmain Diospan Furunquin nan Diosin mia catonnimainquin? Ascan natian nannori un mia yonoi. Ua icon yoihuu, —ishon yocaiton.

⁶⁴ Jesús cumani, —Nan mian yoiai cuscafin unquin. Un mato yoinon. Upa Diosin ahuamamishti huatiro cuscan chipo man ua oinshquin. Uhuun Upa Diosin niaifo fu un icun. Uriñimain un afu niaifocoianshu. Ascacun un nai ariashu coinfo camaqui oaiton man ua oinshquiran, —ishon Jesús ato yoini.

⁶⁵ Ascaiton nicai nocon yorafohuunshon Dios

cufimisi niaifocoin, —Un Diospan Fururan, —Jesús icaiton nicai fasi sinacoinni. Ascacun ahuun sahuuti fashnuqui yoini, —Noncái afanan yorafoan Jesusqui tsain chaca huai yopaima. Manmain noficoín ahuun tsain chaca nicaya-maifin, “Un Diospan fururan,” iquifin Dios chaca huaquin. ⁶⁶ ¿Ascacun man ahuusca Jesús hua-paimun? —ishon aton niaifocoinin ato yocaiton. Nantififain, —A rutucahuun, —huanifo.

⁶⁷ Asca huatan ahuun fusoqui cumo michofain sutufain futsan tapasni. Ascashon cashu mut-sama huacaquin. ⁶⁸ Yoinifo, —Min Cristomain-quin min nantifi tapicoian. Asca tsoan mia aca-mainquin noco yoihuu, —ishon cashu mutsama huanifo.

—Un Jesús oinmisimaran, —ishon Pedronun yoini

Mr 14.66-72; Lc 22.56-62; Jn 18.15-18, 25-27

⁶⁹ Ascaino Pedro pushu umainti caashu tsaoni. Ascano nocohuunshon Dios cufimisi niaifoan ahuun oinmati shomayaton Pedro fuchishon yoini, —Jesús Nazaret anoa fu mirifi min afu oaquin, —huaiton. ⁷⁰ —Ma. Mian yoiai cuscacai un tapiamafinquin, —Pedronun aton ointaifi huani.

⁷¹ Asca huafaini caincaiti ano caacun nan-noshori shomaya futsanri Pedro fuchishon ato yoini, —Na nocofunufin Jesús Nazaret anoa fu imisiquin, —ishon yoiaiton.

⁷² Afanan Pedronun yoini, —Ma. Min yoiai cuscafin Diosin tapiaquin uncai na nocofunu oin-misimaran, —ishon yoini.

⁷³ Sama racatan afu niafoan Pedro yoinifo,—Icon. Minfin mirifi Galilea anoquin. Min tsain-huunshon non mia onanran,—ishon yoiaifoan.

⁷⁴ Afanan ato yoini,—Uncai mato paratiroma. Diosin ua oin. Un chanicun Diosin ua chii uru muran potatiro. Nantonfin tapiaquin un mato icocoin yoiaiton. Ascan uncai na nocofunu Jesús oinmisimaran,—ishon Pedronun afanan ato yoini. Ascaino samamashta tacara cuoni. ⁷⁵ Tacara cuoaino Jesús yoia cuscan Pedronun shinantani.—Pedron un mia yoi. Na yamutan tacara cuoataima min ato yoiqui rafu non fusti huai, “Un Jesús oinmisimaran,”—ishon Jesús yoia cuscan shinantani chifi caashu Pedro fasi uaini.

27

Pilato ano Jesús iyonifo

Mr 15.1; Lc 23.1-2; Jn 18.28-32

¹ Ascaino funamanrishta nocon niaifofoan shinapainifo,—Ahuuscashomain non Jesús rutumatiroquin,—icashu yoinannifo. ² Ascantan munushcashon nan Romanon niaifoan ahuun anu Pilato ano Jesús iyonifo.

Judas nani cuscan

³ Asca huashon Judaspan Jesús rutuaifoan nicaquin fasi shinanni. —¡Ohua! Un Jesús ato achimanama shara icuanaran,—ishon shinanni. Ascashu nocon yorafohuunshon Dios cufimisi niaifofo yafi Dios fu tsainti pushu niaifofo ano cani treinta toro paratamacoin ahuun pui nuua ato nasoin cai. Ascacainicashon ato yoini. ⁴—Unfin chaca huaquin. Jesuscái ahua chaca huayamafiamisicun un ato parashon

achimanaran, —ishon ato yoiaiton. Cumanifo, —Ahuuscaquitsi min noco anori yoiyoa. Noncai ascara tapipaima. Mififin min shinanquin, —huaifoan. ⁵ Nicaquin nan Dios fu tsainti pushu muranshon ato naman torofo saafaini caashu afiri rusfipan tunushumuacucahuatan nani.

⁶ Asca huatan Judas cai cachiori niaifofoan nan torofo topinifo. Ascashu niaifofo afi ranan yoinannifo, —Nocon shunifoan yononi cuscan non ahuun rafanan yora rutumana nan puicai non Dios fu tsainti pushu muran huatiroma. Nan pui huati murancai non huatiroma. ⁷ Na torofohuunshon nan cuti huamisi ahuun mai non finon. Nanno yora futsafo non mai huanon, —icashu yoinannifo. ⁸ Ascasho nan mai anunifo —Imi maiiran, —huanifo. Natianri nannori yoiafo. ⁹⁻¹⁰ Ascano nan Diosin tsain yoimisi Jeremías inon pacuai cununi cuscan natian man nanscacoin huaafo. Isca huaquin cununi,

“Israelifoan yoinifo, ‘Non treinta toro inantiro nan nocofunun noco achimashocun,’ ishon yoiafo. Nan torofohuunshon cuti huamisiton ahuun mai fiafo. Uhuun Ifoan ua yononi cuscan un cuti huamisiton ahuun mai fia. Nan scarifi aqui nanfoanrifi aton torofohuunshon cuti huamisiton ahuun mai fiaforan,”

ishon Jeremías cununi.

*Pilato ano Jesús iyonifo
Mr 15.2-5; Lc 23.3-5; Jn 18.33-38*

¹¹ Ascashu Romanon niaifoan ahuun anu Pilato fu Jesús nia ini. Nan niaifoan Jesús yocani, —

¿Minmun Judiofoan niaifocoin? —ishon yocaiton. —Nan min ua yoiai cuscafin unquin, —Jesús huani. ¹² Ascashon nocon yorafohuunshon Dios cufimisi niaifofo yafi Dios fu tsanti pushu niaifofoanri Jesús ahuara chaca huamisiran huafiaifoannocai puusinima. ¹³ Ascaiton Pilato yoini, —¿Yorafuan mia chaca huaifo cuscan min nicaimamun? ¿Min ato cumapaimamun? —ishon yoini. ¹⁴ Asca huafiaitocai Jesús cumanima. Tsain ichapa aqui chaca huafiaifoanricai fustishta ato cumanima. Ascaiton Pilaton ahuun nomuran shinanni, —¡Aira! ¿Ahuuscai ato cumapaimamun? —ishon shinanni.

*Niaifoan ato yononi Jesús rutunonfo
Mr 15.6-20; Lc 23.13-25; Jn 18.38-19.16*

¹⁵ Nan fusititian faritifi a cunu muran iquiafo fusti caimaquin Pilato ato yocapaoni. —¿Ratocai man caimapaimun? —ishon yorafu yocapaoni. ¹⁶ Nantianri cunu muran iquia nocofunu fasi popu rutumitsamisi. Ahuun anu Barrabás ini. ¹⁷⁻¹⁸ Jesús ahua chaca huaiyamafiacun. A icai cuscan apaicaquin nocon niaifofo Jesusqui sinacaquin Pilato ano iyonifo. Nan acaifo cuscan Pilato man tapian ini. Ascacun Pilato nanno yora ichananfo yocani, —¿Ratocaimun un mato cainmashotioquin? ¿Barrabás iyamarai Jesús nan Cristo Diosin catoanran man huamisi? —ishon ato yocaiton. ¹⁹ Ato yocatan tsaoshon manani cumaifoan nicapaiquin. Ascaino ahuin cunu fuma aqui noconi. Cunun yoiqui isca huani, —Nan nocofunu Jesús shara. Ahua chaca huamaquin. Ahuusca huayamahuu. Uhuun

namapan un oian ahua chaca huayamafiašhu omitsiscaiton oin urifi uhuun nomuran ahuunoashu un omitsiscacoinna. Ascacun ahuusca huayamahuu, —ishon Pilato ahuinin cunushoni.

²⁰ Ascafiačun nocon yorafohuunshon Dios cuſimisi niaifofo yafi Dios fu tsainti pushu cuſhumisifoan nanno ichananfo ato yosiquin isca huanifo, —Jesús noco cainmashotamarocon Barrabás noco cainmashohuun. Ascashon Jesús rutuhuu ishon Pilato yoicahuun, —ishon ato yononifo.

²¹ Ascacun Pilato ato yocani, —¿Nan rafu ratocaimun man fuchipaiquin un mato caimashonon? —ishon ato yocaiton. “Barrabasquian,” huaifoan. ²² —¿Un Barrabás caimashomun un Jesús nan Cristo Diosin catoan un ahuusca huaicai? —ishon ato yocaiton. Afanan nantifiton yoinifo, —Mastahuun, nanon, —huaifoan.

²³ Ascaifoan Pilato ato cumani, —¿Ahuuscacufin? ¿Ahuamun chaca huaquin? —ishon ato yoiaiton. Ascafia fasi curushcain yoirianifo, —Mastahuun, nariscanon, —huanifo.

²⁴ Ascaiton Pilato oian tsoan nicapaitama fasironcon mucai finaifoan. Masu fitan aton ointaifi muchoquimuni. Muchoquimutan ato yoini, —¡Oincapon! Uhuun nuama. Un Jesús cainmapaifiainocai man cainmapaima. Manrocon fasi rutupai. Ascan matohuunfi nuuaquin, —ishon ato yoiaiton. ²⁵ Nantififain cumanifo, —Nanscanon. A nai nocohuun nuunonquin. Nocon facufohuunri nuunon, —ishon yoinifo.

²⁶ Ascaifoan nicaquin Pilato Barrabás ato cainmashoni. Ascashon ahuun ranushumuafó yononcun fíchi cunoqui tuchiatón Jesús coshaqui futsanifo. Asca huashon mastanónfo iyónifo. ²⁷ Nan ranushumuafóan Jesús iyoafó anofín niaifoan ahuun pushu iniquin. Ascano nan niaifo cushumisifoan ranushumuafó chifinoafó cunani Jesús oin funónfo. ²⁸ Ascashon ahuun sahuuti shorifain futsa shonan sahuumanifo. ²⁹ Ascatan mosha chainipafo maiti huashon maimafain poquiti ahuun mumihuuri tsomamashon ratocounun mai chachishon yoinifo, —¡Aicho! Minfin Judíofoan aton niaifoquin, —ishon cashu mutsama huanifo. ³⁰ Ascashon aquí cumo michofain ahuun poquiti fiantan ahuun coshapa-cunifo. ³¹ Ascashofín cashu mutsama huacatan nan sahuuti shonan pucashon ahuun sahuuticoin afanan sahuumanifo. Asca huatan mastai fo-caquin iyónifo.

*Jesús ihui coyan iquinanqui mastanifo
Mr 15.21-32; Lc 23.26-43; Jn 19.17-27*

³² Focani nan nocofunu Simonqui noconifo. Nan Simonfin Cirene anoashu cainníquin. Ascan nan ranushumuaton yononi. —Ihui coyan iquinan noco foshoicahuun, —ishon iyamafainifo. ³³ Gólgota ano fonifo. Gólgota yoia mapo shao. ³⁴ Nanno nococashon Jesús fimi unu pau tashipia osia ayamapaiyaifoan muutacai Jesús apainima. ³⁵ Asca huatan Jesús iyocashon mastanifo. Mastacatan ahuun sahuuti fianpacunifo. Toquiri tocoro rafuya cashuqui nan finonmanaton ahuun sahuuti fiqui tau

huani. Ascashon cuyonfianifo. ³⁶ Asca huatan tsaocashon a Jesús mastafó foisnifo.

³⁷ Ascano man ihui coyán iquinanqui mastacashon amanaonri cununifo isca huaquin,
NAN JESUSFIN ISRAELIFOAN ATON
NIAIFOCOINQUIN

ishon cununifo. Nannori Jesús icaran ishon mastanifo. ³⁸ Ascashon yomutso rafuri mastanifo. Ocuma futsa futsafain ocuma futsa futsa anifo. ³⁹⁻⁴⁰ Ascashon camacaquin isca huanifo, —¡Cuu! Minfin yoimisiquin nocon Dios fu tsainti pushu min choquiacai. Ascatañ osha rafu non fustitan min afanan futsa huairan min imisi. Mifin numatan ihui coyán iquinanmaquinoashu fotohuu. Min Diospan facumainquin, —ishon roanifo.

⁴¹ Nannori nocon yorafihuunshon Dios cu-
fimisi niaifofo yafi Dios fu tsainti pushu cushu-
misifo futan Moisés cununi cuscan tapimamisi-
foan Jesusqui cashumutsamanifo. ⁴² Ascashon
yoinifo, —Nanton futsafo numafatirosashaquin afi-
cái numatiroma. Ascan minmain Israelifoan aton
niaifoquin ihui coyán iquinanmaquinoashu
fotohuu. Minascaiton oinquifin non mia icoínra
huaicain, —ishon roanifo. ⁴³ Ascasho niaifofoan
nanno niafo ato yoinifo isca huaquin, —Jesús noco
yoimisi, “Unfin Diospan facuqui,” ishon noco
yoimisi. Nantofin Dios icoínra huamisiquin. As-
can Upa Diosin a fuchipaiquifin numatiroquin,
—ishon aquí tsain chaca huanifo. ⁴⁴ Ascano afu
masta rafutan aquí tsain chaca huacaquí roanifo.

Jesús nani cuscan
Mr 15.33-41; Lc 23.44-49; Jn 19.28-30

45 Ascano fari masafinin racafiaflashu nan maitio faquishpacucahuani. Ascashu man fari caino afanan shafani. **46** Ascaíno nantianri Jesús fasi oi ashcafínin apa cunani, —*¿Elí, Elí lema sabactani?* —nan yoipai, —*Uhuun Diosin, Uhuun Diosin, ahuscaí mian potamun?* —huani.

47 Jesús ascáiton yorafoan mapo cashon nica-caquin yoinifo, —Nicacapon. Elías cunaiton, —huanifo. **48** Ascaíno futsa ichoni fimi unu fo-cash muran mishan nanupacufoantan faca tahuá shatun mishan tunhuiinfoan Jesús inanpaiquin. **49** Inanpaiyaiton atirifoan yoinifo, —Unuhuu. Elías oshomain fotomaicai non oinon, —huanifo.

50 Ascano Jesús fasi fiisinacahuani. Fiisinacahuatan naani.

51 Ascashu Jesús natapaiyaino a Judíofoan Dios fu tsanti pushu murannoá pano puta pochimua aficoín fashnupacucahuani. Nanscatapaiyaino mai nayanaiyainquin. Toquirininhuanfo torufafaini. **52-53** Ascaíno nan Diospan yorafo naacun mahua quini muran mai huanifo. Nan toquirinín huafó fupucui futsuaino Diosin afanan ato nimani. Ascashu Jesús funiaitian nanfori nan mahua quini murannoashu Jerusalén muran iquinifo. Ascaíton nanoa yora ichapafoan oinnifo.

54 Ascaíno ranushumua niaifo yafi a futan Jesús cushuafoan mai naiyanaiyaicaino ahuara fut-safori ahuascaráiton oincani fasi ratucoincaquin yoinifo, —Iconfinquin. Nanfin Diospan facuquin, —ishon yoinifo.

55-56 Ascaíton nannoshon ainfo ichapafoan chaicushon oinnifo. Nan María Magdalena non María futsa nan Santiago futan José

ahua non Zebedeo facufoan aton ahuari. Nantifi nan ainfofo Galilea anoashu Jesús fu foanfafainmisifoan nan apaiyaifo cuscan ato huashomisifo.

Jesús mai huani

Mr 15.42-47; Lc 23.50-56; Jn 19.38-42

⁵⁷ Ascatan man fari caino nocofunu ahuashta yopatanaima ahuun anu José nan Arimatea anoashu cainni. Nantorifi Jesús tanamisi sharacoin ini. ⁵⁸ Nan José niaifo Pilato ano cashon yoiquin isca huani, —Niaifon, un Jesús toquirinhuan quini muran mai huapai. Un mia yocayoaran, —ishon yoini. Ascaiton, —Jesús ahuun caya José inancahuun, —ishon Pilato yononi. ⁵⁹ Ascaiton José Jesús ahuun caya pano oshopa sharacoinchi raconi. ⁶⁰ Racoshon toquirinhuan quini muran Jesús mai huani. A murancai tsoa maiyomisima muran mai huani. Ascashon toquirinhuanun fupofaini cani. ⁶¹ Nannoshori María Magdalena futan María futsan tsaoshon oinnifo.

Ranushumuafaan nan mahua quini ano cushunifo

⁶² Iyoconaino tunutitian yorafohuunshon Dios cufimisi niaifofo yafi Fariseofo Pilatoqui fonifo.

⁶³ Focashon yoinifo, —Niashu nan Jesús chanishunin yoimisi, “Un naashu osha rafu non fustitan un afanan funitiroran,” imisi. ⁶⁴ Ascacun min ranushumuafa a maia toquirinhuan quini ano ato nichihuun cushunonfo. Min asca huaiyamaitofin afu rafuafoan ahuun caya onui futirofoquin. “Man funiaran,” icashu chanishcaquin.

Jesús chani tauyomisi. Ascan chipocaifin fasi chani finacointirofoquin,—huaifoan. ⁶⁵ Pilato ato yoini, —Manfin mato Dios fu tsainti pushu murannoa maton ranushumuaf a toquirinhuan quini ano ato nichicahuun cushutanonfo,—ishon ato yoini. ⁶⁶ Ascaiton a toquirinhuan quini ano ranushumuaf nichinifo. Nanfoan toquirinhuan sapa tocoro fuposhon ahuara tuipaton tanyacunifo. Ranushumuaf nanno nichifurani funifo nannoshon cushunonfo.

28

*Jesús funini cuscan
Mr 16.1-8; Lc 24.1-12; Jn 20.1-10*

¹ Ascano Israelifoan noco tunutitian nan Domingo anaitia iyoconaino nan maia ano oin focani fonifo. ² Ascaino nantianri mai fasi curushcain nayanaiyaicaino nocon Ifo Diosin ahuun oinmati afu icafo nai ariashu fotoni. Fototan toquirinhuan fuputan acamaqui tsaoni. ³ Ascaino ahuun fuso fasi chashacoinni. Naan canan facaica ointsa. Ahuun sahuutiri fasi oshopa yoa rama furoa ointsa. ⁴ Ascaiton oincani ranushumuaf fasi ratui tari taricaní aton ratupasi nayonifo. Nan naa shinantsa anifo.

⁵⁻⁶ Ascaiton Diospan oinmatinin afu nai muran icaton María rafu yoini, —Ratuyamacahuun. Mun tapia man Jesús funai yoa. Jesús man mastafaitafo natian nunoma. Mato yoimisi cuscan man funia. Oin fucapon quini muran. Nan racaitano. ⁷ Ascashon afu rafuafo ato yoiriscat-acahuun, “Jesús naafaitashaqui man funiaquin. Galilea ano cai tauicai anoshon mato manashqui.

Nannoshon man ointiro.” Un mato yoiai cuscan ato yoiriscatacahuun, —ishon Diosin nai oinmatinin ainfo rafu yoini.

⁸ Ascaiton nicatan nan ainfo rafu toquirininhuan quini anoashu ichonifo. Ratufiacani aton nomuran fasi unimacoincaquin afu rafuafo yoi focani ichonifo. ⁹ Ichoaifoanno Jesús atoqui niriscatani. Ascashon, —Mun moiyanan, —ishon ato yoini. Ascaiton nan ainfo rafutan taicopacufoantan, —Min nocon Iforan —huaifoan. ¹⁰ —Ratuyamacahuun. Ascatamarocon uhuun ushtofo ua yoishotacahuun Galilea ano fononfo. Nannoshon ua oinshcaquin, —ishon ato Jesús yoini.

Ranushumuafao yorafo chani huani cuscan

¹¹ Ascataan ainfofo Jesús anoashu foaifoanno ranushumuafori yorafohuunshon Dios cufimisi niaifofoqui nan oianfo cuscan atoqui chaninifo. ¹² Ascaiton nicacani niaifofo ichanancashon shinannifo, —Nonmun ahusca huaicai, —ishon. Ascashon ranushumuafó yoinifo, —Non mato yoiai cuscan nannoricoinrifi futsafo yoicahuun non mato pui ichapa inanon. ¹³ Ascacun ato yoiqui isca huatacahuun, “Jesús fu rafumisifoan non oshano fucashon Jesús ahuun caya man onuaforan,” ato huatacahuun. ¹⁴ Ascaiton niaifo-coinin nicaquin Jesús ahuun caya anoma nicai raquirira icaiton non yoisharaicanon mato ahusca huanonma, —ishon niaifofoan ranushumuafó yoinifo. ¹⁵ Ascashon ato pui inanfoanno focashon nan niaifofoan ato yoiafo cuscan nannoricoin ato yoinifo. Ascaiton nan maifoti anoafu

tan Israelifoan nicanifo. Ascano nantian icoinra huanifo ranushumuafaoan ato yoiaifo cuscan nica-caquin.

*Jesús ahuun unutaqui a rafuafó yononi cuscan
Mr 16.14-18; Lc 24.36-49; Jn 20.19-23*

¹⁶ Ascashu non afu rafuafó once nan Jesús noco yoia cuscan machi Galilea ano non cani. ¹⁷ Ascashon oinquin non yoini, —¡Aicho! Min nocon Ifo Jesús. Non mia fasi noirán, —ishon non yoini. Ascafiaitocai futsafoan icoinra huacuánima. ¹⁸ Ascano nocoqui chaimashta oshon noco yoini, —Uhuun Upa ua yonoa nantifi nai ariafo yafi mai anoafori un yononon. ¹⁹ Ascacun manifoti anoafó yoifoanfafaitacahuun ua icoinra huafain ua tanasharanonfo. Uhuun Upa Diosin ahuun anuhuunshon yafi uhuun anuhuunshon non Diospan Yoshin Sharahuunshonri yorafounu muran iquimashcaquin. ²⁰ Ascashon nantifi un mato yonoa cuscan huafain yorafori yosicahuun icoinra huafain ua nicasharanonfo. Unfin matofu iquicai. Ascashu nan un afanan oaitian un mato furi ipanacaran, —ishon noco Jesús yoini. Nanti.

Diospan Tsain

New Testament in Sharanahua (PE:mcd:Sharanahua)

copyright © 2008 Wycliffe Bible Translators, Inc.

Language: Sharanahua

Translation by: Wycliffe Bible Translators, Inc.

Sharanahua [mcd], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sharanahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

clv

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

8402923d-fd05-5a85-a7ae-203f04ecb375